

LUCAS NAAJOTASANO JESUCRISTOJINIJI

**Niya pohuatashiyari casaara Lucas
naajiotaquiaari nioni**

1 ¹Queraatia pueyari suraatia naajionu saniniujiuquiaari puetunu canaa tajinia miishanojuanaa. ²Nojoriiri naajioquiaari taa Jesu jiyaramiquishano pueya pohuataquiaari Jesujiniji pajaniyani. Cuno pojoriiri Jesu niquiniaa quiquiaari, shusha poonijionu na coteesacari. Nojoriiri na nuhuaji na rupaa pohuatanaara jiyatesaaquiaari. ³Janiyari niishiriojoriquiaani, maniniaruhua quiocuara cua naajionurajuhua cua panishano Teófilonaa. Naaratej, janiyari pueyaracaanu jacaria nequesoreeriquiaa puetunu Jesu miishanojuanaani, na coteejajiniiji. ⁴Naacujitij, quiocuara naajiyaniija na coteenujiniiji, seetanujuaanaa quia niishiniuria puetunujuanaa, taa quia niishitiojosaacanucujani.

**Pueyaso seru pohuatasacari Tiuquiniijiona
Juan rasaanutaniya**

⁵Herodes jaara jiyaniija quiquiaari Judea jiyajinia, Zacarásri jiyacari pueyacuara secojona quiquiaari. Nojuajaari supuetana Abías niquiohuacujinio supueno quiquiaari. Necocua sesa quiquiaari Isabel. Cuno maajiiri supuetana Aarón niquiohuacujinio supueno quiquiaari. Nojori supuetanaari mariyata tariucuacaanu pueyacuara secojona quiquiaari. ⁶Zacarásri necocua Isabelta maninia miijiaca quiquiaari

Pueyaso niquiara. Nojoriiri puetunu Pueyaso rootasanojuanaa tojitiajaca quiquiaari, taa Pueyasojiniiji caminiujiuniaa naajionuutaquiaaricujani. Nojoriicuara maja na naata sesa casaa tonujusaanu quiquiaari, saaja maninia miijiaca nojori quishacari. ⁷Nojoriiri maja na muetunu quijia, niyajaru Isabel quiniucua. Naajuhua, nojoriiri maja tari na naata muetunu quiquiaari, saaquiapue nojori quishacari.

⁸Tamacari, Zacarásri narta pueyacuara secojonaata poonijioriquiaa Pueyaso Secojoua tiajinia Pueyaso niquiara Jerusalén tiacajinia. Jiyacari saniniuujia nojori poonijosacariiri quiquiaari.

⁹Shanohua jaanutajaari catijiasaaquiaari puetunu juucajanaa Pueyaso Shuriucua Quiquiojinia, Secojoua tiajinia.

Pueyacuara secojo naari jiitiquiaari saajia naajiosano jacutanura juhua tacuarishijosacari, nojori niishiniuria teyano nojorijinijiniote Pueyaso Shuriucua Quiquo tiuquiniutianiyan, shanohua jaanutaja na catijianura tii. Cuno juuca saniniuujia, saajiaari Zacaráscura tacatequiaari. Naacujitij Zacarásri seeratasaaquiaari tii na tiuquiniuria shanohua jaanutaja na catijianura. ¹⁰Na catijasacari, puetunu pueyajanaari Pueyaso secojonuuriquiaa Secojoua tia carijiniacuma. ¹¹Jiyacaritij, Pueyaso seruuri Zacaráscura muetaquiaari. Nujuariquiaari shanohua jaanutaja catijiasaqui miaquetajara. ¹²Zacarásri

shirriquirii na niquishacari Pueyaso seru. Jiyanhua na puerereeri. ¹³Pueyaso seruuri na sequeree:

—Maja puerenu Zacaríasnaa. Pueyaso-cuajaari quia secojosano tojiquiaari. Quia niquiocua Isabelri quiaa muetunutaniya. Quiocua na sesojore “Juan”. ¹⁴Quiaari shuquiriaatia quiniutianiya. Quiaari quia mueya timitianutaniya. Queraatia pueyari na shuquiritianutaniya na rasacari. ¹⁵Quia niyanuuri cutara pueyano quiniutianiya Pueyaso niquiara. Nojuajaari vino* ratuyashijia quiniutianiya, najatunacunio. Pueyaso Sohuanuraca pueyano quiniutianiyari na rasaacarijiyoyua. ¹⁶Nojuajaari queraatia Israel pueya tacatonutaniuhua nojori Jiyaniijia Pueyasoocua. ¹⁷Nio Juanri pa Jiyaniijia puetana quiniutianiya. Nojuajaari pueyara Pueyaso sequesano caminiujiunia supuetana Elías sohanu jiitianutaniya, na cumaacanio. Naacuajitij, pueya jiuujia taraajonutaniyari, nojori jiyanooniuria necohua. Naajuhua, nojuajaari tojitiaashijiaca pueya rootanutaniya maninia, Pueyaso tojitiajaca nojori quiniuria. Naacuajitij, pueya jiuujiacaari jeenucuasano quiniutianiya pa Jiyaniijiaacuaji.

¹⁸Zacaríasri Pueyaso seru nequesotaree: —¿Taa cua niishiniutianiyarini quia sequesano seetanujuanaa tohuateenutaniya quiria? Janiyari tari saaquianoni. Cua niquiocuaari motajajuhua.

¹⁹Pueyaso seruuri na riucuaree: —Janiyacuaajaari Gabrieln*, Pueyaso tacoji nujuana, na sequesano cua miiniuria. Nojuajaari cua jiyaroree cua pohuatanura quiajaniya nio maninia casaa Pueyasojiniji. ²⁰Quiarijia saniniujia, cua sequesanoocua quia tiyuaquiniucua, quiaari tiquia quiniutianiya. Majaari quia pocuanu quiniutianiya cuaara rasaarejaatijia quia niyanu. Naajaa, puetunu cua sequesanojuanaari

naa quiniutianiya taa Pueyaso paniyacua-jani.

²¹Jiyacaritij, pueyari Pueyaso quiquio carijiniacuma sashiriquiaa, Zacarías cuaara tohuatohuara. Nojoriiri shirriqui-tiurii pueyaracaanu Zacarías tarishishacari Pueyaso Shuriucua Quiquiojinia. ²²Zacaríasri socua tohuata-mohua. Majaari na naata pocuanu quiriquiaa. Nareja shishiniojoriquiaari. Naacuajitij, pueyari niishirii Pueyasoqui casaa niquitirii Zacarías, Pueyaso Shuriucua Quiquiojinia na quishacari.

²³Zacarías jaara puecaquiaari puetunu na poonijionu juucajanaa taa na sequesaaquiaaricuaajani, na tiajinia quiaarohuari. ²⁴Na nuhuaji, necocua Isabelri manajeree. Na manaja jamaatia-quiaariiri. Majaari na muetanu quiquiaari na tiajiniji cuaara na shocojoquiaarijiaati-jia cinco raca. Nojuajaari tama sequequiaarijiaaja: ²⁵“Quiarijiani, cua Jiyaniijiaari maninia miirri janiya. Majaari socua pueya rerequetenu quiniutianiya janiya, muetujua cua quishacari tari”.

Pueyaso seru sequesacari Jesu rasaanutaniya

²⁶Seis raca jaara shocojoquiaari Isabel manajesacaricuua, Pueyasoori na seru Gabriel jiyaroree Nazaret tiacajinia, Galilea jiyajinia. ²⁷Tamonu niyacocua na jiyaroreeri, cante tari sequesaaquiaari-cuaajani José jyanishano pueyanota na caminiuria. Na camiriquianoori supueta-na jiyaniijia David niquiohuacuajinio supueno pueyano quiquiaari. Niyacoo sesa quiquiaari María. ²⁸Pueyaso seruuri nocua tiuquimíaa. Na sequereeri:

—Janiyari quiocua jiyarosaareeni, Pueyaso shuquiritiasano niyacoonaa. Jiyaniijia Pueyasoori quiata quia, socua shuquiriaatia quia quiniuria tamasaca maajipohuajiniji.

²⁹Maríari jiyano^hua taca^aquiaari naa Pueyaso seru sequesacari nojuaja. Nojuajaari tamajaaja niishiriojoriquiaa: “¿Casaara naa na sequeeree janiyani?” ³⁰Na nuhuaji, Pueyaso seruuri na sequeeree:

—Maríanaa, maja puerenu. Pueyasoori quia shuquiritiniutianiya. Quiaacuaajaari na timitiasano. ³¹Quiarijiani, quiaari manajenutianiya. Quiaari cayaniyojua ranutianiya. Quiocua na sesojore “Jesu”. ³²Nojuajaari cutara pueyano quiniutianiya. Sesojosaanutaniyari “Pueyaso Niyanu”, jiyocuaaanu Quijia Niyanu. Pa Jiyaniijia Pueyasoori na jiyatenutianiya Jiyaniijiarajanaa na quiniuria na supueta-na David niti. ³³Israel pueya jiyaniijia quiniutianiyaari. Pueyaracaanu jiitianutaniya na pueyari. Majaari na shaajenu quiniutianiya Jiyaniijia na quishacari.

³⁴Maríari Pueyaso seru nequesotaree:

—¿Taa cua manajenutaniyari, niyacaaju cua quishacari?

³⁵Pueyaso seruuri na sequeeree:

—Pueyaso Sohuanuuri quiocua niniutianiya. Na cumaaca naaquiiri quiocua pacunutianiya. Naacujitij, quia niyanuranoni, cunoori Pueyaso Niyanu quiniutianiya. Nojuajaari seetanjuanaa Pueyaso tojijia quiniutianiya. ³⁶Naajuhuj, quia supuetanajiniinio motaja Isabelri neyanu ranutaniyajuhuj. Cuno maajiiri sequesaaquiaari “niyajaru maajitia”. Naajaa, seis racaari tari na shocojia na manajesacari. ³⁷Pueyasora, majaari jiyajeneta casaa quiniu. Nojuajaari cumaacaraca na miiniuria puetunu na panishanojuanaa.

³⁸Maríari sequeeree:

—Maniniacuajai. Janiyacuajaari cua Jiyaniijia Pueyaso seruni. Pueyaso cuaara miiria janiya taa quia sequeereecuajani.

Na nuhuaji, Pueyaso seruuri quiacuhua.

María quiasacari Isabel niquniuucua

³⁹Maríari jiyacari quiaquiaari na secoonuta Judea jiyajinia, Zacarías

tiajiniara tamonu tiacajinia. Cuno jiyari tuhuananuhuaraca. ⁴⁰Zacarías tiajinia María tiuquishacari, Isabel sequeereeri. ⁴¹Isabel tojishacari María sequesano nojuaja, iconaajaari na jiniacuma nujuanequequee! Pueyaso Sohuanuuri Isabelcua tiuquiqui na cumaaca na jiitianura. ⁴²Naacujitij, Isabelri jiyacari na rupaa paaretaree. Naa María sequeereeri:

—iPueyasocuaajaari socua maninia miiriucaa quiajaniya tamasa maajipohuajiniji! iManinia miiniutianiya quia niyanujaariuhuj! ⁴³¿Janiyateeri pueya tojishano maajini, cua Jiyaniijia nucua tiuquiniuria cua tiajinia, na niquiniuria janiya? iMaja! Naajaa, ijiyanohua timianijia! ⁴⁴Shusha cua tojishacari quiajaniya cua sequeyano, cua mueyari cua jiniacuma nujuanequequee na shuquiriniutia. ⁴⁵Shuquiriaatia quia quiri, quia tiuuniuucua Pueyaso sequesanoocua quiajaniya.

⁴⁶Maríari sequeeree:

—iCoojia jiyano^hua shuquiritiaa cua Jiyaniijia Pueyaso! ⁴⁷iCua sohuanuuri cua Jiyanoonia Pueyaso timitaani! ⁴⁸Juhua najuhuaa quijianijia. Naajaa, Pueyasoori cua jiyanoorii. Cua saquiriojorucuaari na tojijia cua quishacari. Quiarijiani, pueyari pueyaracaanu cua sequenutianiya: “Pueyaso shuquiritiasano María”. ⁴⁹iPueyasoori jiyano^hua maninia miirii janiya! Nojuajaari puetunu cumaacaracajanaa. Nojuajaari tojetaarucujanaa maninia quijia. ⁵⁰Nojuajaari pueyaracaanu jiyanoocuaa na tojitianaa, canapute na rerequeteyaquijiaca-cuajani. ⁵¹iNojuajaari jiyano^hua maninia miiquiaa na cumaacata! Nojuajaari niishijiaca pueya shocotequiaari, canapute tama na

cuaqueyajaaja jiyatequiaari juhua niishijiacaracuajani. ⁵²Nojuajaari cutara jiyaniijianucua jatatee, cuno pojori jiyaniishano niishiyashijiaa pueya jiyatesaanura jiyaniijiaa nojori niti saniniuujia. ⁵³Miaajeejunucua tootijioreeri maninia sumatuuta. Puera casamiriaca pueya taanuuquiaariiri, casaaju nojori quiojonura. ⁵⁴Na pueya Israel naacureeri. Majaari na niyjetanu quiquiaari nojoriicua na tاراajenu. ⁵⁵Naa miiquiaariiri taa na sequequiaari pa supuetanaacua-jani. Pueyasoori naa pa supuetana Abraham sequequiaari: “Seetanujuanaa quiocua tاراajenutaniyanijia, quiocuajinio superiquiano pueyacuanio”.

⁵⁶Na nuhuaji, Mariari queraatia tarishiquiaari Isabel tiajinia. Jiuujianaraca raca nuhuaji, Mariari tacatequiaariuhua na tiajiniohua.

Tiuguinijiona Juan rasacari

⁵⁷Na nuhuaji, Isabel rasacari quiquiaari. Jiyapueratereeri. ⁵⁸Na shuriucua quiniaa, mariyata na jiyasooacuajinio supueno pueyajuhua, nojoriiri jiyanoehua shuquiriquiaari nojori tojishacari taa Pueyaso jiyanoehua tاراajequiaari Isabelcuani, na shuqiritiniuria neyanuta. Nojoriiri Isabelta shuquiriquiaarijuhuaj. ⁵⁹Nojoriiri Zacarías tiajinia rerejoquiaari conaaja jiitiasacari ocho juuca, na cararaatiuuquia co miatesaanura, taa Moisés rootaquiaari-cuajani. Nojoriiri na sesojonu paniriquiaa juucua Zacarías, na que sesaanucua na quiniuria. ⁶⁰Na nucuaari saaja sequereee: —iMaja! Sesojosaanutaniyano “Juan”.

⁶¹Pueyari saaja sequereee:

—¿Casaarateni? iMajaari quenaaja tamonu quia pueyajinijinio cuno sesaraca na quiniu quiquiaari! ¿Casaara naa quia sesojonu paniyarini?

⁶²Cunora, pueyari na que Zacarías shishinioree na nequesotanura taa na sesojonu paniriquiaa neyanuni.

⁶³Zacaríasri naajiooju casaa masereee na naajionura tii neyanu sesarano.

Naajioreeri: “Na sesa, Juan”. iPueyari jiuujiatequee! ⁶⁴Jiyacaritij, Zacarías nitiiri sasaquitiacuhua. Juhuacatecara pocuarohuari. Pueyaso miishano pohuateree pueya niquiaaraari, na shuqiritiasacari Pueyaso. ⁶⁵Cunora, na tia shuriucua quiniaa pueyari jiuujiateree. Puetunu niojuanaari caminiujiushaaquiaari puetunujuanaa cuno Judea tuhuananuhucua quijiaa pueyara. ⁶⁶Puetunu nio tojitianaa pueyajanaari niishiriojonuuquiaari. Tama nojorijiaarijia nequesoreetooquiaari:

—¿Casaaquitiijia cuno mueya quiniutianiya na nuhuajitijiaj?

Pueyari niishiquiaari Pueyasoori seetanujuanaa cuno mueyata quiriquiaa, na cumaquiniuria.

Zacarías sequesano na shuqiritiasacari Pueyaso

⁶⁷Na que Zacarías jiuujiaraari jiyanoehua mishaja quiriquiaa Pueyaso Sohuanuta. Pueyaso Sohuanuuri na pohuatereee.

Naaratej, Zacaríasri naa sequequiaari:

⁶⁸—iJiyanoehua maninia pa Jiyaniijia Pueyaso, pa supuetana Israel Jiyaniijia! iCuaara jiyanoehua shuqiritiasaaria mijiria na niniuucua na pueyacua, pocuaji na tacunura! ⁶⁹Pocua jiyaroree cumaa-caraca pocuaji Tacuriquianoori. Pa Jiyaniijiaranoori Pueyaso seru David niquiohuacuajinio rasaanutaniya, taa Pueyaso sequequiaari tariucuacaanucuaajani. ⁷⁰⁻⁷¹Tariucuacaanu na sequenu panishano caminiujiuniaacuajaari naa pohuataquiaari pa supuetanaa niquiaratej, taa pa paraa na ritianu-

taniya pocuajini, pa niquiniu panyaquijia pueyano. ⁷²Nojuajaa-ri sequequiaarijiuhua, majaari na niyjetanu quiniutianiya na sequesano pa supuetanaa, pocua na taraajenura. ⁷³⁻⁷⁴Pueyasoori pa supuetana Abraham sequequiaari seetanujanaa, nojuajanaari pocuaji ritianutaniya pa paraa, pa puereyaquiniutia nera pa poonijninura shitimia. ⁷⁵Nojuajaari Abraham sequequiaarijiuhua maninia quijiara pa jataniniutianiyaquiniaari, saaja nera pa quiniuria pueyaracaanu. ⁷⁶Quiajaniya saniniuujia, quiyanuniyojanaa, quiaari sesojosaanutaniya Jiyocuaaanu Quinia sequenu panishano caminiujiunia. ¡Quiaari pa Jiyaniijiaranojanaa puetanutaniya, juhua na nuu jeenucariquiano! ⁷⁷Quiocua Pueyaso saquiriojosano pueya niishitiojore, nojoriiri na naata jiyanooshano quiniu sesa nojori miishanojiniji Pueyaso pueya nojori quiniuria. ⁷⁸¡Pa Pueyasoori jiyanoohua jiyanoojia! Pocua taraajeja. Na jiyarosacari poojia Cuhuatariquiano, nojuajaari pa cuhuatanutaniya, maja ninishiqui pa quiniuria socua. ⁷⁹Maninia pa cuhuatanutaniyari, maninia pa rucanejonura Pueyaso niquiara, panaatia poojiacata. Naacuajitij, majaari socua pa cajitiuniu quiniutianiya taraatia ninishiqui, juhua pa jamaca shuriucua.

⁸⁰Conaajaari maashiquiaari. Nojuajaari tama na cuaqueyajaaja cumaquiquiaari socua seetanujanaa Pueyasocua tiuujia na quiniuria. Nojuajaari pueyaracaanu cariiquia jiyajinia quijia quiquiaari nojuaja jaara Pueyaso sequenu panishano caminiujiuniu coteequiaarijiaatijia narta Israel pueya niquiara.

Jesu rasacari

(Mt 1.18-25)

2 ¹Tiuquinijiona Juan rasaanu nuhuaji, jiyaca jiyaniijiajanaa César* Augustoiri Roma tiacajiniji sequequiaari puetunu na jiitiasano pueyapuejanaa cuaara serojosaaria puetunu nojori jiyacajinijanaa. ²Pueya jaara coteenujanaa serojosaquiaari, Cirenio jiyaniishano pueyanoori jiyacari Siria jiyajinia jiyaniijia quiquiaari. Nojuajaari jiyaniijia César Augusto jiyatesano quiquiaari. ³Puetunu pueyajanaari sequesaaquiaari nojori cuaara quiojohuara na raja tiacajinia, na sesaca naajiotasaanura tii.

⁴Joseeri jiyacari Nazaret tiacajinia quiriquiaa, Galilea jiyajinia. Na raja cutaraari quiquiaari Belén tiacajinia, Judea jiyajinia, tee na supuetana David rasaaquiaaricuaani. Naaratej, Joseeri Belén tiacajinia quiaquiaariuhua.

⁵Marfari tari sequesaaquiaari nojuaja Joseeta caminiutianiya. Naaratej, Marfari nata quiaquiaarijiuhua Belén tiacajinia, nojori sesaca naajiotasaanura tii. José niquiocuaranoori tariucua manajaraca quiriquiaa. ⁶Belén tiacajinia nojori quishacari, jiyacari tari quiquiaari Marfaranu juuca. ⁷Tii jiyapueratereeri. Conaaja jiunioquiaari toqueraacuacajiniaari. Na nucuaari na niaquiaari juyaca miaquejajinia. Marfari naa raquiaari cuniqui maja quiquio quishacari nojoriria rucoona tiuquijia tiajinia.

Pueyaso seya muetasacari borrego cojuanaa pueyacua

⁸Belén tiaca shuriucua cuno niucuaaja, borregohua cojuanaari suteriquiaa cuhuariquajinia, na seya nojori cojuasacari. ⁹Canashiaquiji Pueyaso seruuri nojoriicua muetaquiaari. Jiyaniijia Pueyaso shacantuuca cumaacaari nojori

cuhuatquiaari. iNojoriiri jiyanhua shiriiqituri! ¹⁰Pueyaso seruuri nojori sequeere:

—iMaja nia puerenu! Niaacua nimiaa-nijia, jiyanhua maninia casaa cua pohuatanura niajanija. Cunora, puetunu pueyajanaari shuquiriniutianiya. ¹¹iNiaa-cuaji Tacunaari tari rasaaree supuetana David tiacajinia! Nojuajaari Pueyaso Jiyarosano, pa Jiyaniijia Cristotuhaj. ¹²Niaa jaara nocua quiaare, niaari conaaja riuriatanutaniya toqueraacuacajinia jiuniosano, juyaca miaquejajinia maano. Naacuajitij, niaari niishiniutianiya, seetanujuanaari cua pohuatasano niajanija.

¹³Jiyacaritij, narta Pueyaso seyari na cojishii. Jiyanhua queraatia quiriquiaari. Nojoriiri naa maninuhuaqueetariquiaa Pueyaso:

¹⁴—iJiyanhua maninia pa Pueyaso, jiyocuacaanu Quijia! iNojuajaari jiyanhua pa shuquiritiasano, na jiyaronuucua jiyacua quiniaa Jiyanoonia! Naacuajitij, cana Pueyaso shuquiritiaani, nojoriiri jiyanoootoonutaniya narta pueyata.

¹⁵Pueyaso seya jaara tacataquiaariuhua jiyocuacaanu na quiquojiniuhua, borregohua cojuanaari tama sequetoo-quiaarijiaaja:

—iBelén tiacajinia pa quiaarequi! iPá niquishii cuno, casaajiniji pa Jiyaniijia numooteree pajaniyacujani!

¹⁶Nojoriiri ritia quiojoquiaari. Conaaja riuriatatuseri, María, Josénio. Conaajaari juyaca miaquejajinia niasano mariquiaa. ¹⁷Nojori niquishacari conaaja, nojoriiri ritia tii quiniaa pueya caminiujiurii conaajajiniji Pueyaso seru pohuatasano nojori. ¹⁸Puetunu pueyajanaa, cante nojori pohuatasano tojiriquiaani, nojoriiri jiuujiateree.

¹⁹Majaari María niyajetanu quiquiaari

puetunu nojori pohuatasanojuanaa. Noojiajinia na niishiriojoriquiaa pueyara-caanuuri. ²⁰Borregohua cojuanaari quiojoquiaariuhua. Nojoriiri Pueyaso maninuhuaqueetariquiaa nojori tojishanojiniji, nojori niquishanojinijinio. Puetunujuanaari naa quiquiaari taa cuno niucua Pueyaso seru pohuataree nojoricujani.

Conaaja Jesu pasacari Pueyaso Secojoja tiajinia, Pueyasora jiyatesocoriquiano

²¹María conaaja jaara ocho juuca jiitiaquiaari, na cararaatiuuquia coori mialesaquiaari, taa Moisés rootaquiaari-cujani. Na mialesaanu nuhuaji, nojuajaari sesojosaaquiaari “Jesu”, taa Pueyaso seru sequequiaari Mariacuajani, na manajeyaquishacarija.

²²Na nuhuaji, Moisés sequesano juucaari quiquiaari na nucua neyacata cuaara juhua tuteera, jeequesano nojori quiniuria Pueyaso niquiara, mueya rasaanu nuhuaji. Naaratej, nojoriiri conaaja Jesu paquiaari Jerusalén tiacajinia, Pueyasora na jiyatesaanura, Pueyasora na quiniuria. ²³Na queyari naa miiquiaaritij, tariucuaanu Pueyaso Rupaajinia naajiotasano tojitiajaca nojori quiniucua. Naajiotasanoori naa quiyatej: “Puetunu nia jiyapueranuhujanaa cuaara Pueyasora jiyatesaaria”. ²⁴Naaratej nojoriiri quiaaree na seru mosaanura nojoriicuaa Pueyaso Secojoja tiajinia, juhua jeequesano nojori quiniuria Pueyaso niquiara, taa pueya rootasaaquiaari Moisés naajiotasanojinijicujani. Pueyasoori naa sequequiaari Moisés tarijiatej:

“Cuaara puecoosaaria caapiqui mococoonu. Mococoonu jaara quiaquiri, cuaara puecoosaaria caapiqui shinijia”.

²⁵Jiyacaritij, tamonu pueyanoori Jerusalén tiacajinia quijia quiriquiaa. Na

sesa quiquiaari Simeón. Nojuajaari maninia miihia quiquiaari Pueyaso niquiara. Pueyaracaanu Pueyaso shuquiritiaja quiquiaariiri. Nojuajaari pueyaracaanu sashijia Pueyaso cuaara jiyaroora Israel pueyacuaji Tacuriquiano. Nojuajaari Pueyaso Sohuanu jiitiaja.

²⁶Pueyaso Sohuanuuri na niishitiquiaari majaari na shaajenu quiniutianiya nojuaja cuaara niquiri Cristojaatijia, Pueyaso jiyarosaariquiano. ²⁷Pueyaso Sohuanuuri na jiyatequiaari namitia cuno juuca Pueyaso Secojoua tiajinia. Naacujitij, Jesu jaara pasaaquiaari Secojoua tiajinia, nera na miishaanura puetunu tariucuacaanu rootasanojuanaa, Simeónri jiyacari tii na niquirii.

²⁸Simeónri Jesu patee. Na cacanuureeri. Naa Pueyaso sequeree jiyanoohua na shuquiriniutiaari:

²⁹—iCua Jiyaniijianaa, tariucuaja! iQuiaritia cutara cua naata cusonu juhuajaniya, shuquiriaatia cua quishacari! Quiaacuajaari tari cua niquitirii taritia quia sequesano janiya, quia seru cua quiniuucua. ³⁰Tari niquirii quia Jiyarosanocua-janijia, canaacuaji Tacuriquianoni. ³¹Nojuajaari quia niquitosano puetunu jiyacajinia quiniaa pueya-pueecuarajanaa. ³²Nojuajaari puetunu taucuaca jiuujiajanaa cuhuatanutaniya, maninia nojori niishiniuria quiajaniya. Naajuhuj, quia pueya Israelni, nojoriiri tamasa pueya shuquiritiasano quiniutianiya na seera.

³³Jesu que, na nucuajuhuj, nojoriiri jiuujiateree naa Simeón sequesacari conaajajiniji. ³⁴Na nuhuaji, Simeónri nojoriicua niaree na juaashiquia. Naa sequereeri:

—Pueyaso cuaara jiitiaara maninia niajanija.
Jesu nucua María sequereejaariuhuj:

—iCua tojiri! iNio conaajaari cutara pueyano quiniutianiya! Queraatia Israel pueyari juhua tiuriiniutianiya nojori ruuretasacari nojuaja. Saniniuujia, queraatia Israel pueyari cumaatia nujuatujuaca quiniutianiya, nocua nojori tiuushacari. Na cumaacata na miiniuucua, pueyari na naata Pueyaso niishiniu maninia. Naajaa, queraatia pueyari na ruuretanutaniya saaja. ³⁵Naacujitij, tama pueya niishiriojosano noojiacajinia-jaarijia niishishaanutaniya. Quiaara saniniuujia, jiyanoohua taraatiaari quiniutianiya. Quioojaari juhua mueruuta tohuariquitiishaanutaniya quia mueyacua quia miishacari.

³⁶Cuniquijia, Pueyaso Secojoua tiajiniani, tamonu motajaari tii quiriqiaajuhuj. Cuno motajaari Pueyaso sequesano caminiujiunia quiquiaari. Na sesa quiquiaari Ana, Fanuel niyatu. Nojuajaari supuetana Israel niyanu Aser niquiohuacuajinio supueno maaji quiquiaari. Jiyanoohua motaja quiquiaariiri. Shusha niyacoo na quishacari, nojuajaari camiquiaari. Na nuhuaji, siete marijiaari na shocojoquiaari neyacata na quishacari. ³⁷Neyaca cusonu nuhuaji, socua ochenta y cuatro marijia na shocojoquiaari mashiquio na quishacari. Nojuajaari pueyaracaanu quiquiaari Pueyaso Secojoua tiajinia, Pueyaso na shuquiritiasacari juuca, niucuanio. Nojuajaari sequeyarucua miaqueyaquiquiaari Pueyaso na secojosacari pueyaracaanu. ³⁸Simeón pocuasacaritia, jiyacaritia, Anaari nocua nimiaa. Na niquishacari conaaja Jesu, Anaari noojiajinia niishiquiaari cante nojuajani. Cunora, Pueyaso sequeree na shuquiriniutiaari: “iPaacarasho!” Na nuhuaji, nojuajaari juhuacatecara Jesujiniji pohuataree Pueyaso Jiyarosocoriquiano sashijia pueya niquiara. Nojori sequereeri:

—iNiocuajaari pa sashishano pa pueyacuaji Tacuriquiano!

**Na queya tacartasacariuhua conaaja
Nazaret tiacajinihua**

³⁹Jesu queyari puetunu Moisés naajioneejinia Pueyaso rootasanojuanaa tucuaquiaari na conaajara. Na nuhuaji, nojoriiri Galilea jiyajiniara tacatequiaa-riuhua tama nojori tiacajinihuajaaja, Nazaret tiacajinia. ⁴⁰Naatujua Jesuuri maashiquiaari. Socua cumueecara quiquiaariiri, maninia niishijiaranio. Pueyasoori jiyanoehua na naacujua.

**Mashajaniyojua Jesu quishacari Pueyaso
Secojojua tijinia**

⁴¹Puetunu marijiajananaa, Jesu queyari quiojoquiaari Nazaret tiacajiniji, Jerusalén tiacajiniara, Pascua* juucajinia nojori queranacunura. ⁴²Doce marijia jaara Jesu shocojoquiaari tari, Jesuuri nojoritia jiyacari quiaquiaari shushajanaa, taa nojori quianu jiitiquiaari cuajani puetunu marijiajananaa. ⁴³Queranacunuunu jaara puequequiaari, Jesu queyari quiojoriquiohua juhuajaniya. Jesuuri jiyacari Jerusalén tiacajinia jiyojequiaari. Majaari na queya niishiniu quiriquiaa. ⁴⁴Nojoriiri jiyaniquiaari Jesu naasucua narta quiojonaa tijinia quiariquiohuaju-huaj. Naacuajitij, nojoriiri juhuajaniya rucuanereee puetunu cuno juucajananaa. Cuno niucuaaja, nojoriiri Jesu pajequiaari nojori pueya tijinia, nojori niishishano pueya tijinianio. ⁴⁵Shaaqui quiriquiaari. Cunora, nojoriiri Jerusalén tiacajinia tacatequiaariuhua, tii na pajenuhuara. ⁴⁶Jiuujianaraca juuca nuhuaji, nojoriiri socua Jesu riuriataquiaari Pueyaso Secojojua tijinia, Moisés Rootasanojiniji niishitiojonaa pueya tijinia cajiyo. Nojori tojiriquiaari. Nojori nequesoreetariquiaajaariuhuaj. ⁴⁷Puetunu pueyajanaa, canapuea na tojitiariquiaani, nojoriiri

jiuujiatequiaari niishijia Jesu quishacari. Jesuuri maninia nojori riuhaneriquiaa saaja, nojori jaara na nequesoreeriquiaa. ⁴⁸Na queya jaara na niquiquiaari, nojoriiri shiriiquitiuquiaari. Na nucuaari na sequereee:

—Quiyanunaa, ¿casaara naa quia miirri canaani? ¡Janiyari quia queta quia pajeriquiaani jiyanoehua canaa tacaaniutia quioqua!

⁴⁹Jesuuri na riucaaree:

—¿Casaara nia pajeriquiaa janiyani? ¿Majateeri nia niishiniu, janiyari cua Que Secojojua tijinia quiniucua jiaatiaani?

⁵⁰Majaari nojori niishiniu quiquiaari Jesu sequesano.

⁵¹Jesuuri na queyata quiaarohua nojori tijinihua Nazaret tiacajinia. Na queya tojjia quiquiaariiri. Na nucuaari pueyara-caanu noojiajinia racataja puetunu na niishishanojuanaa neyanu Jesujiniji.

⁵²Jesuuri socua maashiquiaari, socua niishijiaa quiquiaariiaariuhuaj. Pueyaso shuquiritiasano quiquiaariiri. Puetunu pueyajanaari na shuquiritiaquiaarijuhua.

**Tiuquinijiona Juan pohuatasacari Pueyaso
rupaa cariquia jiyajinia**

(Mt 3.1-12; Mr 1.1-8; Jn 1.19-28)

3¹Na nuhuaji, Tiuquinijiona Juanri Pueyaso rupaa pohuatanu cotequiaari. Jiyacaritij, quince marijiaari tari shocojoquiaari César* Tiberio, jiyaniijiajananaa na quishacari Roma tiacajinia, puetunu jiyaca pueyapuejanaa camarnu na quishacari. Jiyacaritij, Poncio Pilatoori jiyaniijia quiriquiaa Judea jiyajinia. Herodesri* saniniuujia jiyaniijia quiriquiaa Galilea jiyajinia. Tarajanu Felipeeri jiyaniijia quiriquiaajuhua Iturea jiyajinia, Traconite jiyajinianio. Lisanasri jiyaniijia quiriquiaa Abilinia jiyajinia. Puetunu cuno jiyaniijianucujanaani, nojoriiri

jiyaniijianucuara César Tiberio jiyatesano quiquiaari cuno jiyacajinia. ²Jiyacaritij, Anásri Caifásta Judiocuacaacuara secojona jiyaniijianucua quiriquiaa. Jiyacaritij, Zacarías niyanu Juanri cariquia jiyajinia quiriquiaa. Tii na quishacari, Pueyasoori na rupaa na niishitiquiaari. ³Naaratej, Juanri puetunu Jordán moo shuriuquico jiyacajanaa tajiquiaari na poojotasacari Pueyaso rupaa pueya niqiara. Nojuajaari naa pohuataquiaarritij:

—iNioojia nia tacatore maja socua sesa nia miiniuria, moojinia cua tiuquinijionura niajaniya, Pueyaso jiyanooniuria niajaniya sesa nia miishanojiniji!

⁴Naacuajitij, supuetana Isaías naajiotasanoori tohuateequiaari. Pueyaso sequenu panishano caminiujunia na quiniucua, nojuajaari naa miriqui naajiotaquiaari supueriquiano Juanjiniji:

“Pueyano rupaari tojishiya cariquia jiyajinia nacaano. Sequyari:

¹iJyaniijia nuura nia jeenucuare!

iPuetunu maninijanaa nia nuunure, maja shuutiuniu na quiniuria!

⁵iPuetunu tacocuajanaa cuaara mishiquiojosaaria maninia jamatunu na nuu quiniuria! iPuetunu tuhuananuhujanaa cuaara jiuurioosaaria jacanunu na nuu quiniuria! iShuyorocotunu nuu cuaara pocuareesaaria! iPuetunu surocoshiquiajanaa cuaara mishiquiojosaaria jacanunu na nuu quiniuria! ⁶Naacuajitij, puetunu jiyacajinia pueyajanaari Pueyaso Jiyarosano niishiniutianiya, Pueyaso jiyanootiriquiano pueyani”.

Naa miriqui Isaías naajiotasanoni, cunoori pueya numooteriquiaa juhuacarijia nojori jeenucuunura noojiaca, Jiyaniijia Jesu tojitiajaca nojori quiniuria.

⁷Pueya jaara quiojoquiaari na tiacajiniji Tiuquinijiona Juancua, Juan tiuquinijio-

nura nojori, Juanri naa nojori juaaquiaari:

—iNiaacuajaari juhua sacocua! ¿Cante nia numooteree nia mashiniuria jiyanhua Pueyaso saniitonu panishacari niajaniyani? ⁸iManinia miijara nia quiri, canaa niishiniuria niaari seetanujanaa nioojiaca tacatoree sesa nia miiniujiniji! iMajaari najuhuaa tama nia cuaqueyajaaja nia sequenu: “Pueyaso pueyanonijia, supuetana Abrahamjinijnio cua supenuucua”! iNia niishiri, Pueyaso jaara paniri, nojuajaari na naata nio saijiniji shipininiu Abraham niquiohuarajuhua! ⁹iPueyaso cajiiri tari mataa naana pajama, sesa naana nuujutajara! Naana jaara sesa jajau muetujua quiri, nushiyari catijasocoriquiano. Naajuhua, niajaniyari juhua sesa muetuna naana, maninia miyashijia nia quishacari. iNiaari quera saniitioshiyacuaja!

¹⁰Naaratej, pueyari Tiuquinijiona Juan nequesotaree:

—¿Taa canaa miyarinitioj?

¹¹Juanri nojori riucuree:

—Cante querajaqueya toqueracani, nojuaja cuaara niquitioora taque cante toqueejuni. Naajuhua, cante miaquesa-noracani, nojuaja cuaara niquitioora miaquesanoojunucua.

¹²Roma tiacajinia quijia jiyaniijiajanaa Césarra cumaneeca masejonaari Tiuquinijiona Juancua nijioquiaarijuhuaj. Nojoriiri tiuquinijosano quiniu paniriquiaajuhua. Naaratej, nojoriiri Juan nequesotaree:

—Niishitiojonanaa, ¿canaarijiataj, casaa canaa miyarinijia?

¹³Juanri nojori riucuree:

—Maja puera cumaneeca nia masenu pueyajiniji. Saaja nia jiyaniijia sequesano nia masejore.

¹⁴Naajuhua, soldadohuari Tiuquinijiona Juan nequesotaree:

—¿Canaarijیاتaj? ¿Casaa canaa miiniutianiyarinijia?

Juanri nojori riucuaaree:

—Niaacuajaari puecootajaraca. Naajaa, majaari pueya casami nia jaariuutianu, nojori nia miananajonuta, nojoriicuara nia tonujusacarijiuhua nia sapojonuta. Juhua janiya nia quiri saaja nia jiyaniijia niquitiosano cumaneecata.

¹⁵Pueyari jiyanhua niishiriojoriquiaa Tiuquinijiona Juanjiniji. Nojoriiri Pueyaso sequesano na Jiyarosocoriquiano niquiniuucua jiaatiaja. Naaratej, nojoriiri jiyaniriquiaa Tiuquinijiona Juan naasucua Cristo, tariucuacaanu Pueyaso sequesano na Jiyarosocoriquianotej.

¹⁶Nocuaji, Tiuquinijiona Juanri puetunu pueyajanaa sequeree:

—Janiya nareja nia tiuquinijiya moojiniani, juhua jeequejosano nia quiniuria sesa nia miishanojiniji. Tamonu cutaraari cua nuhuaji niniutianiya. iNojuajaari Pueyaso Sohuanu tiuquinijionutaniya nioojiajinia, na cumaaca nia jiitianura, seetanujuanaa maninia miihia nia quiniuria! iNojuajaari juhua manitia nia saniniujiuniutianiyajuhua, maninia jiuujiaraca nia quiniuria! iNojuajaari socua jiyanhua cumaacaraca janiyajiniji! Janiya maara shuquiriaatia quirini, nojuaja jaara cua sequere cua naacutanura nojuaja juhua na seru, quenaaja na sapatu neyocua cua saacatanura. ¹⁷Niaari niishiyacuaja taa pueyano miiquiaa na trigoni paratu panura na cocua, na sucuanio, saniniuujia na jajau na racatasocoriquiano tiajiniaaco. Naajuhua, cuno pueyanoori tari niya quiya na pueya na saquirojonura na tojiyashijiaca pueya tajiniji, na rijiosocoriquiano nata nojori quiniuria. iSesa pueyari juhua trigo sucua catijiasaanutaniya saniniuujia! iNojoriiri jatasaanutaniya manijinia! iCuno maniiri maja na maquesanu quiniutianiya!

¹⁸Tiuquinijiona Juanri naa pohuataquiaari Pueyaso rupaa pueya niquiara. Maninia rupaari, na tojitiajaca pueya quiniuria shuquiriaatia. Socua queraatia quiquiaariiri na pohuatasano na numootenura pueya. ¹⁹Jiyaniijia Herodesri jiyacari tarajanu Felipe niquiocua jiitiriquiaa necocuara. Cuno maaji sesa quiquiaari Herodías. Tiuquinijiona Juanri jiyaniijia Herodes piriyajoquiaari sesa na miishanojiniji. Herodesri maja na tojiniu quiquiaari saaja. Jiyaniijia Herodesri socua queraatia sesa casaa miihia quiquiaari. ²⁰Na nuhuaji, jiyaniijia Herodesri socua sesa miiquiaari: Tiuquinijiona Juan nujuatequiaari nujuatejojuajiniiaari.

Jesu tiuquinishacari moojinia

(Mt 3.13-17; Mr 1.9-11)

²¹Tiuquinijiona Juan jaara puetunu pueyajanaa tiuquinijioriquiaajaa, nojuajaari Jesu tiuquiniquiaarijiuhua. Jesu tohuatasacari moojiniji, na que Pueyaso secojoriquiaari. Jiyacaritij, jiya cajiniocuaari riatequee. ²²Pueyaso Sohuanuuri Jesuucua roseyaree juhua mococoonu niquishano. Jiyocuaanuji, Pueyaso rupaari tojishaaree sequeyano:

—iQuiaacuajaari cua panishano quiyanniyojua! iJiyanhua quia shuquiritiaanijia!

Jesu supuetanaa sesaca

(Mt 1.1-17)

²³Treinta marijia jaara na shoconujuquiaari, Jesuuri na Que Pueyasora poonijionu coteequiaari. Pueyari jiyaniquiaari José naasucua seetanujuanaa na que quiquiaari. Joseeri Elí niyanu quiquiaari. ²⁴Eliiri Matat niyanu quiquiaari. Matatri Leví niyanu quiquiaari. Leviiri Melqui niyanu quiquiaari. Melquiiri Jana niyanu quiquiaari. Janaari José niyanu quiquiaari. ²⁵Joseeri

Matatías niyanu quiquiaari. Matatíasri Amós niyanu quiquiaari. Amósri Nahúm niyanu quiquiaari. Nahúmri Esli niyanu quiquiaari. Esliiri Nagai niyanu quiquiaari. ²⁶Nagairi Maat niyanu quiquiaari. Maatri Matatías niyanu quiquiaari. Matatíasri Semei niyanu quiquiaari. Semeiri Josec niyanu quiquiaari. Josecri Judá niyanu quiquiaari. ²⁷Judaari Joanán niyanu quiquiaari. Joanánri Resa niyanu quiquiaari. Resaari Zorobabel niyanu quiquiaari. Zorobabelri Salatiel niyanu quiquiaari. Salatielri Neri niyanu quiquiaari. ²⁸Neriiri Melqui niyanu quiquiaari. Melquiiri Adi niyanu quiquiaari. Adiiri Cosam niyanu quiquiaari. Cosamri Elmadam niyanu quiquiaari. Elmadamri Er niyanu quiquiaari. ²⁹Erri Jesús niyanu quiquiaari. Jesúsri Eliezer niyanu quiquiaari. Eliezerri Jorim niyanu quiquiaari. Jorimri Matat niyanu quiquiaari. ³⁰Matatri Leví niyanu quiquiaari. Leviiri Simeón niyanu quiquiaari. Simeónri Judá niyanu quiquiaari. Judaari José niyanu quiquiaari. Joseeri Jonam niyanu quiquiaari. Jonamri Eliaquim niyanu quiquiaari. ³¹Eliaquimri Melea niyanu quiquiaari. Meleari Mena niyanu quiquiaari. Menaari Matata niyanu quiquiaari. Matataari Natán niyanu quiquiaari. ³²Natánri David niyanu quiquiaari. Davidri Isaí niyanu quiquiaari. Isaiiri Obed niyanu quiquiaari. Obedri Booz niyanu quiquiaari. Boozri Sala niyanu quiquiaari. Salaari Naasón niyanu quiquiaari. ³³Naasónri Aminadab niyanu quiquiaari. Aminadabri Admin niyanu quiquiaari. Adminri Arni niyanu quiquiaari. Arniiri Esrom niyanu quiquiaari. Esromri Fares niyanu quiquiaari. Faresri Judá niyanu quiquiaari. ³⁴Judaari Jacobo niyanu quiquiaari. Jacoboori Isaac niyanu quiquiaari. Isaacri Abraham niyanu quiquiaari. Abrahamri Taré niyanu quiquiaari. Tareeri Nacor

niyanu quiquiaari. ³⁵Nacorri Serug niyanu quiquiaari. Serugri Ragau niyanu quiquiaari. Ragauri Peleg niyanu quiquiaari. Pelegri Heber niyanu quiquiaari. Heberri Sala niyanu quiquiaari. ³⁶Salaari Cainán niyanu quiquiaari. Cainánri Arfaxad niyanu quiquiaari. Arfaxadri Sem niyanu quiquiaari. Semri Noé niyanu quiquiaari. Noeeri Lamec niyanu quiquiaari. ³⁷Lamecri Matusalén niyanu quiquiaari. Matusalénri Enoc niyanu quiquiaari. Enocri Jared niyanu quiquiaari. Jaredri Mahalaleel niyanu quiquiaari. Mahalaleelri Cainán niyanu quiquiaari. ³⁸Cainánri Enós niyanu quiquiaari. Enósri Set niyanu quiquiaari. Setri Adán niyanu quiquiaari. Adánri Pueyaso niyanu quiquiaari.

**Samaruhua jiyaniijia
saniniujiushacari Jesu
(Mt 4.1-11; Mr 1.12-13)**

4 ¹Jesu quiasacariuhua Jordán moojiniji, Pueyaso Sohuanuuri noojiajinia quiriquiaa puetunu na cumaacajanaa na jiitianura. Pueyaso Sohuanuuri na jiyatequiaari pueya jiyahui cariquia jiyajiniara. ²Tii camueenujuquiaariiri cuarenta juuca. Sesaacaari tii na saniniujiuriquiaa. Majaari quenaaja casaa na miaquenu quiquiaari tii na quishacari. Na nuhuaji miaajequiaariiri. ³Jiyacaritij, Sesaacaari na sequeree: —Quiaa jaara seetanujuanaa Pueyaso Niyanu quiri, nio saajia quia jataniri neecaruura na quiniuria.

⁴Jesuuri saaja na riuquaree:

—Pueyaso Rupaajinacuajaari naa naajiotasano quiya:

“Pueyanoori maja saminio na quiniu saa miaquesanotaja. Seetanujuanaa saminio quiyari na tojishacari puetunu Pueyaso Rupaajanaa”.

⁵Na nuhuaji, Sesaacaari Jesu jiyataaree jiyanhua jiyaconaja tuhuananuucua.

Sesaacaari ritia niquitirii Jesu puetunu mijiria jiyacajanaa. ⁶Jesu sequereeri:

—Janiya quia niquitionutaniya puetunu nio jiyaca jiyaniijianucua cumaacajanaa-ni, maninia jiyaniijiajanaa quia quiniuria mijiria. Janiyari puetunu nio jiyacajanaa niquitosaaquiaarini. Naacujitij, janiyari cumaaca niquitioquiaani cana cua niquitionu paniyacuajani, jiyaniijiaara na quiniuria. ⁷Puetunujanaari quiara quiniutianiya, quiaa jaara cucuara mojoquetare quia shuquiritianura janiya.

⁸Jesuuri saaja na sequeree:

—Pueyaso Rupaajiniacuajaari naa naajiotasano quiya:

“¡Quia Jiyaniijia Pueyaso quia shuquiritiare! ¡Saaja nojuaja quia tojiri!”

⁹Na nuhuaji, Sesaacaari Jesu jiyataaree Jerusalén tiacajinia. Na tacaniriiri Pueyaso Secojoua tia cacojiria, jiyocua-canu. Jesu sequereeri:

—Niiquiji quia jaataare jiyocua, quiaa jaara seetanujanaa Pueyaso Niyanu quiri. ¹⁰Pueyaso Rupaajiniacuajaari naa naajiotasano quiya:

“Pueyasoori na seya sequenutaniya na cojuanura quiajaniya. ¹¹Nojoriiri quia quianutaniya, saajiaacua quia jiriataaquiniucujaji”.

¹²Jesuuri na riucaree saaja:

—Naa naajiotasano quiyajaariuhua Pueyaso Rupaajinia:

“Maja quia Jiyaniijia Pueyaso quia saniniujiuniu”.

¹³Sesaacaari naa Jesu saniniujiuniu puecaquiaari puetunujanaa. Majaari quenaaja na naata quiriquiaa sesa na miitiniuria. Naaratej, rupaquijia na tarinitiaquiaari tamacaririari.

**Jesu coteesacari na poonijosano
miiniu Galilea jiyajinia**
(Mt 4.12-17; Mr 1.14-15)

¹⁴Na nuhuaji, Jesuuri tacatequiaariuhua Galilea jiyajinia puetunu Pueyaso

Sohuanu cumaacatajanaa. Puetunu cuno jiyajiniajanaa pueyari Jesujiniji caminiujiutiooquiaari. ¹⁵Jesuuri Pueyaso secojoua tiajiniaqueya niishitiojoquiaari puetunu tiacajiniajanaa cuno jiyajinia. Puetunu pueyajanaari na timitiaja.

Jesu quishacari Nazaret tiacajinia
(Mt 13.53-58; Mr 6.1-6)

¹⁶Jiyacaritij, Jesuuri quiaquiaari Nazaret tiacajinia, tee na canashitishaa-quiaaricuajani. Samaatenu juuca, Jesuuri Pueyaso secojoua tiajinia tiuquiquiaari taa na jiitiquiaari miiniucujani. Nojuajaari nujuaquiaari Pueyaso Rupaa serojonura pueya niquiara. ¹⁷Pueyari na niquitioree tariucuacaanu Pueyaso sequesano caminiujiunia Isafas naajionee jiuniososano, pueya niquiara na serojosocoriquiano. Jesuuri na saacartaree. Serojonu coteereeri tee nio naajiotasano quiyacuajani:

¹⁸“Pueyaso Sohuanuuri coojiajinia quiyani, na cumaaca cua jiitianura. Naacujitij, Pueyasoori cua seeratarucuaa maninia rupaa cua pohuatanura casamiijiuniucua pueya niquiara. Cua jiyaroreejaa-riuhua Sesaaca quioosano pueya cua pohuatanura maninia rupaa Pueyasojiniji. Naacujitij, nojoriiri cartesano quiriohua Sesaaca sapojosanojiniji. Cua jiyaroreejaa-riuhua cariojuarujuri pueya namijiaa cua jeecanura, maninia niquijiaara nojori quiniuhua. Cua jiyaroreejaa-riuhua taraatia miitia-susano pueya cua jiyatenura shuquiriaatia quijiacara. ¹⁹Cua jiyaroreejaa-riuhua cua pohuatanura pueya niquiara, quiarijiaari Jiyaniijia Pueyaso jiyanooshacari pueya”.

²⁰Na serojonu nuhuaji, Jesuuri naajionee jiuniosorohua. Na niquitioro-

hua na cojuanaari. Jesuuri cajiriohua. Puetunu pueyajanaari tacuriitia na shootiatuquiquiaa. ²¹Jesuuri juhuacatecara pocuarohua. Naa sequereeri:

—Quiarijiani, Pueyaso Rupaajinia nio naajiotasanoori tari tohuateeree nia niquiara.

²²Puetunu pueyajanaari jiuujiateeree shanohua Jesu pohuatasano nojori tojishacari. Naaratej, nojoriiri maninia pocoojoriquiaa Jesujiniji. Tama nojorijiaarijia nequesoreetooriquiaa:

—¿Majate nio pueyano José niyanucua-ja, niya pa tiacajinia maashiniotej?

²³Jesuuri nojori sequereeri:

—Niaa jiyoteeri cua sequenu paniya nio tariucuaaanu sequesano: “Naarajonanaa, tama quia cuaqueyajaaja quia naarajore”. Niaari naa cua sequenu paniya jiyajeneta casaa cua miiniuria cua cumaacata niya tama cua tiacajiniaajaani, taa nia tojiquianucuaa cua miishanojiniji Capernaum tiacajiniacuaani.

²⁴Jesuuri socua sequereeri:

—Seetanujuanaa nia sequeyanijia, puetunu Pueyaso sequenu panishano caminiujiuniaajanaari tojishoo quijia, tama nojori tiacajiniaajaaja. ²⁵Supuetana Elías quishacari, queraatia mashiquio-pueeri quiquiaari Israel jiyajinia. Jiyanoehua miaajesacari quiquiaariiri maru niyaquishacari pueyaracaanu. Jiuujianaraca marijiaari shocojoquiaari socua seis racanio, maru niyaquishacari.

²⁶Naajaa, majaari Pueyaso jiyaronu quiquiaari Elías narta Israel jiyajinia quiniiaa mashiquioocua. Pueyaso cutaraari na jiyaroquiaari taatu mashiquioocua Sarepta tiacajinia, Sidón tiaca shuriucua. Naacuaajitij, cuno taatu mashiquioori miaquesano jiitiaquiaari pueyaracaanu cutara, Elías na mianuutesacari miaajenu quishacari pueyaracaanu. Elías quiniuucua Pueyasooocua tiuujia, cuno taatu

miaquesanoori maja na pueetanu quiquiaari nojoriria. ²⁷Naajuhuaaj, supuetana Eliseo quishacari, queraatia leprata cusosuhuari quiquiaari Israel jiyajinia. Majaari quenaaja tamonu nojorijinijinio naatanishaanu quiquiaari Eliseo jiitiasano Pueyaso cumaacata. Saaja cuno tahue Naamánri naatanishaa-quiaari cutara, Siria jiyajinijinio pueyanoni.

²⁸Pueyaso secojojua tiajinia quiniiaa pueya tojishacari naa Jesu pohuatasano-tej, puetunu nojorijianaari jiyanoehua juaaquioree. ²⁹Nojoriiri saneecuatuquee. Jesu caponeeturee nojori tiacajiniiri. Nojoriiri Jesu jaatucuquiaari socua jiyocuacaanu nojori quijia tuhuananujinijiria, teyanoocua nojori tiaca tiasano quiquiaaricuajani. Nojoriiri na capotunu paniriquiaa juucua tajojiyaji naa na monura. ³⁰Jesuuri saaja nojori tajiniaaco canujuquiaari juhuajaniya. Quiniquiji tamocora quiaareeri.

Samaruraca pueyanojiniji pohuatasano

(Mr 1.21-28)

³¹Jesuuri Capernaum tiacajinia quiaquiaari, Galilea jiyajinia tiaca. Samaatenu juuca, Jesuuri pueya niishitiojoriquiaa. ³²Nojoriiri jiuujiateeree na niishitiojosano nojori tojishacari. Na niishitiojosanoori seetanujuanaa cumaacaraca quiquiaari juhua jiyaniijia niishitiojosano, maja juhua nareja rootasano caminiujiunia.

³³Pueyaso secojojua tiajinia, samaruraca pueyanoori jiyacari tii quiriquiaa. Na niquishacari Jesu, naa jiyanoehua nacareeri:

³⁴—iNazaret tiacajinijinio Jesunaa! ¿Taa quia miiniu paniya canaani? ¡Canaa quia niquiri nareja! ¿Quiaate tari niyaree canaa saniitionuucua? ¡Quia niishiyacuanijia, cante quiajaniani! ¡Quiaacuajaari sesa miyashijia Pueyaso Nyanu!

³⁵Jesuuri samaru sequeree:

—¡Quia sanaajere! ¡Quia tohuatare nio pueyanojiniji!

Samaruuri pueyano pojotequee puetunu pueya niquiarajanaa. Pueyanojiniji tohuataqueeri. Majaari na nuhuajiria sesa na miiniu quirii pueyano. ³⁶Puetunu pueyajanaari shiriqitiurii. Tama Jesujiniji sequetooreejaaria:

—¡Nia tojiri! ¿Taamueca rupaatucuaa-nojoni? ¡Nio pueyanoori samaruhua jiyaronu niishiya juhua jiyaniijia! ¡Na rupaari jiyanhua cumaacaraca! ¡Cunora samaruhua tohuataniriri!

³⁷Puetunu cuno jiyajiniajanaa, Jesu miishanojinijiiri caminiujishaaquiaari pueya niquiara.

Jesu naatanishacari
Simón Pedro reyarucua
(Mt 8.14-15; Mr 1.29-31)

³⁸Jesuuri Pueyaso secojojua tiajiniji tohuareetaquiaari na pueyata. Quiojiyareeri. Simón tiajinia tiuqitiushiiri. Simón reyarucuaari jiyacari jiyanhua naseeca matariquiaa. Pueyari Jesu sequeree na naataniniuria. ³⁹Jesuuri cusosu caco nujasee. Jesuuri na naseeca cusonu jiyaroree. ¡Na naseecaari ritia shinitiaquee! Tariucua jiyotuucari jiyacari sanemaa, na tiajinia quiniaa pueya na mianuutenura.

Jesu naatanijiosacari queraatia cusosuhua
(Mt 8.16-17; Mr 1.32-34)

⁴⁰Panaru tiuquishacari, puetunu pueyajanaa, cante cusosuhua jiitiaquiaarini, nojoriiri na jiyataquiaari Jesuucua. Jesuuri na juaashiquia niaquiaari puetunu cusosuhacuajanaa. Nojoriiri queraatia tamaatia cusonu jiitiaquiaari. Jiyacari na naatanijioree puetunujuanaari. ⁴¹Naajuhua, queraatia samaruhuari tohuareetaquiaari cusosuhujiniji. Samaruhuari naa nacaquiaari Jesuucua:

—¡Quiaacuaja Pueyaso Nyanu!

Jesuuri nojori juaarii. Majaari na shanacunu quirii nojori pocuanura, nojori mariqui pueya niquiara pohuatareeri, nojuajaari Pueyaso Jiyarosano.

Jesu pohuatasacari Pueyaso rupaa
Pueyaso secojonuujua tiajiniaqueya
(Mr 1.35-39)

⁴²Tariquicuaji, Jesuuri tiacajiniji quiaquiaari tamaquicuata tamajaaja. Pueyari na pajequiaari. Nojoriiri socua nocua tiuquijioquiaari na pajenuusacari. Majaari nojori cartenu paniniu quiquiaari Jesu quianura cuniquiji. ⁴³Jesuuri nojori sequeree saaja:

—Janiyari jiyarosaaquiaarini pueyapue niquiara cua pohuatanura quiarinio Pueyaso Rupaa. Quiarijiani, Pueyasoori pueya jiyanoonu pania, nojori quiniuria na pueya, nojori tiushacari nocua. Naaratej, janiyari na rupaa pohuatanura quianu pania tamonu tiacajiniajanihuahaj. Janiyacuajaari cunora jiyarosaaquiaarini.

⁴⁴Naacuajitij, Jesuuri puetunu Judiocuaca jiyajiniajanaa rucanejoquiaari Pueyaso rupaa pohuatanura puetunu Pueyaso secojonuujua tiajiniaqueyajanaa.

Sapitiaajara jaquerootanaa
shiriqitiushacari
(Mt 4.18-22; Mr 1.16-20)

5 ¹Tamacari, Jesuuri caminia casaqueyaji quiriquiaa na pueyata. Jesuuri Pueyaso rupaa pohuatariquiaa. Puera jiyanhua pueyari nocua catecanoquiaari catecaji na tojitianura nojuaja. Nojoriiri Jesu tanuujuriquiaa puera. ²Jesuuri caapiqui bote niquirii caminia casaqueyaji. Shaama quiriquiaari. Na camaruhuari na shuriucua jeequejonuuriquiaa na shiyaruhua. ³Jesuuri Simón botejinia tacaquiaari. Simón sequereeri cuaara bote juaariocotaara caminia

jiuujiajinia naata. Na nuhuaji, Jesuuri cajirii. Quiniquiji pueya niishitiojonu coteequiaari-ri. ⁴Jesu jaara niishitiojonu puecaquiaari, Simón sequereeri:

—Querónijinia pa jaaretaare. Niocua tii jartasee nia shiyaruhua sapitiaajara.

⁵Simónri na riuacuaree:

—Niishitiojonanaa, canaacuajaari tari jaquerootariquiaa najuhuanani. Canaari naajaa nocua juhuaquemaani. iSaa shaa quiriquiaanojua! Naajaa, quiaacuaja na sequeya, socua canaa jaquerootarohua-cuaraquij.

⁶Nojori jaara socua na shiyaruhua jartaquiaariuhua, ijiyanohua queraatia sapitiaaja ritiatureeri! Shiyaruhuari sureequetanu coteequiaari. ⁷Nojoriiri jatiqui nata poonijionaa piinioree bote tarajanujinia quiyano, nojori niniuria na naacutanura. Nojoriiri ritia nimiaa. Cuno caapiqui bote mishinijioturee sapitiaaja-taari. iQuera tiuquitiariquiaari queraatia sapitiaajata! ⁸Simón Pedro niquishacari naa Jesu miishano nojoririatej, Jesuucua-ra mojuquetareeri. Jesu sequereeri:

—iJiyaniijianaa, maja cua ruپuenu socua! Janiya puera sesa pueyanoni quia ruپuena cua quiniuria.

⁹Simónri shiriquiriri, jiyanohua queraa-tia sapitiaaja nojori quiasacari. Nata quiniaa pueyari shiriqutiurijiuuhua.

¹⁰Cuno pojoritia quiriquiaajaariuhua Zebedeo niquiohua, Santiago, Juannio. Nojoriiri Simón cojiniaa quiquiaari. Jesuuri Simón sequeree miriqui:

—Maja puerenu. Quiaari saniniuujia pueya quioojua quiniutianiya juhua sapitiaaja.

¹¹Nojori shiitiasacari, nojoriiri puetunu na casaajanaa tiujiaquiaari Jesuta nojori quiojonura.

Jesu naatanishacari lepraraca cusosu

(Mt 8.1-4; Mr 1.40-45)

¹²Tamonu tiacajinia Jesu quishacari, lepraraca cusosu pueyanoori tii quiquiaa-

ri. Na niquishacari Jesu, nocuara jacamareeri. Jesu sequereeri:

—Jiyaniijianaa, quiaa jaara paniri, quia naata cua naataniniu cua cusunujiniji.

¹³Jesuuri na quiaree. Na sequereeri:

—Taaquiririniji. Quia naataniniu paniyanijia. Quia cuaqueya cuaara jeequehuara.

Naa na sequesacaritij, na lepraari shaajequee na cuaqueyajiniji. ¹⁴Jesuuri na rootaree maja na pohuatanura na miishano tamasaca niquiara. Na sequereeri:

—Saaja pueyacuara secojonaa jiyaniijia quia niquitishii quia cuaqueya, na cartenuhuara quiajaniya, pueya tajinia quia rucuanefonuhua juhuajaniya. Naajuhua, quia seru quia niquitiose Pueyasooacara catijasocoriquiano. Naa quia miiri taa Moisés rootaquiaaricuajani, puetunu pueyajanaa niishiniuria quiaa tari jeequerohua quia cusunujiniji.

¹⁵Maninia Jesu miishanojinijiri jiyanohua socua tamaquicua caminiuju-shaaquiaari pueya niquiara. Naaratej, jiyanohua queraatia pueyari nocua nijioquiaari na tojinia, mariyata Jesu naatanijionura nojori, nojori cusunujiniji. ¹⁶Jesuuri saaja pueya quiaquishaqui quiaquiaari na Que Pueyaso na secojonura. Nojuajaari naa pueyaracaanu miiquiaari.

Jesu naatanishacari cumatacuruhuana cusosu

(Mt 9.1-8; Mr 2.1-12)

¹⁷Tamonu juuca, Jesuuri pueya niquiara niishitiojoriquiaa. Na tojtianaa tajinia cajitiuriquiaajaariuhua Fariseocua-ca, Moisés Rootasanojiniji niishitiojonaanio. Nojoriiri nijioquiaari puetunu Galilea jiya tiacajiniijianaa, Judea jiya tiacajiniji, Jerusalén tiacajinijio. Jesuuri jiyanohua Pueyaso cumaaca jiitiariquiaa cusosuhua na naatanijionura.

¹⁸Jiyacaritij, socua pueyari tiuquiiijio-quiaari. Nojoriiri cumatacuruhuana cusosu patariquiaa na matujinia. Nojoriiri juucua na tiuquitianu paniriquiaa tiajiniaaco Jesuucua. ¹⁹Puera queraatia pueya rerejosacari tohuateyaji, majaari na naata cusosu tiuquinitiasaanu quiquiaari. Nocuaji, nojoriiri tia cacojiria tacanitiaquiaari cusosu. Cuno pueya tiaca tucuruuri quiquiaari marauneeca majeetejosano. Nojoriiri tia nijinia papataquiaari. Na nuhuaji, nojoriiri cusosu roshinitiaree cuhuocojiniji na matujinia, Jesu nujuasaqui pueya tajinia.

²⁰Jesu niquishacari taa nojori tiuuriquiaa nocuani, cunora Jesuuri cusosu sequeree: —Pueyanonaa, quiaacuaja tari jiyanooshaaree sesa quia miishanojiniji.

²¹Naa Jesu sequesacaritij, Moisés Rootasanojiniji niishitiojonaa, mariyata Fariseocuaacari naa niishiriojonuuriquiaa: “¿Cantejaara cuno pueyanoni? ¡Nojuajaari tama na cuaqueyajaaja jiyateya juhua Pueyaso na quiniuria! ¡Pueyanoori maja na naata tamonu pueyano jiyanooni sesa na miishanojiniji! ¡Saaja Pueyaso cutaraari na naata pa jiyanooni!”

²²Jesuuri naa nojori niishiriojosano niishiriquiaa. Cunora, nojori sequereeri:

—¿Casaara naa nia niishiriojiyani? ¿Niaateeri cucuaji taacanuyajaa?

²³Janiyara, maja jiyajeneta cua sequenura: “Quiaari tari jiyanooshaaree sesa quia miishanojiniji”. ¿Jiyajenetatejaariuhua sequenura: “Quia sanere. Quia rucuanere”? ²⁴Cunora, janiyari quiarijia nia niishitiniutianiyani, janiyari mijiria jiyarosaaquiaarini pueya cua jiyanooni sesa nojori miishanojiniji.

Naacujajitij, Jesuuri cumatacuruhuana pueyano sequeree:

—Cua tojiri. ¡Quia sanere! ¡Quia matu quia pataarohua quia tiajinia!

²⁵Jiyacaritij, pueyanoori sanequee nojori niquiara. Na tiajinia pataarohua na

matuuri. Shuquiriaatia quiariquiohua na tiajiniohuari Pueyaso na maniniuhua-queetanuta. ²⁶Puetunu pueyajanaari shiriqitiuri. Nojoriiri Pueyaso maniniuhuaqueetariquiaa cuno maninia casaa nojori niquiniuucua. Nojoriiri na puerenuta naa sequetuquiaarijuhuaj:

—¡Paari quiarijia jiyanoohua maninia miishano niquiriini! ¡Nocuaji jiuujiatesano!

**Jesu sequesacari Leví,
na pueyano na quiniuria
(Mt 9.9-13; Mr 2.13-17)**

²⁷Nio nuhuaji, Jesuuri tohuataquiaari. Tamonu pueyano niquiriiri jiyaniijiajanaa Césarra cumaneeca masejosaqui cajiyanu. Na sesa quiquiaari Leví. Jesuuri na sequeree:

—¡Cua nuhuajiri, cua pueyano quia quiniuria!

²⁸Jiyacaritij, Leviiri ritia sanequiaari. Puetunu na jiitiasanojuanaa tiujaqueeri. Jesuta quiaqueeri.

²⁹Na nuhuaji, Leviiri jiyanoohua queraatia sumatuquiaari na tiajinia, Jesu na queranacutanura. Queraatia narta cumaneeca masejonaari tii quiriquiaajaa-cuhuj. Nojoritia miaquejajinia cajituriquiaari, socua tamasaca pueyano. ³⁰Moisés Rootasanojiniji niishitiojonaa, mariyata narta Fariseocuaacari juhuacatecara Jesu pueyacuara rimiaaquenu coteequiaari. Nojoriiri naa Jesu pueya sequeturee:

—¿Casaara cuno sesa pueyata nia miaqueyani, nia ratuyani, tama parta pueya tacartajacatajaajanio? Nojoriiri pa paraa sequera cumaneeca masejona.

³¹Jesuuri nojori riucuarere:

—Cante na cuaqueya jiyaniyani nojuaja maja cusosu na quini, nojuajaari maja naarajona na paniniu. Cusosuhua cutaraari naarajona paniya. ³²Naajuhuj, majaari mijiria cua niniu quiquiaari

maninia miijia pueyacua. Niquiaari cutaranijia sesa miijiaca cua tacatonu-huara Pueyasocua, maninia miijia nojori quiniuria.

Pueya nequesotasacari Jesu, casaara na pueya carteyaquiya miaquenu quenaajani Pueyaso nojori secojonura
(Mt 9.14-17; Mr 2.18-22)

³³Pueyari Jesu sequeeree:

—Tiuquinijiona Juan pueya cutaraari sequeyarucua miaqueyaquiquiaa. Nojoriiri naa Pueyaso secojoquiaa pueyaracaanu. Fariseocuaaari naa miiquiaajuhujaj. Quia pueya saniniujia, saaja miaquequiaari, ratuquiaari. ¿Casaarateni?

³⁴Jesuuri nojori riuquaree:

—Pueyano camishacari maaji, majaari masuusano pueya miaajenu, camiriquiano pueyano jaara nojoritia qiyajaa.

³⁵Tamacari, camiriquiano pueyano jaara jaariutiasaare nojori tajiniji, jiyacariti nojori cutaraari miaqueyaquiniutianiya. Naajuhujaj, janiyari cua pueya tajiniji jaariutiasaanutaniyani. Jiyacariti nojori cutaraari miaqueyaquiniutianiya.

³⁶Jesuuri socua nojori niquiara pohuataquiaari nio miriqui sequesano:

—Majaari pueyano miatenu quijia na toque quiariquijiniji, na toque mocua cuhuoco na cushipirijiotajara. Saniniujia, jaara naa miiritiji, na toque quiariqui sesoyari. Quiarinio toquerauri sesoshiyajuhujaj, toque mocuajinia na posequesacari. Cua rupaari naajuhujaj, juhua quiarinio toque. ³⁷Naajuhujaj, majaari na naata quiariniaacu uva caaca mishinishaanu shoque tariucucujinia, tariucucaco shoque mariqui pojuaretareeri, uva caaca jaara jerema vino na quiniuria. Jaara naa miishaaretej, vinoori najuhuana niitiashiya. Shoqueeri najuhuana sesoshiyajuhujaj. ³⁸Naaratej, maninia cutaraari quiariniaacu uva caaca

shuujionu shoque quiariquiojinia, maja vino niitiasaanuucujaj, na quiquio shoquenio. Naajuhujaj, nia niishitiojosanoori juhua tariucucaco shoque.

³⁹Naajuhujaj, pueyano jaara vino tariucuanacu ratujua quiri, majaari na paniniu quiariniaacu vino. Sequeyari: “Tariucuanacuuri maniniacuaja”. Naajuhujaj, majaari cua niishitiojosano nia paniniu, quiarinio na quiniucua.

Jesu pueya carojotasacari trigo samaatenu juuca
(Mt 12.1-8; Mr 2.23-28)

6 ¹Tamonu samaatenu juuca, Jesuuri trigo* cuhuariquiajiniaaco quiojoriquiaa na pueyata. Na pueyari trigo carojotariquiaa. Nojoriiri na juaashiquiajinia na shuuquiojoriquiaa na corequetanura. Na nuhuaji, na jajau miojonuuriquiaari. ²Fariseocuaaari na niquitariquiaa. Nojoriiri Jesu pueya juaari:

—¿Casaara nia tojitiaaquiya Moisés Rootasanoni, taa na sequequiaaricujani maja pa poonijionura samaatenu* juuca?

³Jesuuri nojori riuquaree:

—¿Majateeri nia serojonu quiquiaacua-ja casaa supuetana David miiquiaari na miaajesacarini, mariyata na cojiniaa miaajesacarijiuhujaj? ⁴Nojuajaari Pueyaso Secojojua tiajinia tiuquiquiaari. Pueyasora niojosano pan* pooquiaariiri. Na sareeri. Mariyata nata quiniaa niquitiojoreeri nojori sanurajuhujaj. Cuno panri sequesaaquiaari saaja pueyacuara secojonaa sasocoriquiano. Naajaa, Davidri na saquiaari. Majaari Pueyaso juaanu quiquiaari naa David miiniucua.

⁵Jesuuri socua cuno Fariseocuaa sequesquiaari:

—Janiyacuaajaari Pueyaso Jiyarosanoni. Jiyaniijiaari jiyatesaaquiaarinijia cua sequenura casaate samaatenu juuca miishiyani, Pueyaso pa shuquiritiniuria.

**Jesu jeecasacari pueyano juaashiquia,
cuseetucojuara joojequetano**
(Mt 12.9-14; Mr 3.1-6)

⁶Tamonu samaatenu juuca, Jesuuri Pueyaso Secojojua tiajinia tiuquiquiaari. Tii niishitiojoriquiaari. Quiniqui quiriquiaari pueyano, cuseetucojuara joojequetano na juaashiquia miaquetajara. ⁷Moisés Rootasanojiniji niishitiojanaa, mariyata Fariseocuacaari Jesu shanacutariquiaa. Nocuara tonujunu paniriquiaari Jesu jaara cuseetucojuara joojequetano juaashiquiaraca pueyano jeecare samaatenu juuca. ⁸Jesuuri tari niishiriquiaa taa nojori niishiriojoriquiaani. Jesuuri cuno rimiajatucojua pueyano sequeeree:

—iQuia sanere! iNiya quia nujuasee pueya tajinia!

Pueyanoori sanequee. Nujuaseeri tee Jesu sequequiaari na nujuanuracuajani. ⁹Jesuuri nocuara tonujunu panijiaa pueya sequeeree:

—Nia nequesotareeraj. Cua sequeere, ¿taa pa niishitiojosaaquiaari Moisés Rootasanojinijini? ¿Paate maninia miya samaatenu juucani? ¿Paate sesa miya soj? ¿Cusosuhuate naatanijioshiya, puetushi-yajanaa monu soj? ¿Taa nia sequeyani?

¹⁰Jesuuri puetunu na shocuaqueya quiniaajanaa niquinijioree. Na nuhuaji cusosu sequeereeri:

—iQuia juaashiquia quia shiitioree!

Pueyanoori na juaashiquia shiitioree. iNa juaashiquiaari ritia jeequequee!

¹¹Cuno pueyari jiyanhua juaaquioree naa Jesu miishacaritij. Nojoriiri naa pocoojoquiaari tamajaaja: “¿Taa pa miiniutianiya socua cuno Jesuurini?”

**Jesu saquiriojosacari doce pueya na
jiyaramiquishocoriquiano**
(Mt 10.1-4; Mr 3.13-19)

¹²Jiyacaritij, Jesuuri tamonu tuhuana-nuucua quiaquiaari, Pueyaso na

secojonura. Puetunu niucujanaa secojoriquiaa Pueyasoori. ¹³Jaara juhuaquequiaari, Jesuuri na tojitiajaca pueya sequequiaari nocua nojori nijionura. Puetunu nojorijinijiniojuanaa, Jesuuri nareja doce pueya saquiriojoquiaari. Nojori sesojoreeri, “cua jiyaramiquishocoriquiano pueya”. ¹⁴⁻¹⁵Nioori Jesu saquiriojosano pueya sesaca: Simón. Jesuuri na sesojoquiaarijuhua “Pedro”. Simón tarajanu Andrésri saquiriojosaaquiaarijuhuaj, mariyata Santiago, Juan, Felipe, Bartolomé, Mateo, Tomás, Alfeo niyanu Santiago, socua tamonu Simónnio. Nojuajaari Celote maanujiniji pueyano quiquiaari. ¹⁶Santiago niyanu Judasri saquiriojosaaquiaarijuhuaj, Judas Iscariotenio. Nojuajaari quiquiaari Jesu quiateriquiano mosocoriquiano.

Jesu niishitiojosacari queraatia pueya
(Mt 4.23-25)

¹⁷Na nuhuaji, Jesuuri tuhuananujiniji rosetaquiarihuua na saquiriojosano pueyata, jamatujiniara. Cuno jamatujinia, queraatia na nuhuajiniaa pueyari tari nocuaji quiriquiaa. Mariyata jiyanhua queraatia pueyari tii quiriquiaa puetunu Judea jiyajinijinio, Jerusalén tiacajinijniojuhuaj, shoniniacu caminia shuriuquiumia quijiacajinijinio pueyanio. Saaja nio pojoriiri quiquiaari Tiro tiacajinijinio, mariyata Sidón tiacajiniji pueyanio. Puetunu cuno pueyajanaari cuniquiria nijioquiaari nojori tojinuria Jesu, na cusonujiniji nojori naatanijiosaanurajuhuj. Jesuuri nojori naatanijioree. ¹⁸Naajuhuj, taraatia samaruhua miishano pueyari naatanijiosaaquiaarijuhuaj. ¹⁹Puetunu cusosuhujanaari Jesu quianu paniriquiaa, naatanijiosano nojori quiniuria. Jesu cumaacaari jiyanhua poonijioriquiaa. Naaratej, puetunu pueyajanaari naatanijiosaariquiaa, saaja nojori quiasacari nojuaja.

**Jesu pohuatasano shuquiriaatia quijiajiniji,
taraatia quijiajinijinio**

(Mt 5.1-12)

²⁰Na nuhuaji, Jesuuri na pueya niquiriri na pocuanura. Naa sequeereeri:

—Niaari Pueyaso shuquiritiasano, niaa jaara niishiriquia nioojia saaja sesa mijia. Naa jaara niishiri nioojia naa quiyatej, niaari Pueyaso jiitiasano pueya quiniutianiya.

²¹Niaari Pueyaso shuquiritiasano, niaa jaara maninia mijia quiniucua jiaatiaa, taa miaajeyano pueyano miaquesanoocua jiaatiaacuaani. Naa jaara naa quiniucua jiaatiaa, Pueyasocuaajaari nia jataniniutianiya maninia quijia nia quiniuria.

’Niaari Pueyaso shuquiritiasano, niaa jaara sesa nia miiniu nuhuaji taraajequiaa. Niaari na nuhuaji saroojonutaniya nia shuquiriniutia, niaa jaara jianooshaarohua.

²²Niaari Pueyaso shuquiritiasano, pueya jaara nia niquiniu paniyaquiri, pueya jaara nia taanuure, pueya jaara nia macaatiri, pueya jaara nia soore cua tojjia nia quishacari. ²³Naa jaara naa miishaaretej, jiyano hua nia timiri. Naa jaacuatare nia shuquiriniutia. Naa jaara naa nia miishacari rejeretajaca quiri, Pueyasoori nia niishishoo casaa racatasano jiitiaa jiyocuacaanu, na niquitioscoriquiano niajaniya. Naa paraa supuetanaari nia taraatia miiquaari tariucuacaanu Pueyaso sequenu panishano caminiujiunaa pueyajuhua.

²⁴Niaari saniniujia taraatia quijia quiniutianiya, jamuejaca casamiriaca pueyanaa. Naa cuajaari tari shuquiriaatia quiquianu, puetunu nia panishanojuanaa nia jiitiasacari.

²⁵Taraatia quijiaaari niajaniya, cante sequejani: “Janiyacuaa maninia pueyanoni. ¿Janiyatucua casaara paniri Pueyaso jiyanooniuria janiyani?” Naa

sequejaca pueyanaa, na nuhuaji, niaari niishiniutianiya niaari saaja sesoriquia pueya seque.

’Taraatia quijiaaari niajanijajuhua, jeya nia quiyaquishacari Pueyasora, saaja tamajaaja shuquiriaatia nia quiniuria nia cojesacari pueyaracaanu. Niaari na nuhuaji sapuenutaniya Pueyasooju nia quishacari pueyaracaanu.

²⁶Taraatia quijiaaari niajaniya, puetunu pueyajanaa jaara maninia pohuataquiaa niajanijajiniji, maninia nia cojiniucua cuno pueya, Pueyaso tojiyashijia pueyani. Cuno pojori supuetanaacuaajaari nia shuquiritiaquiaari cuno sapojonuujuaca, canapue te maja seetanujuanaa Pueyaso sequesano caminiujiunaa quiquiaaricua jani.

Pa paraa panijiaa pa quirij

(Mt 5.38-48; 7.12)

²⁷Niajaniya, cante nia cua tojitiaacua jani, cua tojitiuri. ¡Nia paraa nia paniri! Maninia nia miiri nia niquiniu paniyashijia pueya. ²⁸Saaja maninia nia riu cuare nia juayano pueyano. Sesa nia mijia pueyacuara nia secojore Pueyaso. ²⁹Pueyano jaara quia maseca piri, quia jiyanoori nojuaja. Jaara taquijiria pirijihua, socua quia jiyanoori. Majaari na naminiu. Pueyano jaara shiniquiaa cuaji quia cushishano toque jaariutiare, quia cacojoqui quia niquitiorejuhuaj.

³⁰Pueyano jaara quia sequere quia casamijiniji quia niquitionura nojuaja, quia niquitiore nareja. Pueyano jaara quia casaa jaariutiare, majaari na sequenu: “Cua niquitorohua”. ³¹Maninia nia miiri tamasaca, taa nia paniquiaa tamasaca miiniuria niajanijacuanaa.

³²Naa jaara saaja nia panijiaa paniriquia, majaari nia jiyaniinu Pueyasoori nia shuquiritiaa nia nia miishacari. Sesa mijia pueyari naa paniquiaa nojori panijiacajuhua. ³³Maja

puera maninia miihia niajaniya, niaa jaara maninia miiquiaa saaja noo pojori, canapueete maninia miiquiaa niajaniya-cuaani. Sesa miihiaca pueyari naa maninia miiniu niishiquiaajuhua, noo pojori canapueete maninia miiquiaa nojoricuaani. ³⁴Maja puera maninia miihia niajaniya, niaa jaara nia masena niquitioquiaa na panishano, nia niishishacari nojuaja ritia niquitionutanihua niajanijajiniji na masesano casaa. Sesa miihiaca pueyari na casaa rupaquijia-ra niquitioquiaa narta sesa miihia pueyajuhua, na niishishacari nojori ritia niquitionutanihua nojori masesano casaa rupaquijia. ³⁵Nia paniri nia paraa. Maninia nia miiri nojori. Nia casami nia niquitiore nareja, pueya jaara na paniya rupaquijia. Majaari nia taraajenu cuno pueyano jaara nia niquitioyaquiriohua nia casaa. Naa nia miishacaritij, niaari seetanujuanaa Jiyocuacaanu Quijia muerasu. Pueyasoori socua jiyanoehua queraatia nia niquitionutaniya tamasaca nia niquitiosanojiniji. Naaratej, capora nia quiri, taa nia Que Pueyasocuaani. Nojuajaari nareja niquitioquiaa sesa miihiaca pueya, mariyata canapueete na sequeyashijiacani “paacarasho”. ³⁶Naaratej, jiyanootio nia quiri, taa nia Que Pueyasocuaani, jiyanoojia.

**Maja sesa nia niishiriojonu niarta
pueyanooacara
(Mt 7.1-5)**

³⁷Maja nia rimiaaquenu tamasacaacua-ra, Pueyaso mariqui saniniuujia nia jiyanoyaquiriiri. Niaa jaara tamasacaacua tонуjiyashijia quiri, naajuhua, Pueyasoori maja na saneenu quiniutiani-ya sesa nia miishanojuhua. Niaa jaara jiyanootio quiri, Pueyasoori nia jiyanooniutianiyajaacuhua. ³⁸Niaa jaara tamasaca niquitioquiaa na panishano,

Pueyasoori naa nia niquitionutaniya nia panishanojuhua, maninia shanacusano, jiuuquiutiasano, maninia quianujusano, mishaja quera niitiyano. Pueyasoori mariyata juhua nia shanacutajajinia nia niquitionutaniya niajaniya, taamueca shanacutajajinia nia niquitioquiaa pueyacuaani.

³⁹Jesuuri socua niishitiojoquiaari pueya, nio miriqui sequesana:

—¿Cariyojuarute na naata narta cariyojuaru jaatucunu? Naa na jaatucusacari narta cariyojuarutej, nojoriiri mariyata totenutaniya raama. ⁴⁰Pueya-noori maja socua niishijia na niishitiojonajiniji. Jaara puetunu maninia niishitiojosaarejanaa, saaja jiyacariti niishijia quiniutianiyajaariuhua, juhua na niishitiojonaja.

⁴¹¿Casaara nia niquiya rucucua maano quia tarajanu namijiajiniani, niaa jaara puereetuca maca jiitiaa tama nia namijiajiniajaaja? ⁴²Niaa jaara puereetuca maca shanacuya tama nia namijiajiniajaaja, ¿niaatucua casaara sequere quiarta pueyanoni: “Cua tarajanunaa, cuno rucucua pa taquiri quia namijiajiniji”? Sesa jiuujiaracanaa, tama nia namijiajinijiajaaja nia pare coteenu cuno maca. Na nuhuaji cutara nia naata maninia niquiniu, cuno rucucua nia taquiniuria nia tarajanu namijiajiniji. Naaratej, majaari nia rimiaaquenu niarta pueyanooacara.

**Naanaari niishishano na jajaujiniji
(Mt 7.17-20; 12.34-35)**

⁴³Maninia naanaari maja na naata piiquia jajau muetunu. Saniniuujia, sesa naanaari maja na naata shoqueeeca jajau muetunu. ⁴⁴Puetunu naanajanaari maninia niishishano na muetusanojiniji. Majaari pa naata satuna carojonu shuunijajiniji. Naajuhua, majaari pa naata tuhuaracona carojotanu saarianaji-

niji. ⁴⁵Naajuhuaaj, maninia pueyanoori maninia pocuaa cutara, maninia jiuujiaraca na quishacari. Sesa pueyanoori saniniuujia sacuaraatia rimiaaqueja, sesa jiuujiaraca na quishacari. Casaa pa niishirioquiaa poojiajiniani, paari cuno pocuaani.

**Miriqui Jesu pohuatasano cumueeca
jiyajiniji, sasaca jiyajinijinio**
(Mt 7.24-27)

⁴⁶¿Casaara nia sequequiaa janiyani, “Cua jiyaniijianaa, cua jiyaniijianaa”, niaa jaara cua rootasano tojtiaaquiquiaa? ⁴⁷⁻⁴⁸Cua tojiri. Cante cua rupuenara quirii cua rootasano tojjia na quiniuriani, nojuajaari juhua tamonu pueyano cante maninia tiaquiaarini. Cuno pueyanoori coteenu tucuaara jiuutiaquiaari cumueeca jiyajinia na morijiuucuaaji. Na nuhuaji, moo jaara pajaashiquiaari, pajaacaari jiyanojua cajiquiaari cuno tiaacua. Naajaa, majaari na mueturujutana quiquiaari, maninia nujuatejosano na morijiuucua quishacari cumueeca jiyajinia. ⁴⁹Saniniuujia, cante najuhuaana cua niishitiojosano tojiaquiquiaani, na miyaquishacari cua sequesano, cuno pueyanoori juhua tianu niishiyashijia. Cuno pueyanoori sesa tiaquiaari sasaca jiyajinia. Na nuhuaji, moo pajaashishacari, pajaacaari jiyanojua cajiquiaari cuno tiaacua. Cuno tia pojoretaquiaariiri. Pajaari cuno tia niyartaquiaari puetunujuanaa.

Jesu naatanishacari Romano capitán seru
(Mt 8.5-13)

7 ¹Jesu jaara pueya niishitiojonu puecaquiaari, na pueyata quiaaree Capernaum tiacajiniaari. ²Romano* soldadohua capitánri quinqi quijia quiquiaari. Jiyanojua na panishano seruuri cusosu matariquiaa. Quera cusoriquiaari. ³Capitán jaara tojiquiaari

Jesujiniji, nojuajaari Judiocuaca camarucua jiyaramiquiquiaari Jesuucua, nojori sequenura Jesu cuaara niiria nocua na seru na naataniniuria. ⁴Judiocuaca camarucuaari Jesuucua quiojoquiaari. Nojoriiri juhucatecara Jesu secojonu coteequiaari jiyanojua, nojoritia na quianura. Nojoriiri Jesu sequeree:

—Cuno Romano capitánri canaa jiyaroreeni, inojuajaari jiyanojua maninia pueyano! ¡Quenaaja quia miiri na panishano! ⁵Nojuajaari parta Judiocuaca panijia. ¡Nojuacuajaari Pueyaso secojojua tiatequiaari canaara tama na cumaneecatajaaja!

⁶Naacuajitij, Jesuuri nojoritia quiaquiaari capitán tiajinia. Tari Jesu quishacari cateca na tiaacuara, capitánri na rupuenaa pueya jiyaroquiaari Jesuucua, nojori caminiujuniuria na sequesano Jesura. Naaratej, nojoriiri naa Jesu caminiujushii capitán sequesano:

—Jiyaniijianaa, capitán naa sequaya: “Cua Jiyaniijianaa, majaari cua taajetenu paniniu quiajaniya. Janiyari maja maninia pueyanoni cucua quia tiuquiniuria cua tiajinia. ⁷Nocuaji, majaari cua quianu quiyaree janiyajanaa, cua pajenura quiajaniya. Nareja cuniquiji quia sequere cua seru naatanura. Janiyari niishiyani, quiaa jaara naa sequere, cua seruuri naatanutaniuhua. ⁸Janiyari niishiyajaniuhuaaj, cuno cusonuuri quia tojiniutianiya taa cua tojiquiaa cua jiyaniijanucuaaani. Janiyari cua jiyaramiquishano soldadohua jiitiaajuhuaaj. Janiya jaara tamonu sequereni, ‘Quia quiaare’, nojuajaari quiaqueequiaa. Janiya jaara tamonu sequereni, ‘Miji’, ritia nimiaquiaari. Janiya jaara cua seru sequereni casaa na miiniuria, ritia na miyari. Niishiyaniija quiaari jiyano cumaacaracajuhuaaj”.

⁹Jesu tojishacari cuno pojori caminiujushano capitán sequesano, Jesuuri

jiuujiateree. Jesuuri na nuhuajiniaa pueya niquinijoree. Nojori sequereeri:

—Seetanujuanaa nia sequeyanijia, puetunu parta Israel pueyajinijiniojuanaani, imajaari quenaaja cua niquiniu quiquianu Pueyasocua tiuujia pueyano juhua nio tahue!

¹⁰Capitán jiyaramiquishano pueya tiuquijiosacariuhua capitán tiajiniohua, nojoriiri Capitán seru niquishuhua tariucua naatanohua.

**Jesu samiitianishacariuhua
mashiquio niyanu**

¹¹Na nuhuaji, Jesuuri tamonu tiacajinia quiaquiaari. Cuno tiaca sesa quiquiaari Naín. Na pueyari nata quiojoriquiaaju-huaj, socua queraatia tamasa pueyano.

¹²Nojori catecanosacari Naín tiacaacua, Jesuuri pueya niquiquiaari macu pataano jamosocoriquiano. Macuuri jiyacunojuanaa na nucua niyanu quiquiaari. Na nucuaari mashiquio quitiasuquiaari. Queraatia pueyari na nucua macu nuhuaji sacuariquiaa, jamajiniara nojori quiojosacari. ¹³Jesu niquishacari mashiquio, nocua taraajereeri. Na sequereeri:

—Maja nujuquenu.

¹⁴Jesuuri macuucua catecanoree. Macu quiquio quiatareeri. Na patanaari pootia na nujuataquee. Jesuuri macu sequeree:

—Mashajanaa, janiya quia sequeyani: “¡Quia sanere!”

¹⁵¡Macuuri cajiquii! Juhucatecara pocuareeri. Jesuuri na nucuaacua na jaatucuree. ¹⁶Puetunu pueyajanaa jaara naa Jesu miishano niquiquiaari, jiyanohua pueretureeri. Nojoriiri Pueyaso shuquiritiaree jiyanohua. Na puerenuta sequetureeri:

—¡Pueyaso sequenu panishano caminiujiuniaqui niya supueree pa tajiña! ¡Jiyanohua cumaacaraca!

Nojoriiri naa sequetureejuhujaj:

—¡Pueyasoori shusha quiarijia na saquiroijosano Israel pueya niishiriohuacuhuj, na cumaquiniuria pajaniya!

¹⁷Jesujiniji pueya pohuatasanoori caminiujiushaaquiaari puetunu Judiocuaca jiyajiniajanaa, mariyata puetunu na shocuaqueya jiyacajiniajanaano.

**Tiuquinijiona Juan jiyaramiquishano
pueya nequesoreesacari Jesu
(Mt 11.2-19)**

¹⁸Tiuquinijiona Juan pueyari puetunu Jesu miishanojuanaa pohuataquiaari Tiuquinijiona Juan. Na nuhuaji, Tiuquinijiona Juan naapiqui na pueya sequequiaari:

¹⁹—Jesuucua nia quiaare. Niocua na sequesee: “¿Quiaate seetanujuanaa Pueyaso Jiyarosano, tariucuaaanu sequesano niriquianotej, tamonute sashishiyajaa soj?”

²⁰Naaratej, Tiuquinijiona Juan jiyarosano pueyari Jesuucua quiojoquiaari. Na sequetuseeri:

—Tiuquinijiona Juanri canaa jiyaroree quiocuani, canaa nequesotanura quiajaniya: “¿Quiaatena Cristo, Pueyasojiniji niriquianotej, canaate tamonu sashiyajaa soj?”

²¹Nojori tiuquijiosacari Jesuucua, jiyacaritij, Jesuuri queraatia pueya naatanijoree nojori niquiara; cusosuhua, pueyaracaanu nootunejaca, samaruhuaraa pueyano. Mariyata queraatia cariyojuarujuri jiyaterohua niquijiacaraari. ²²Na nuhuaji, Jesuuri naa Tiuquinijiona Juan pueya sequeree:

—Nia quiaarohua. Tiuquinijiona Juan nia pohuatasuhua taa nia niquiricuajani, nia tojishanonio. Nia sequesuhuanoj: “Cariyojuarujuriiri niquijiacara quiriohua. Shipiiniuquijiuniaari maninia rucoorohua. Lepra cusotajacaari cushiritishaarohua juhua juhuanaraja nojori quiniuhua. Numueejunucuaari tojijiacaa-

ra quiriohua. Macunucuaari samitianiijosaarohua. Casamijiuniucua pueyari Pueyaso rupaa pohuatasaaaree, Pueyaso pueyara nojori jiyatesaanura.²³ Shuquiriaatia quijia cutaraari nooj, cante cucua tiuuniu tarinitiaquiyani”.

²⁴Tiuquinijiona Juan jiyarasano pueya jaara quiojoquiaariuhua, Jesuuri juhuacatecara pueya pohuataree Tiuquinijiona Juanjiniji. Jesuuri naa nojori nequesotaree:

—¿Casaa niquiniucua nia quiojocanu cariiquia jiyajiniani? ¿Niaate noojia niquijoteja niquiniucua quiojocanu? ¿Tiuquinijiona Juante juhua paratu piyarojosano naajua jiyareta na tacarojosano? Majaruhua.²⁵ ¿Casaa niquiniucua nia quiojocanunitioj? ¿Niaate maniniuqui toque cushijia niquiniucua quiojocanu? Niaacuajaari niishiya, shanohua toqueya cushiyonuujuaaari saaja jiyaniijianucua tiajinia quiyano niquishano. Nojoriiri tama na panishanojuaaia mijiaca.²⁶ ¿Taateerinitioj? ¿Casaa niquiniucua nia quiojocanuuriini? ¿Pueyaso sequenu panishano caminiujiuniate quiquianu? Taaquiriirini. Nia niquishano pueyanoori seetanujuaanaa socua tojishano pueyano puetunu Pueyaso sequenu panishano caminiujiunijianijianaa.²⁷ Cuno Juanjinijicuaajaari tariucuaaanu Pueyaso Rupaajinia naajiotasano quiquiaari. Pueyaso sequesano nojuajinijiiri naa naajiotasaaquiaariti:

“Cua sequenu panishano caminiujiu-
riquiano jiyaroyanjia, na
puetanura quiajaniya, nuu
jeenucuariquiano quiocuaji”.

²⁸Seetanujuaanaa nia sequeyanijia, puetunu Pueyaso sequenu panishano caminiujiunijianijiniujuanaani, majaari tamonu socua cutara pueyano quiniu quiquiaari Tiuquinijiona Juanjiniji. Naajaa, cante Pueyaso muerasuniyojua quiya cucua na tiushacarini, Pueyasora,

nojuajaari socua cutara pueyano Tiuquinijiona Juanjiniji.

²⁹Puetunu pueyajanaa, mariyata cumaneeca masejonaa Roma tiacajinia quijia jiyaniijiarani, nojoriiri niishiquianu Tiuquinijiona Juan pohuatasano Pueyaso-jinijiiri seetanu rupaajanaa quiquianu. Naaratej, nojori tacatosacari nojori jiuujia sesa nojori miishanojiniji, nojoriiri moojinia tiuquinijosaacanu.

³⁰Saniniuujia, Fariseocua, mariyata Moisés Rootasanojiniji niishitiojanaani, nojoriiri Tiuquinijiona Juan pohuatasano ruuretacanu saaja. Naacuajitij, majaari nojori tiuquinijosaanu quiquianu, nojori seetanuucua nojoriiri sesa mijiicajuhua. Nojoriiri Pueyaso miiniu panishano nojoriria soocanu saaja. Naacuajitij, majaari nojori jiyanooshaanu quiquianu.

³¹Jesuuri socua sequeeree:

—¿Quiarijia nio pa quishacari pueyari-
jiataj? ³²Nojoriiri juhua naatujoori, na tacuarishijionu panishacari, na cajitiusha-
cari tiaca jiuujiajinia cajitiucua cura-
rotasanojinia. Nojoriiri narta naatujoo-
riicua naca: “Canaari juucua naajua
jonenejyani. Majaari nia nianujunu
paniniu. Canaari taraatia jaaquequejosa-
no jaaquequejyani. Majaari nia sapuenu
paniniujiuhua”. ³³Naajuhua pueyanaa,
niaari Tiuquinijiona Juan tojiyaquiquianu
Pueyaso rupaa na pohuatasacari nia
niquiara. Nojuaja cutaraari miaquesano
miaqueyashijia quijia, vino ratuyashijia-
nio. Naaratej, niaari na sequeja,
“samaruraca”. ³⁴Na nuhuaji, janiyari
niquianuni. Janiyari saniniuujia miaque-
sano miaquejojuani, vino ratujuajuhua.
Cunora niaari cua sequequia: “Cunoori
sacuaaratia miaquejoru, ratunu porocua-
nio, sesa mijiaca rupueja sacuaaratia,
mariyata pa soosano cumaneeca
masejonaa rupuenanio”. Naa nia seques-
acaritij, niaari cua tojitiaquiyajaacuhua.
³⁵Naajaa, pueya jaara canaa pohuatasano

tojijiaca quiri, jiyacari cutara nia naata niishiniu canaa niishitiojosanoori seetanujuanaa Pueyasojiniji, cua tojijiaca jatasacari maninia quijiacara.

Jesu miaquesacari Fariseo Simón tiajinia

³⁶Tamonu Fariseo pueyanoori Jesu masuuquiaari na tiajinia na miaquenura. Jesuuri na tiajinia quiaaree. Miaquenuujua shuriuquiumia roshishiiri.

³⁷Paanatuuri cuno tiacajinia quijia quiquiaari. Na niishishacari Jesuuri cuno Fariseo tiajinia tiuquirii miaquenura, nojuajaari cuno tiajinia quiaquiaarijuhua. Shiitaniyojua seesariquiaja pataconiyojua cacatariquiaari, cohuaja saajiajiniji quejasano. Mishaja quiriquiaari shanohua jaanutajata. ³⁸Maajiiri Jesu cashacuucuma mojuquetasee. Nujuqueriquiaari. Na namijiaacaari Jesu niohuacaacua totejoriquiaa. Naa Jesu niohuaca piquiojoreeri. Na nuhuaji, na muezacata na sacuanijiarohuari. Na niohuaca nujuureeri. Na shanohua jaanutaja totaree Jesu niohuacaacuaari. ³⁹Cuno Fariseo pueyano niquishacari naa cuno maaji miishanotej, noojiajinia niishiriojoriquiaari: “Jesu jaara seetanujuanaa Pueyaso sequenu panishano caminiujunia quiri, mariqui niishiri cante na coyani, taamueca maajitijianojoni”. ⁴⁰Jesuuri cuno Fariseo pueyano niishiriojosano niishiriquiaa. Cunora na sequereeri:

—Simónnaa. Quia sequenu paniyanijia.

Fariseo pueyanoori Jesu riucaaree:

—Cua sequere, Niishitiojonanaa.

⁴¹Jesuuri na sequeree:

—Caapiqui pueyanoori cumaneeca masequiaari rupaquijiaara tamonu cumaneeca niquitiojonajiniji. Niquiriyatu pueyanoori queraatia cumaneeca masequiaari, juhua quiniento juuca poonijiosanojiniji masesano. Tamonu pueyanoori masequiaari nareja juhua

cincuenta juuca poonijiosanojiniji masesano. ⁴²Na nuhuaji, nojori sequesano juuca jaara tari quiquiaari na camaru nojori niquitionuhua na cumaneeca, majaari nojori jiitianu quiquiaari cumaneeca. Naaratej, cumaneeca niquitiojonaari nojori sequeree: “Naajaa, maja socua nia niishiriojonu nia niquitio-nuhua tarijia cua niquitiosano cumaneeca niajaniya”. Cumaneeca niquitiojonaari naa cuno caapiqui pueya jiyanoquiaari. Simónnaa, cua sequere-toj, tteyano cuno caapiqui pueyanojinijiniote socua cuno cumaneeca niquitiojona panijiaara quiniutianiyaní?

⁴³Simónri Jesu riucaaree:

—Cunocujani, cante socua queraatia cumaneeca niquitiosaaquiaaricujani.

Jesuuri na sequeree:

—Taaquiriririni.

⁴⁴Jiyacaritij, Jesuuri cuno maajiicua tacateree. Simón sequereeri:

—¿Quiaate nio maaji niquiya? Cua tiuquishacari quia tiajinia, majaari quenaaja quia niquitionu quirii mohuaca janiya, cua niohuaca cua jeequetajara. Nio maaji cutaraari cua niohuaca jeequeree na namijiaacata. Na sacuanijiarohua na muezacataari. ⁴⁵Majaari quenaaja quia nujuunu quirii janiya, quia saruhuatasacari janiya. Nio maaji cutaraari cua niohuaca nujuunequejoriquiaa pueyaracaanu, niya cua cajishacari.

⁴⁶Naajuhua, majaari quia totanu quirii muese nunacu cua nacaacua. Nio maaji cutaraari cua niohuacaacua totaree shanohua jaanutaja. ⁴⁷Naaratej cua tojiri. Nio maajiiri jiyanoohua sesa mijia quiriquiaa. Naaratej, jiyanoohua cua paniyari puetunu sesa na miishanojinijianaa cua jiyanooniucua nojuaja. Saniniuuja, cante secaja sesa na miishanojiniji jiyanooshaareni, naajuhua, nojuajaari secaja panijia na jiyanoonia.

⁴⁸Na nuhuaji, Jesuuri cuno maaji sequeree:

—Quiaacuajaari tari jiyanooshaaree sesa quia miishanojiniji.

⁴⁹Narta masuusano pueya nata cajitiuya-noori juhuacatecara tama sequetooreejaaja:

—¿Cantucuaa nio pueyanoni, sesa miiijia jiyanooriquianoni?

⁵⁰Jesuuri maaji sequeree saaja:

—Cucua quia tiuushacari, quiaacuajaa-ri tari jiyanooshaaree. Juhuajaniya quia quiaarohua.

Jesura pueraquenaa maajipohuajiniji pohuatasano

8 ¹Na nuhuaji, Jesuuri rucujanejoquiaa-ri queraatia tiacajinia, shiitianiyojua tiacajiniajuhuaj. Nojuajaari tii Pueyaso rupaa pohuatariquiaa, taa Pueyaso jiitianu paniya na muerasuni. Na doce saquiriojosano pueyari na cojiriquiaajaa-cuhuj. ²Noojiaqueya maajipohuari na tarajariquiaajuhuj. Cuno maajipohuari tamaatia cusonujiniji Jesu naatanijosano quiquiaari. Tii quiriquiaajaariuhua noo maajipohua, Jesu nojorijiniji tohuatani-jioquiaari samaruhuatej.

Nojorijinijinioori quiquiaari María Magdalena. Jesuuri cuno Marfajiniji tohuatanijoquiaari siete samaruhua.

³Quiriquiaajaariuhua Juana, Cuza niquiocuani. Cuzaari jiyaniijia Herodes jiitiasano casami cojuana quiquiaari. Susaanaari nojorijinijinio quiquiaarijuhuaj. Socua queraatia maajipohuari quiriquiaa. Puetunu cuno maajipohuajanaari Jesu naacutaquiaari tama nojori jiitiasano casaatajaaja. Nojoriiri nera pueraquenuunaa quiquiaarijuhuaj, tiquiyocua nojori rucujanejosacari Jesuta.

Jesu pohuatasano natoojona pueyanojiniji
(Mt 13.1-9; Mr 4.1-9)

⁴Queraatia cuno jiya tiacajinijinio pueyari nijioquiaari nojori niquiniuria

Jesu. Jaara nocua rerequeejoquiaari queraatia pueya, Jesuuri nojori niishitio-joquiaari miriqui, nio pohuatasanota. Nojori sequereeri:

⁵—Tamonu pueyanoori na cuhuariquia-jinia quiaquiaari natoojonuucua. Na jacutasacari, secajaari totequiaari nucuaco. Tii rapijiosaaquiaariiri. Shuhuari na miojoquiaari. ⁶Tajaacaari toteree sai tajinia. Cuno jajau jaara moritiaquiaari, ritia sorereeri puera joojuashiqui na quishacari. ⁷Tajaacaari toteree riyocuaca tajinia. Riyocuacaari socua ritia maashi-quiaari. Na natasanoori tarinitiucuaa quirii. ⁸Socua tajaacaari maninia jiyajinia toteree. Tii maashiquiaari maniniaari. Queraatia mueturee cutaraari. Noojiaqueya cuno nataujinijiiri cien jajau quiquiaari niquiriyatu jiyonajiniji.

Nio pohuatasano na puecasacari, Jesuuri na rupaa paaretaree. Naa sequereeri:

—iNiaa jaara numaaraca quiri, nia tojitiare cua pohuatasano!

Casaarate miriqui pohuatasanoni
(Mt 13.10-17; Mr 4.10-12)

⁹Na nuhuaji, Jesu pueyari na nequesotaree casaa na miriqui pohuatasano niishitiojonu paniyani. ¹⁰Jesuuri nojori riucuaaree:

—Niaari saquiriojosaquiaari nia niishiniuria taa Pueyaso poonijiya pueya jiuujiajiniani, na muerasura nojori quiniuria. Cunoori tariucuacaanu pueya niishishoo. Janiyari tamasaca pueya niquiara pohuata-quiaa miriqui cutarani. Naacuajitij, nojoriiri cua pohuatasano niishiyaquiaa na tojitiasacari. Naajuhuj, cua cumaacata cua miishano cariyoshitiquiaari, nojori niquiara cua miishacari.

**Jesu niishitiojosacari na pueya,
miriqui na pohuatasano natoojonajiniji**
(Mt 13.18-23; Mr 4.13-20)

¹¹Nia niishitiojoreera miriqui cua pohuatasano natoojonajiniji. Pueyano

natoojosano jajauri juhua Pueyaso rupaa. ¹²Pueyano jaara Pueyaso rupaa tojiri najuhuanaj, nojuajaari juhua nucuaco toteno jajau. Sesaacaari nimiaa. Pueyaso rupaa na tojishano jaariutiarohua noojiajinijiiri, maja nocua na tiuuniuria, nojuaja mariqui jiyanooshaareeri. ¹³Sai tajinia toteno jajauri juhua noo pueya, canapuate Pueyaso rupaa tojiriini. Na nuhuaji, rupaquijia Pueyasooocua tiuquuaa shuquiriaataari. Naa mijiacaari juhua puera shiitianiyojua nujuacaraca. Naacujitij, nojori jaara saniniujishaare, nojoriiri ritia Pueyasooocujaji rupatequiaa. ¹⁴Riyocuaca tajinia toteno jajauri juhua noo pueya, canapuate maninia tojirii Pueyaso rupaani. Na nuhuaji, nojoriiri puera tacaquiaa mijiria casaacua, casamiriaca nojori quiniuria, tama na cuaqueyajaaja nojori shuquiritiniuriajuhuaj. Naaratej, nojoriiri juhua muetuhuo natau quiya, tarinituacua riyocuaca tariyoshitishano. ¹⁵Maninia jiyajinia toteno jajauri saniniujia juhua noo pueya, canapuate maninia tojitiareecujaja Pueyaso rupaani. Na racataa maninia noojiajiniaari. Pueyaracaanu na tojitiaquiaari. Majaari na pishiniu Pueyasooocujaji. Naacujitij, nojoriiri juhua queraatia muetujua natau.

**Pueyaso muerasuuri juhua
samarituu cuhuataja
(Mr 4.21-25)**

¹⁶Majaari pueya noshitiniu quiquiaa samarituu, na jamotasocoriquiano conatu cariquiaco, maquetu cariquiaconio. Samarituu jaara noshitishaare, morijiuucua morotashiyari na cuhuatanura, pueya tiuquitiasacari tiajiniaaco. Naajuhuj, Pueyaso Rupaari pueya jiuujia cuhuataja. Cunora, Pueyaso Rupaa cuaara maatia pohuataasaaria puetunu pueya niquiarajanaa. ¹⁷Puetunu jamojosano casaajanaari riuriatasaanutaniya. Puetunu jiyasohuaja

nia miiijosanojuanaari niishishaanutaniyajuhuaj. Cuhuataasaanutaniyari maninia niquishocoriquiano. ¹⁸Cunora, cua sequesano tojitiajaca nia quiri maninia. Cante maninia jiitiaa cua rupaani, nojuajaari socua na niishijiaara jiyatesaanutaniya. Saniniujia, cante cua rupaa tojiyashijiani, secaja najuhuaana na niishishanoori jaariutiasaanutaniya, puetunu shaaquiriajanaa.

**Jesu tapueyocuaca tiuquijiosacari
Jesuucua nojori nucuata
(Mt 12.46-50; Mr 3.31-35)**

¹⁹Jiyacaritij, Jesu nucua Jesu tapueyocuacata tiuquijioquiaari Jesu quishaqui. Majaari nojori naata tiuquitianu quiriquiaa Jesuucua. Jiyanoohua queraatia pueyari nocuara ritiariquiaa saaja tia tohuateyaji. ²⁰Tamonuuri Jesu numooteeree:

—Quia nucua quia tarajanuhuata jati carijiniacuma quiya. Quia niquitiuniu paniyaquinia.

²¹Jesuuri tii quiniaa niquiara sequeree saaja:

—Canapuate seetanujuanaa Pueyaso Rupaa tojitiajacani, nojoriiri cua nucua cutara, cua tarajanuhuanio.

**Jesu pueyajetesacari paratu, mohuacanio
(Mt 8.23-27; Mr 4.35-41)**

²²Tamonu juuca, Jesuuri botejinia tacataquiaari na saquiriojosano pueyata. Nojori sequereeri:

—Pa niuutiaare caminia taquijiria.

Naaratej, nojoriiri niuutiariquiaa.

²³Nojori niuutiasacari, Jesuuri maqueri-quiaa. Canashiyaquiji paratuuri juhuacatecara piyarjonu coteeree jiyanoohua. Mohuaca queyaqueteriquiaa bote jiniacumaraari. Boteeri quera tiuquitiariquiaa tari. ²⁴Jiyacaritij, na pueyari Jesu niucujasee ritia. Na sequetuseeri:

—iNiishitiojonanaa! iNiishitiojonanaa!
iPaa tari tiuquitiaani!

Jesuuri sanemaa. Paratu sequereeri,
mohuacano:

—iTariucua! iNia suraajere!

Paratu, mohuacaari ritia suraajeeque.
Paratu piyarojonuuri tajimíaa, caminia
queyocuaanonio. ²⁵Jesuuri na pueya
sequerohua:

—Niaacuaa juucua Pueyasoocua
tiuujiaa. ¿Casaa nia tojetareerini?

Nojoriiri Jesuucuaa jiuujiatecoree.
Shiriiqitiuriquiaari Jesu miishano nojori
niquishacari. Tama nojorijiaarijia
nequesoreetooriquiaa:

—¿Cantucuaanonio? iParatu, mohua-
caari na tojirii na sequesacari!

**Gerasa jiyajinijinio samaruhuaraca
pueyanojiniji pahuatasano**
(Mt 8.28-34; Mr 5.1-20)

²⁶Na nuhuaji, nojoriiri shiitaseequiaari
Gerasa jiyajinia, Galilea jiya taquijiria.

²⁷Jesu jaara rosequiaari botejiniji,
jiyacaritij, samaruhuaraca pueyanoori
nocua niquiaari, cuno jiya tiacajinijinio
pueyano. Cuno pueyanoori pueyaracaanu
samaruhuaraca quiquiaari. Majaari toque
na cushiniu quijia. Naajuhua, majaari
tiacijinia na quiniu quijia. Saaja raacajinia
quijiaari, macunucua nuchua paaquiosa-
qui. ²⁸Na niquishacari Jesu, na
cariquimajia mojoquetaseeri. Jesuucua
nacareeri:

—¿Casaara quia niyaree miji canaa
quia cushionurani Jesunaa? iQuia
niishianijia! iQuiaacuaaari Jiyaniijiaja-
naa Pueyaso Niyanu! iCua tarinitiare
quenaaja! iMaja naquiya cua miiniu!

²⁹Samaruhuaraca pueyanoori naa
sequeriquiaa Jesutej, Jesu sequesacari
tari nojuaja, cuara tohuataara cuno
pueyanojiniji. Samaruuri sequeyarucua
cuno pueyano miitiquiaari sesa. Narta
pueyari juucua na cashacucua, na

numatucua morojoquiaari cumayocua
jiyocua shipinishanota, na cojuasaanura
maninia. Samaruhuaraca pueyanoori
saaja na turojotaquiaari. Samaruuri na
mashiquijia tiqiyocua, pueya quiyacui-
shaqui na quiniuria. ³⁰Jiyacaritij, Jesuuri
na nequesotaree:

—¿Taateja quia sesani?

Samaruuri na riuucaree:

—Cua sesa “Queraatia”.

Naa Jesu sequequiaariirri jiyanoohua
queraatia samaruhua na jiitiasacari.

³¹Samaruhuari jiyanoohua secogoree Jesu,
maja nojori na jiyaronura puequetuujy
raama saniitosocoriquiano. ³²Jiyacaritij,
queraatia cushiyari miaquenuuriquiaa
cateca naataja, tuhuananujinia quiniui.
Samaruhuari cunora Jesu secogoree nojori
na tiuquitianiniuria cushiyajinia. Jesuuri
nojori tarinitiaree. ³³Cunora, samaruhua-
ri pueyanojiniji tohuareetaquee.
Cushiyajinia tiuquitiaseeri. Puetunu
cushiyajanaari cocuateree. Tacinijiji
totesee caminiacijinaari. Tii shushiniuuri-
ri.

³⁴Cushiya cojuanaa jaara niquiquiaari
naa miishanotej, nojoriiri netecuatu-
quiaari na shiriiquiniutia, Jesu miishano
nojori pahuatanura tiacajinia, cuhuari-
quiacajiniajuhuaj, tee pueya
quiriquiaacuaajani. ³⁵Puetunu pueyajanaa-
ri Jesuucua nijioquiaari na tiacajiniji,
pueya pahuatanuusanoinijiji nojori
niquiniuria. Nojori tiuquijiosacari
Jesuucua, nojoriiri cuno pueyano
niquishii, canajiniji samaruhua tohuaree-
tareecuajani. Nojuajaari Jesu shuriucua
cujiriquiaa toqueraca, panaatia na
quishacariuhua. Naa pueya niquishacari
nojuajatej, pueretuquiaariiri. ³⁶Jiyacari-
tij, Jesu miishano niquitiuniaari shusha
nijiono pueya pahuataree taa samaruhua-
raca pueyano naatanishaarohuani.

³⁷Cunora, puetunu Gerasa jiyajinijinio
pueyajanaari jiyanoohua puereturiquiaa.

Naaratej, iJesu secojotureeri na quianura nojori jiyajiniji! Naaratej, Jesuuri botejinia tacataquiaariuhua na pueyata na quianuhua. ³⁸Cuno pueyano, canajiniji samaruhua tohuareetareecuajani, nojuajaari Jesu secojoree juucua nata na quianura. Jesuuri saaja naa na sequeree:

³⁹—Quia tiajinia quia quiaarohua. Quia pueya niquiara quia pohuatasuhua taa Pueyaso miirii maninia quiajaniani.

Pueyanoori quiaarohua. Puetunu na tiacajinijanaa pohuatasuhuari taa Jesu miiriucuaa maninia nojuajani.

Jesu naatanishacari Jairo niyatu,
Jesu toque quiana maajinio
(Mt 9.18-26; Mr 5.21-43)

⁴⁰Jesu jaara niuutiaquiaariuhua caminia taquijiria na pueyata, pueyari na timitiarohua na tiuquishacariuhua. Puetunu nojorijianaari na sashiriquiaa. ⁴¹Jiyacaritij, tamonu pueyanoori Jesuucua tiuquishii. Na sesaari quijia Jairo. Nojuajaari Pueyaso secojojua tia jiyaniijia quiquiaari cuno tiacajinia. Jesu cariquimijia mojuquetaseeri na secojonura na tiajinia Jesu quianura.

⁴²Neyatuniyojaari quera cusoriquiaa jiyacari. Majaari socua niquiohwaraca na quiniu quijia. Doce marijiaari tari shocojoquiaari cuno neyatu.

Jesu quiasacari Jairota, jiyanhua queraatia pueyari nata quiojoriquiaajuhua. Pueyari jiyanhua na tanuujuriquiaa, nata nojori quiojosacari nucuaco.

⁴³Tamonu maaji cusosuuri cuno pueya tajinia quiriquiaajuhua. Doce marijiaari tari na shocojoquiaari pueyaracaanu na naatesacari. Cuno maajiiri puetunu na cumaneeca puecaquiaarijianaa najuhuanaj, na naarajosaanura juucua. Naarajonaari maja na naata na naatani-niu quiquiaari. ⁴⁴Maaji cusosuuri Jesu

nijiniji catecanoquiaari nocua. Na tucuaque toque casaca quiasee jiyasohuari. iNa nanacaari ritia curetaquee!

⁴⁵Jiyacaritij, Jesuuri pueya nequesotaree:

—¿Cante cua quiareeni?

Puetunu na shocuaqueya pueyajanaari sequeree:

—Maja canaa quianu quirii quiajaniani.

Pedroori Jesu sequeree:

—Niishitiojonanaa, ¿majateeri quia niquiniucuaa? Queraatia pueyacuajaari quia tanuujia.

⁴⁶Jesuuri saaja sequeree:

—Maja. Cusosu cua quiareeni.

Niishijanijia cua cumaacaari tari na naatanirii.

⁴⁷Maaji niishishacari na miishano jiyasohuaja tari niishishaaree, Jesuucua nimiaari. Na puerenuta tetecariquiaari. Jesu cariquimijia mojuquetaseeri. Puetunu pueya niquiarajanaa pohuatareeri casaara Jesu na quiareeni. Pohuatareejaariuhua taa na naataquee ritiani, Jesu na quiasacari. ⁴⁸Jesuuri na sequeree:

—Sanaunaa, cucua quia tiuuniucua, quiaari naatarohua. Quioojia quia cajitiriohua. Juhuajaniani quia quiaarohua.

⁴⁹Jesu pocoojosacarijia cuno maajitia, tamonu pueyanoori tiuquiquiaari Jairo tiajiniji. Jairo sequeeri:

—iQuia niyatu tari cusoquee! Maja najuhua riniu paniniu Niishitiojona quia tiajinia.

⁵⁰Jesu tojishacari cuno pueyano sequesano, Jairo sequereeri:

—Maja puerenu. Cucua quia tiuuri saaja. Quia niyatucuaa naatanutaniuhua.

⁵¹Jesu tiuquishacari Jairo tiajinia, nojuajaari maja na shanacunu quirii quenaaja tamonu pueyano tiuquiniuriamacuucua. Saaja nata tiuquitiamaa cutaraari Pedro, Santiago, Juan, maaji

samiriu que, na nucuanio. ⁵²Puetunu tii quiniaa pueyajanaari maaji samiriucua nujuqueturiquiaa. Sapiyonuuriquiajaa-rihuaj. Jesuuri nojori sequeree:

—Maja najuhua na nujuquenu.

Maaji samiriu maja macu, nareja maqueyano.

⁵³Naa Jesu sequesacaritij, pueyari na saroojotaree saaja. Nojoricuajaari niishiriquiaa maaji samiriucua seetanujua-naa macu quiriquiaa. ⁵⁴Jiyacaritij, Jesuuri macuucua tiuquiquii. Na juaashi-quiajiniji na quiaaseeri. Jiyanhua na sequereeri:

—Maaji samiriuniaa, iquia sanere!

⁵⁵Na sohanuuri nocua tacatemohua jiyacari. Samiitiamohuari. Ritia sanequeeri. Jesuuri na nucua sequeree na mianuutenura. ⁵⁶Na queyari jiyanhua jiuujiateree. Jesuuri nojori sequeree, maja nojori pohuatanura tamasaca niquiara na miishano.

Jesu jiyaramiquishacari na doce pueya

Pueyaso rupaa nojori pohuatanura

(Mt 10.5-15; Mr 6.7-13)

9 ¹Jesuuri na doce saquiriojosano pueya rerejotequiaari na jiyaramiquishocoriquiano. Nojori niqutioree cumaacaari, puetunu tamaatia sesa samaruhujanaa nojori tohuatejonura, cusosuhua nojori naatanijionurajuhua. ²Nojori jiyaramiquiriiri Pueyaso rupaa nojori pohuatanura pueya niquiara, pueya niishiniuria taa Pueyaso jiyanooni paniya nojorini, na muerasu nojori quiniuria. Nojori jiyaramiquiriijiaariuhua cusosuhua nojori naatanijionura. ³Jesuuri nojori sequeree:

—Maja nia panu nia rucuanejotajara nia panishano. Majaari nia miojotu nia panu, nia caashoque, nia coseyaca, nia cumaneecanio. Saa nia cushishano toquetaja nia quiaare cutara. Maja socua toque nia panu nia cushishocoriquiano.

⁴Niaa jaara tamonu tiajinia tiuquishii-quia, niocua cuniqui jiyojetaseequiaja, niaa jaara cuno tiacajiniji quiaarejaatijia.

⁵Niaa jaara tamonu tiacajinia tojinu paniyaquishaare, cuno tiacajiniji nia quiaare. Nia nuhuajiria, cuno pueya niquiara niocua nia niohuacajiniji cuno tiaca jaaquia nuutare. Naacuajitij, cuno pueyari niishiniutianiya, Pueyasoori nojori jiyanoaquiniutianiya, nojori tojitianu paniyaquiniucua Pueyaso rupaa pohuatanana.

⁶Na nuhuaji, Jesu pueyari quiojoquee puetunu cuno jiyajinia shiitianiyoja tiacajiniajanaa, Pueyaso rupaa nojori pohuatanura tii. Nojoriiri Pueyaso rupaa pohuatanuuquiaari pueya jiyanooshaanura, Pueyaso pueya nojori quiniuria. Naajuhua, cusosuhua naatanijiotuquiaa-riiri.

**Jiyaniijia Herodes niishiniu
panishacari cante Jesuni**

(Mt 14.1-12; Mr 6.14-29)

⁷Jiyaniijia Herodesri pohuatasaaquiaari puetunu Jesu miishanojinijijianaa. Herodesri saaja jiyajenequiaari cante Jesuni. Jiyacaritij, noojiaqueya pueyari sequeriquiaa: “Jesucuaajaari jiyaniijia Herodes nacatanishano Tiuquinijiona Juan samiitianohua”. ⁸Tamasaca pueyari Jesujiniji sequeriquiaajuhua: “Supuetana Elíascaja tari tiuquiriohua”. Nojuacuajaari tariucuaaanu Pueyaso sequenu panishano caminiujiunia quijia. Saniniujia, tamasaca pueyari sequeriquiaajuhua: “Jesucuaajaari tamonu tariucuaaanu Pueyaso sequenu panishano caminiujiunia samiitianohua”. ⁹Herodesri saniniujia sequeree:

—Janiyacuajaari cua pueyano jiyarocanu Tiuquinijiona Juan na nacatanurani. ¿Cantejaara cuno Jesuni? Janiyari queraatia nocuaji tojinuiyari.

Cunora, Herodesri jiyanhua Jesu niquiniu paniriquiaa juucua.

Jesu mianuutesacari cinco mil pueya

(Mt 14.13-21; Mr 6.30-44; Jn 6.1-14)

¹⁰Jesu jiyaramiquishano pueya tacatesacariuhua, nojoriiri Jesu pohuata-quiaari puetunu nojori miishanojuanaa. Na nuhuaji, Jesuuri nojori jiyataaree tamaquiria, Betsaida tiaca shuriucua, tii tamajaaja nojoritia na quiniuria. ¹¹Pueya niishishacari tee Jesu quiriquiaani, nojoriiri saaja nocua quiojoquiaari. Naajaa, Jesuuri maninia nojori maseree saaja. Cuno pueya pohuatareeri taa Pueyaso quiniu paniya nojori jiyaniijiarani. Jesuuri nojori cusosuhua naatanijioreejuhua.

¹²Tenacariishacari, Jesu doce pueyari nocua catecanoquiaari. Na sequetureeri: —Pueya quia jiyaramiquiri cateca tiacajinia, nojori cuara cuniqui pajenuura na miaquenuusocoriquiano, na maquetuuarajuhua. Nojori panishanoori shaaqui niya pa quishaquini.

¹³Jesuuri nojori sequeeree saaja: —Niaa mariqui nojori mianuutere saniya.

Nojoriiri Jesu sequeturee: —¿Canaateeri miaquesanoracajaarani? Canaa saaja cinco panniyojua jitiiaani, caapiquiriyatu sapitiaajanio. ¿Canaateeri secaja pa cumaneecata masenutaniya queraatia miaquesano puetunu nio pueyarajanaani?

¹⁴Cuniqui nojoritia quiriquiaa naasucuaari cinco mil pueya. Jesuuri na pueya sequeeree:

—Pueya nia raquiriojotare maninia. Cuara cajitiuuria cincuenta jatiqi, socua cincuenta tamaqui. Mianuutesocoriquiano puetunu pueyajanaa, cuara naa cajitiuuriatej.

¹⁵Nojoriiri Jesu sequesano miirii. Puetunu pueyajanaari cajitiurii. ¹⁶Na nuhuaji, Jesuuri cuno cinco pan pataree, caapiqui sapitiaajanio. Jiyocuacaanu

maureeri na Que Pueyaso na secojonura miaquesanoocuara. Na nuhuaji na neecase-reeri. Na pueya na niqutioreeri puetunu pueyajanaa nojori serotasocoriquiano. ¹⁷Puetunu pueyajanaari na miaquenuuree. Maninia tooquioreeri. Na nuhuaji, doce canaasatuuri mishinijosaaquiaari pan raacuata, sapitiaaja raquiquiatanio.

Pedro sequesacari Jesuuri

seetanujuanaa Cristo

(Mt 16.13-19; Mr 8.27-29)

¹⁸Tamacari, Jesuuri Pueyaso secojori-quiaa tamajaaja. Na saquiriojosano pueyari nata quiriquiaa. Jiyacaritij, Jesuuri nojori nequesotaree:

—¿Taa pueya sequequiaa janiyani, cantena janiyani?

¹⁹Nojoriiri na riucaaree:

—Noojiaqueya pueyari quia sequequiaa, quiaana nacatasano samiitia-nohua Tiuguinijiona Juan. Tamasacaari quia sequequiaajuhua, quiaana Elfas, tariucuacaanu Pueyaso sequenu panishano caminiujiunia. Tamasacaari saniniujia quia sequequiaa, quiaa naasucuaana tamonu tariucuacaanu Pueyaso sequenu panishano caminiujiunia samiitianohua.

²⁰Jesuuri saniniujia nojori nequesotaree: —¿Niajaniyariuhua? ¿Taa nia sequeyani, cante janiyani?

Pedroori na sequeeree:

—Quiajaniyacuaajaari Cristo, Pueyaso Jiyarosano.

²¹Jesuuri jiyanohua nojori rootaree maja nojori pohuatanura tamasaca niqiara cante nojuajani.

Jesu numootesacari na pueya,

nojuaja mosaanutaniya

(Mt 16.20-28; Mr 8.30-9.1)

²²Jesuuri naa nojori sequerohuacuhua: —Janiyari jiyanohua naquiya miishaanutaniyani. Pa Judiocuaca camarucuaari

cua niquiniu paniyaquiniutianiya, na tojitianu paniyaquishacari janiya. Naajuhuj, pa pueyacuara secojonaa jiyaniijianucuaari cua niquiniu paniyaquiniutianiya, Moisés Rootasanoji-niji niishitiojonaanio. Nojoriiri cua monutianiya. Naajaa, jiuujianaraca juucajinia, janiyari samiitianutaniuhuaani.

²³Na nuhuaji, Jesuuri puetunu pueyajaanaa sequeree:

—Cante cua nuhuajiniu paniyani, cua pueyano na quiniuria, nojuaja cuaara niyajetaara tama na miiniu panishano-juaaja. Cuaara panitiaara tama na cuaqueyajaaja puetunu juucajananaa, cua tojjia na quiniuria seetanujuaana.

²⁴Saniniuujia, cante tama na cuaqueyajaaja shuquiritiniuria niishiriojoquiaani, nojuajaari jiyanojua taraatia quiniutianiya na nuhuaji. Saniniuujia, cante tama na cuaqueyajaaja panitiaquiaa cua panishano na miiniuriani, nojuaja cutaraari Pueyaso pueyanora jiyatesaanutianiya, pueyaracaanu shuquiriaatia na quiniuria.

²⁵Pueyano jaara puetunu nio jiya casamijianaa jiitiana quiri, cuno maara najuhua quiri, nojuaja jaara na shaajesacari jatasaa maní quiquiojinia Pueyasooju. ²⁶Cante cua seera caririquiya mijiria quiniaa pueya niquiara sequenurani, janiyari nojori jiyaniijiani, naajuhuj janiyari nojori seera caririquiniutianiya cua tiuquishacariuhua Jiyaniijia cua quiniuria. Janiyari shanohua niquishano quiniutianiya cua tiuquishacariuhua cua Que shacantuua cumacatani, na seya cumacatajuhuaj. Naajuhuj, cante cua rupaa pohuatani caririquiya sesa mijiaca pueya niquiariani, janiyari nojori seera caririquiniutianijuhuj. ²⁷Seetanujuaana nia sequyanijia, noojiaqueya niajanijajiniinoori maja nia cusununu quiniutianiya juhuanojuaja, niaa cuaara niquirijiaatijia Pueyaso cumaaca

tiuquiyano cucua, na muerasu jiitiariquianoni.

Jesu jatasacari shacantuucara

(Mt 17.1-8; Mr 9.2-8)

²⁸Naa Jesu sequenu nuhuajitij, ocho juuca nuhuaji, nojuajaari tuhuananuucua tacaquiaari na Que Pueyaso na secojonura. Nata quiaareeri Pedro, Santiago, Juannio. ²⁹Jesu secojosacari Pueyaso, na jiquicoori tamaatiara jataquiaari. Na toqueeri jiyanojua cohuajara jataquiaari-jiuhuj, shacantuquera. ³⁰Jiyacaritij, caapiqui pueyari nocua muetaquiaari. Jesuta pocooriquiaari. Nojoriiri quiriquiaa supuetana Moisés, supuetana Elíasnio. ³¹Nojori nujuatusaquiiri shacantuua quiriquiaa puetunu nojori shocujanaa. Nojoriiri pocooriquiaa taa Jesu mosaanutaniya Jerusalén tiacajiniანი. ³²Jiyacaritij, Pedroori jiyanojua maquenuujuriquiaa, nata quiniaajuhuj. Naajaa, majaari nojori maquenu quiriquiaa. Naacujitij, nojoriiri Jesu shacantuua niquiquiaari. Cuno caapiqui supuetanaa niquituriijaariuhuj, Jesuta pocoorijiano. ³³Cuno caapiqui pueya quiojonu panishacariuhua Jesu shuriucuj, Pedroori Jesu sequeree najuhuanaj:

—iNiishitiojonanaa, canaa namitia niya quiyani! iCanaa suhuororeera jiuujianaraca suhuorotucua; quiaari, Moisésra, Elíasranio!

Pedroori naa najuhuaa pocuariquiaa. Majaari na niishiniu quiquiaari casa na sequeriquiaani. ³⁴Pedro pocuasacarijia, cohuaja najacaari nojori mishiquioma. Nojoriiri puereturiquiaa cohuaja najacajinia nojori quishacari. ³⁵Na nuhuaji, nojoriiri Pueyaso tojirii pocuaano cuno cohuaja najacajiniji. Naa sequeree:

—iNioori cua Niyanu, cua saquiriojosa-no nia Jiyaniijia na quiniuria! iNojuaja nia tojitiare!

³⁶Naa nojori tojiniu nuhuaji cuno rupaatej, nojoriiri Jesu niquiriohua. Tari tamajaaja nujuariquiaari. Nojoriiri sanaa na niquitiari-quiaa. Na nuhuaji, majaari quenaaja tamonu nojori pohuatanu quiquiaari nojori niquishano, Jesu jaara samiitiaquiaariuhuaajatiiaj.

**Caya samijiajiniji Jesu
tohuatesacari samaru
(Mt 17.14-21; Mr 9.14-29)**

³⁷Tariqui, nojori jaara rosetaquiaariuhua tuhuananujiniji, queraatia pueyari Jesuucua nijioquiaari. ³⁸Cuno pueya tajiiniji, tamonu pueyanoori naa nacaquiaari:

—iNiishitiojonanaa, cucua quia taraajere quenaaja! iCua niyanuniyojua quia niquiri! iJiyaniojuanaari quianuniyojua! ³⁹iSamaruuri na miiquiaa taraatia! iNa sariyotequiaari! iNa taquiriocuatequiaajariuhuj! iNa rupaamajiiri cushaaquiaa! iNa cuaqueya miiquiaa moqutiuriuriaari! Majaari ritia na cartenu paniniu quiquiaa. ⁴⁰Janiyar juucua quia pueya sequereeni, cuno samaru nojori tohuatenura. Majaari nojori naata quiriquiaa na tohuatenura.

⁴¹Jesuuri sequeree:

—Pueyaso tojitiaashijiacanaa, niaaqui Pueyasoocua tiuyashijiacajuhuanajaj. ¿Janiyateeri pueyaracaanu rejeretanutaniya nijajaniyani? Miji quia niyanu quia jaatucure.

⁴²Caya samijia catecanosacari Jesuucua, samaruuri na pojotequee. Na taquiriocuateereeri. Jesuuri samaru sequeree na tohuatanura. Caya samijia naataniriiri. Na niquitiorohua na queeri. ⁴³Puetunu pueyajanaari jiyanoehua jiuujiateeree nojori niquishacari Jesu miishano Pueyaso cumaacata.

**Jesu pacutesacari pohuatanu
nojuaja mosaanutaniya
(Mt 17.22-23; Mr 9.30-32)**

Pueya jiuujiatesacarijia puetunu Jesu miishanojinijianaa, Jesuuri na pueya sequeree:

⁴⁴—Maninia nia tojiri casaa cua sequenutaniya nijajaniyani. Majaari na nijajetanu. Janiyari niquitiosaanutaniyani pueya miiniuria janiya taa nojori paniyacuajani.

⁴⁵Majaari na pueya niishiniu quiriquiaa Jesu sequesano. Juhua miriqui sequesanoori quiriquiaa nojoriria. Naacuajitij, majaari nojori naata niishiniu quiquiaari. Nojoriiri Jesu nequesotanu puereturi-quiaajuhuj, casaa nojori na pohuatasano sequenu paniriquiaani.

**Cante jiyaniijiajanaa cutarani
(Mt 18.1-5; Mr 9.33-37)**

⁴⁶Jesu pueyari juhuacatecara juayonuu-tariquiaa teyano nojorijinijiniote jiyaniijiajanaa quiniutianiyan. ⁴⁷Jesuuri nojori niishiriojosano niishirii. Naaratej, Jesuuri naatujua nujuateree na shuriucua. ⁴⁸Na pueya sequereeri:

—Cante nio mueya rupueya na cumaquiniuria cucua tiuujia cuno mueya quiniuucuan, nojuajaari cua rupueyaju-huj. Cante cua rupueyani, cua Jiyarona rupueyajaariuhuj. Naacuajitij, cante tama na cuaqueyajaaja jiyateya pueya shocoteyashijia na quiniuria juhua naatujuan, nojuajaari jiyaniijiajanaa quiniutianiya puetunu narta Pueyaso muerasujinijiojuanaa.

**Cante maja pa paracani,
nojuajaari pa jiyano
(Mr 9.38-40)**

⁴⁹Juanri Jesu sequeree:

—Niishitiojonanaa, canaari pueyano niquiriucuaani samaruhua tohuatanijijia-no quia cumaacata. Canaari na tenujurucuaani nojuaja quiaquiniuucua pajaniyajinijinio.

⁵⁰Jesuuri na riucaaree:

—¿Casaara nia tenujurucuaarinioj? ¿Niaateeri niishiyaquiya, cante pa paraca quiaquiyani, nojuajaari pa jiyano?

Jesu nacasusacari Santiago, Juannio

⁵¹Quera Jesu tacanu panishacari jiyocuacaanu, nojuajaari juhuacatecara Jerusalén tiacajiniara quiaaree, juhua jiuujiaaju na puereyaquiniutia. ⁵²Jerusalén tiacaacuara nuu cajiniocua Samaria* jiyajinia Jesu quishacari na pueyata, noojiaqueya na pueyajinijinio puerateree tamonu tiacajinia nojori masenura tia nojoriicuaajiiri. Naacujitij, na pueyari Samaria jiyajinia quijia shiitianiyojua tiacajinia quiojoquiaari tii Jesu maquejara nojori pajenura. ⁵³Cuno Samaria pueya jaara niishiquiaari Jesuuri Jerusalén tiacajiniara quiariquiaa, majaari nojori paniniu quirii Jesu maquenura nojori tiacajinia. ⁵⁴Santiago, Juan niishishacari cuno Samaria pueyari nojori sooriquiaa, nojoriiri cunora Jesu nequesotaree:

—Jiyaniijianaa, ¿quiaate paniya canaa tininiuria mani jiyocuacaanu, cuno pojori na catijianura, taa tariucuacaanu Pueyaso sequenu panishano caminiujiunia Elías miiquiaaricuaani?

⁵⁵Jesuuri nojoriicua tacateree. Nojori nacasureeri naa nojori saniitionu panishacari cuno Samaria pueya. Naa nojori sequeereeri:

—Majaari nia niishiniu cana sohuanute naa nia niishiriojoteyani. Nia niishiri, majaari cua ninu quiquiaari mijiria cua puecoonura pueya. Saaja niquiaari cutaranijia, pueyacuaji cua tacunura.

⁵⁶Na nuhuaji, nojoriiri tamonu shiitianiyojua tiacajinia quiojiyaree tii maquenura.

**Tamasaca pueya quiniu panishacari
Jesu pueyara juucua
(Mt 8.19-22)**

⁵⁷Nojori quiojosacari nucuaco, tamonu pueyanoori Jesu sequequiaari:

—Jiyaniijianaa, quia pueyanora quiniu panianijia. Janiyacua quia tarajareni

puetunu tiquiyocua quia rucuanajosacari-jianaa.

⁵⁸Jesuuri na riucuaaree:

—Quioojuapueeri na raaca jiitiaa cutara. Shuhuari na jesuhua jiitiaajuhuj. ¿Saniniuujia Pueyaso Niyanuurijataj? Majaari cua jiitianu tama cua maquejara-jaaja.

⁵⁹Jesuuri tamonu pueyano sequeeree:

—Cua nuhuajiniara quia quiri.

Nojuajaari saa sequeereaja:

—Cuaara Jiyaniijianaa. Cua que cuaara cua niquiara shaajeerajaara. Janiya jaara na jamoreni, janiyacua na nuhuaji quiaata rucuanefore cutarani.

⁶⁰Jesuuri na riucuaaree:

—Naajaa, quia tarinitiare. Cua tojitiaa-shijiacaari juhua macunucua. Naaratej, cuno macunucua cuaara jamoora tama narta macujuaaja. Quia rucuanefore cutara Pueyaso rupaa quia pohuatanura.

⁶¹Na nuhuaji, tamonu pueyanoori Jesu sequeeree:

—Jiyaniijianaa, janiya cutara quiaata quianu paniyani. Coteenu cua tiajinia quiquiooraj, cua pueya cua niquiniuria cua nuhuajiria.

⁶²Jesuuri miriqui na riucuaaree:

—Pueyano jaara na juyaca poonitijiya, jiya jiacataja na jayotanura na cuhuari-quia na jeenucuanura, maja cumaati na nijiniara na niquiniu. Na camaru jaara na nijiniara niquiri, sesa naaniutianiyari shuyorocotiuyocuara. Naajuhuj, cua pueyano jaara na quiquiojinia tacatenu panijiohua quiri, nojuajaari maja maninia Pueyasora poonijiona.

**Jesu jiyaramiquishacari setenta y dos
na pueyajinijinio, Pueyaso
rupaa nojori pohuatanura**

10 ¹Nio nuhuaji, Jesuuri socua setenta y dos pueya saquiriojo-quiaari, nojori puetanura nojuaja, puetunu Israel pueya tiacajiniajanaa

Pueyaso rupaa nojori pohuatanura. Jesuuri nojori nuhuaji tii quianu paniriquiaajuhua. Puetunu nojorijianaa jiyaramiquiriiri caapiqui, caapiqui. ²Nojori nuhuajiria, Jesuuri nojori rootaree nio miriqui sequesano:

—Queraatia Pueyaso muerasuranoori quiya, juhua senoosocoriquiano. Saniniuuja, secaja na senoonaari quiya. Cunora, cuhuariquia camaru nia secojore, socua senoona na jiyaramiquiniuria puetunujuanaa na senoosaanura. ³Nia quiojiyare pueyanaa. Nia niishiri, janiyari nia jiyaramiquiya juhua borrego niquiohuani puereeta sareya tajinia. Pueyaso paraari juhua puereeta sareya. ⁴Nia quiojosacari, majaari nia caashoque nia patanu, nia cumaneeca quiquiojuhuaj, nia sapatunio. Majaari nucuaco nia tarishiniu pueya nia saruhuatasacari. ⁵Tamonu tiajinia nia tiuquishacari, coteenu nia saruhuatare na camaru nio sequesano: “Juhujaniya nia quiri, nio tiajinia quiniaanaa”. ⁶Cuno tiajinia quiniaa pueya jaara jiyanoojiaca quiri, naa nia sequesacaritij, Pueyasoori nojori miiniutianiya maninia. Nojori jaara juajia quiri saniniuuja, Pueyasoori nojori shuquiritiyaquiniutianiya. ⁷Tee nia masesaareni, cuno tiajinia nia jiyojere. Nia miaquere, nia rature nojori niquitiosano niajaniya. Nia pohuatanuucua Pueyaso rupaa nojori niquiara, niajaniya cuara niquitiosaaria nia panishano. Majaari tamasa tiajinia nia pacunujuunu tii nia miaquenura. ⁸Nia tiuquijiosacari tamonu tiacajinia, pueyano jaara nia masuure na tiajinia nia quiniuria, niocua niaara nojori rupojosano miaquere. Majaari na soonu. ⁹Cusosuhua nia naatanijiore cuno tiacajinia. Pueya niquiara nia seque: “Pueyasoori quiarijia nia jiyatenu paniya na muerasu nia quiniuria”. ¹⁰Nia tiuquishacari tamonu tiacajinia, pueya jaara tii nia

tojiniu paniyaquiri, niocua cuno tiaca nuucujinia nia naacare pueya niquiara: ¹¹“Nia tiacajinijinio jaaquiani, canaari canaa niohuacaacuaji na majiriuutiaani. Cunoori nia niishiniuria, Pueyaso jaara nia saniitiore, majaari canaacua na tiutiasaanu quiniutianiya. Pueyasocua jaari nia jiyanooni paniriquiaa juucua, na muerasu nia quiniuria”. ¹²Seetanujua naa nia sequeyanijia pueyanaa, Pueyaso saniitionu juuca jaara quiri, cuno tiacajinia quiniaari socua jiyanohua saniitiosaanutianiya Sodoma tiacajinia quiniaa pueyajiniji.

**Jesu piriyojosacari Pueyaso
tojitiaashijiaca pueya
(Mt 11.20-24)**

¹³“iCorazín tiacajinia quiniaa pueyanaa, mariyata Betsaida tiacajinia quiniaa pueyanaa! Cua tojiri. iNiaari jiyanohua saniitiosaanutianiya! iNiaari socua Pueyaso tojiyashijiaca quiya cuno tariucuaaanu Tiro tiacajinia quiniaa pueyajiniji, Sidón tiacajinia quiniaa pueyajinijinio! Cuno pueya jaara Pueyaso cumaacata miishano niquiquiaari, taa cua miiquianu nia tiacajiniacuaani, nojori maara ritia noojia tacatoquiaari cutara, sesa nojori miishanojiniji. Cuno tiacajinijinio pueya maara cocuaque toqueya cushiyonuuquiaari, nojori taraajesacari sesa nojori miiniuucua. Naajuhua, nojori maara juaca niojoquiaari nojori nacaacua quera nojori macaashacari, sesa mijiaca nojori quiniuucua. ¹⁴Nia cutaraari cua cumaacata cua mijiosano niquijia. Naajaa, majaari nioojia nia tacatonu quiquianu Pueyasocua. Naaratej, Pueyaso saniitionu juucujinia, iniaari socua jiyanohua saniitiosaanutianiya Tiro tiaca pueyajiniji, Sidón tiaca pueyajinijinio! ¹⁵Niajanijarijataj, Capernaum tiacajinia quiniaa pueyanaa, ¿niaateeri jiyaniya niaari jiyocuaaanu quinaara

jiyatesaanutaniya? ¡Maja! ¡Niaari puequeetuujü raama quejoosaanutaniya sanya!

¹⁶Cua pueyanaa, cante nia tojitiajacani, nojoriiri cua tojitiajacajuhua. Naajuhua, cante nia ruuretaa cua rupaa nia pohuatasacarini, nojoriiri cua ruuretaajuhua. Cante cua ruuretaani, nojoriiri cua Jiyarona ruuretaajuhua.

Jesu jiyaramiquishano setenta y dos pueya tiuquiiijosacariuhua nocua

¹⁷Jesu jiyaramiquishano setenta y dos pueyari Jesucua tiuquiiioquiaariuhua. Nojoriiri jiyanohua shuquiriaatia quiriquiaa. Jesu sequetureeri:

—¡Jiyaniijiana, samaruhuari canaa tojitianacuni canaa tohuatanijosacari nojori, canaa jiyaniquishacari quia sesa!

¹⁸Jesuuri nojori sequereeri:

—Taaquiriirini. Janiyari Sesaaca niquiquianuni juhua niaco tiyano jiyocuacaanui. ¹⁹Janiyacuaajari cua cumaaca nia niquitiocanuni, juhua janiya nia rucuanenura sacocua caco, turucuaniniu cacionio. Cua cumaacata, niaari puetunu Sesaaca cumaacajanaa shocotanutaniya, juhua janiya panaatia nia rucuanenura, cua rupaa nia pohuatanura. Majaari quenaaja tamonu casaa miiniu quiniutianiya naquiya nia janiya. ²⁰Naajaa, majaari saaja shuquiriaatia nia quiniu samaruhua tojitianuucua nia janiya. Shuquiriaatia nia quiri cutara nia sesaca naajiotasano quishacari jiyocuacaanu, Pueyaso muerasu sesaca naajiotasaqui.

Jesu shuquirishacari
(Mt 11.25-27; 13.16-17)

²¹Jiyacaritij, Pueyaso Sohuanuuri Jesu shuquiriritij jiyanohua. Cunora, Jesuuri na Que Pueyaso sequereeri:

—¡Quia shuquiritiaanjia cua Quenaa! ¡Quiaacuaajari Jiyaniijiana quia

jiyocuacaanu, mijiriano! ¡Quiaari maninia miiri! Cua pueyari juhua naatujoori, maja puera niishijia. Naajaa, quiaari quarijia nojori niishitirii quia niishishano, quia jamosano mijiria niishijiaacuaaji. Jaa, cua Quenaa, quiaacuaajari naa nojori panitiaja.

²²Cua Queeri tari cua niquitioquiaari puetunu na jiitiasanojuanaa, Jiyaniijiana no cua quishacari. Majaari tamonu niishiniu quenaaja cante Pueyaso Niyanuni, saaja cua Que cutaraari cua niishiya. Naajuhua, majaari tamonu niishiniu cutara cante cua Queni. Saaja janiya cutaraari na niishiyani. Naajuhua, noo pueyari na niishiya, canapue cua niishitiniu paniya cua Quecuajani.

²³Na nuhuaji, Jesuuri na pueyacuatacatereri. Saaja nojori sequereeri:

—Shuquiriaatia quijia cutaraari nia janiya, nia niquiniuucua puetunu nia niquishanojuanaa nia rupenuucua janiya.

²⁴Seetanujanaa nia sequenijia, queraatia tariucuacaanu Pueyaso sequesano caminiujunaa pueya, mariyata jiyaca jiyaniijanucuanio, nojoriiri nia niquishano niquiniuucua jiaatiaquiaari juucua. Majaari na niquitiuniu quiquiaari. Nojoriiri cuata nia quishacari nia tojishano tojitianuucua jiaatiaquiaari juucua juhua. Majaari na tojituniu quiquiaari.

Samaria jiyajinijinio maninia miiijajiniji pohuatasano

²⁵Na nuhuaji, Moisés Rootasanoiniji niishitiojona pueyanoori Jesucua niquiaari nata na pocoojonura. Jesu na pocuatenura sesa juucua, naa na nequesotareeri:

—Niishitiojonanaa, ¿taa cua miiniutianiya pueyaracaanu rishijia cua quiniuriani?

²⁶Jesuuri na riuquaree:

—¿Taate Moisés Rootasanoinia naajiotasanoni? ¿Taa quia niishirioquiaani, quiaa jaara na serojoquiaa?

²⁷Moisés Rootasanojiniji niishitiojonaa-
ri Jesu riuquaree:

—Naa sequeyano:

“Quia Jiyaniijia Pueyaso quia paniri
puetunu quioojiatajanaa, puetunu
quia sohanutajanaa, puetunu quia
cumaacatajanaa, puetunu quia
niishitiajatajanaa. Naajuhuj,
quiarta pueyano quia paniri taa
quia paniyacuaa tama quia
cuaqueyajaajani”.

²⁸Jesuuri na sequeree:

—Quiaacuaajaari maninia riuquaree.

Naa quia miishacaritij, quiaari pueyara-
caanu rishijia quiniutianiya.

²⁹Moisés Rootasanojiniji niishitiojonaa-
ri tama nocuaji tacunu paniriquiaajaaja,
maninia quijia na quiniuria Pueyaso
niquiara. Naaratej, naa nequesotarohua
Jesuuri:

—¿Canteeri cuarta pueyanoni?

³⁰Jesuuri nio pohuatasano na pohuata-
ree na niishitiojonura nojuaja. Naa
coteereeri:

—Tamonu parta Judio pueyanoori
Jericó tiacajiniara quiariquiaa juucua,
Jerusalén tiacajiniji. Nohuasenuujuaca
pueyari na quiaree. Puetunu na
jiitiasanojuanaa na jaariuutiatureeri, na
cushishano toquenio. Na piquitiuriiri.
Quera macu na tiujiatuqueeri. ³¹Na
nuhuaji, pueyacuara secojonaari cuno
nucuaco quiariquiaajaacuhuj. Na
niquishacari piquishano narta Judio
pueyano mataano nuu shuriquiocora, na
shocortamaa saajaari. ³²Na nuhuaji,
Levita* pueyanoori cuno nucuaco
quiariquiaajuhuj. Na niquishacari narta
Judio piquishano pueyano, nojuajaari
saaja na shocortamaajuhuj. ³³Na
nuhuaji, Samaria jiyajinijinio tahueri
cuno nucuaco quiariquiaajuhuj. Na
niquishacari parta Judio pueyano
mataano, Samaria jiyajinijinio tahueri
nocua taraajeree. ³⁴Na cacataseeri.

Nohuasenuujuaca piquiyashiquia
matejoree shiyocuataari, vinotanio. Na
nuhuaji, na piquiyashiquia morojoreeri.
Na nuhuaji, na niataree tama na seru
nijiniajaarijia. Ritia na jiyataaree
rucoojuaca tiuquijiojua tijajiniaraari.
Cuniqui na cojuatareeri. ³⁵Tariqui, cuno
tahue quianu panishacariuhua, nojuajaari
caapiqui cumaneeca pueraree. Ruconaa
tia camaru na niquitioreeri. Na sequeree-
ri: “Cucua quia jiyanoori. Nio pueyano
quia cojuatare quiria. Quiaa jaara socua
quia cumaneeca nocua puecare,
janiyacua saniniujia quia niquitiorohua-
nijia cua tacatesacariuhua”.

³⁶Nio pohuatanu nuhuaji, Jesuuri cuno
pueyano nequesotaree:

—Quiarijiani, ¿taa quia sequeyani?

Cuno jiuujianaraca ruconaa pueyajiniji-
nioni, ¿teyano cuno pojorijinijiniote
narta pueyanocua taraajeja cutarani?

³⁷Moisés Rootasanojiniji niishitiojona
pueyanoori Jesu riuquaree:

—Cuno Samaria jiyajinijinio tahuecua-
jani, nocua taraajequiaarini.

Jesuuri na sequeree:

—Taaquiririnij. Quia quiaarohua. Naa
pueyacua taraajeja quia quirijihuj, taa
cuno tahue taraajequiaaricuaani.

Jesu quishacari Marta, María tiajinia

³⁸Socua na rucuanesacari, Jesuuri tamonu
tiacajinia tiuquiquiaari na pueyata. Cuno
tiacajinia na quishacari, tamonu maajiiri na
masuuquiaari. Naaratej, na tiajinia na
tiuquinitiareeri. Cuno maaji sesa quiquiaari
Marta. ³⁹Martaari tarajanu jiitiaja. Na sesaari
quiquiaari María. Maríari Jesu niohuaca
shuriquiumia cajiriquiaa, na tojinuria Jesu
pohuatasano. ⁴⁰Marta cutaraari poonijiori-
quiaa queraatia na miishocoriquiano na
jiitiasacari. Cunora, Martaari Jesuucua
catecanoree. Na sequereeri:

—Jiyaniijianaa, ¿majate cucua quia
taraajenu? Cua tarajanuuri cua tarinitia-

quee niquiriyatujua, puetunu nio poonijiosanotajanaa. ¡Quia sequere na naacutanura janiya!

⁴¹Jesuuri saaja na sequeree:

—Martanaa, quioojia quia cajitiri sanaanaa. Quiaari puera quia miishano tacaataia. ⁴²Saaja niquiriyatu casaa cutaraari jiyanoehua panishano. María cutaraari cuno socua panishano casaa saquiriojoree. Tamonuuri maja na naata na tojishano jaariutianu noojiajiniji.

**Jesu niishitiojosacari na pueya
nojori secojonura Pueyaso
(Mt 6.9-15; 7.7-11)**

11 ¹Tamacari, Jesuuri Pueyaso secojoriquiaa tamaqui. Na puecasacari secojonu, tamonu na pueyajinijinioori na sequeree:

—Jiyaniijianaa, canaa quia niishitiojore canaa secojonura Pueyaso, taa Tiuquinijio-
na Juan niishitiojoquiaari na pueyacuaani.

²Jesuuri nojori sequeree:

—Pueyaso nia secojosacari, naa nia sequere:

“Jiyocuacaanu quijia canaa Quenaa, puetunu pueyajanaa cuaara niishiria quiaari tojetaarucujanaa sesa miyashijia. Pueya cuaara seetanujanaa quia jiyateera nojori jiyaniijia quia quiniuria. Quia panishano cuaara miishiiria mijiria, taa jiyocuacaanu miishiycuaani. ³Canaa quia niquitioriquia canaa miaquesocoriquiano canaa panishano puetunu juucajanaa. ⁴Canaa quia jiyanoori sesa canaa miishanojiniji, taa canaa jiyanoo-
quiaacuaa sesa canaa miiniaani. Naajuhuj, canaa quia cojuare, maja sesa canaa miitishaanura”.

⁵Jesuuri naa sequereejuhuj, socua nojori na niishitiojonura:

—Niaa jaara nia rupuenacua quiaare shiyaqueya, casaa nia masenura

nojuajiniji, ¿nojuajatucua taa quia sequereni?, quiaa jaara na sequere: “Cua rupuenanaa, quia niquitioire jiuujianaracapan. ⁶Tamonu quia cojiniaari shusha tiuquiriohua tucuaacaanu, miaajeyari. Shaaquiiri quia sumatuu quia miaquetesocoriquiano nojuaja”. ⁷¿Quiaatucua taa miirini quia rupuenta jaara na tiajiniaacumaji quia riuquare?: “Maja quia taajetenu. Cua tia tiotiu tioree tarinijia. Tari quia mueya mataa maquetujinianijia. Maja quia naata sanenu quia niqutionura quia panishano”. ⁸Jaara naa sequeretej, niaa jaara na tia tiotiu piquiniu tarinitiaaquiri, janiyari seetanujanaa nia sequeyani, nojuajaari sanenutaniya na niqutionura niajaniya puetunu nia panishanojuanaa. Majaari na sanenu quiniutianiya saaja nia rupuenta na quiniucua. Sanenutaniyari pueyaracaanu taajeta nia piquishacari na tia tiotiu. ⁹Naajuhuj, maja nia tarinitianu Pueyaso nia secojonu. Nojuajaari nia panishano nia niqutionutaniya. Cunora, nia panishano nia pajeriquia. Niocua na riuriatate. Tiotiu nia piquiriquia. Niaara riatasaanutaniyari. ¹⁰Naaratej, cante Pueyaso secojoquiaani, nojuajaari na panishano masenutaniya. Cante na pajejani, na panishano riuriatanutaniyari. Cante tiotiu piquiquiaani, nera riatasaanutaniyari.

¹¹¿Niaatucua nia niyanu niquitioire saajia, neecaruu na masesacari niajaniya? Maja. ¿Niaatucua soconu niquitioire nia niyanu, sapitiaaja na masesacari niajaniya? Maja. ¹²¿Niaatucua turucuaniniu niquitioire nia niyanu, caacaraja riuriquiu na masesacari niajaniya? Maja. ¹³Puetunu niajaniyajanaari sesa miiniu niishijia. Naajaa, niaari maninia casaa niqutionu niishiya nia niquiohua. ¿Taatucua socua jiyocuacaanu Quijia nia Que Pueyasoni, tojetaarucujanaa sesa miyashijiani? Seetanujanaa capora na quishacari, nojuacuajaari na Sohanu

niquitionu niishijia na muerasu, canapue-
te na masequiaacuajani.

**Pueya sequesacari Jesu,
samaru cumaacaracana**
(Mt 12.22-30; Mr 3.20-27)

¹⁴Tamacari, Jesuuri samaru tohuatani-
riquiaa tamonu pueyanojiniji. Cuno
pueyanoori tiquia quiquiaari samaru na
jiitiasacari. Samaru jaara tohuataquiaari
cuno pueyanojiniji, pocujara quiriohua-
ri. Pueya niquishacari naatej, nocuaji
jiuujiatereeri. ¹⁵Tamasaca pueyari saa
sequequiaarijia:

—Cuno pueyanoori samaruhua
tohuatanijia samaruhua jiyaniijia
Satanás cumaacata.

¹⁶Tamasaca pueyari Jesu saniniujiniu
paniriquiaa. Naaratej, nojoriiri na
sequesturee na cumaacata na miiniuria
casaa, na niquitiniuria nojori, nojori
niishiniuria nojuajaari seetanujuanaa
Pueyasojinijinio. ¹⁷Jesuuri nojori
niishiriojosano niishiriquiaa. Nocuaji
nojori sequereeri:

—Tamonu jiyajinia, cuno pueya jaara
miaquetooyia tama nojori pueyatajaaja,
nojoriiri maja na naata na paraa nujuata-
nu, na paraa jaara nocua tiuquitiare
raqiritiano nojori quishacari. Naajuhuj,
niquiriyatu tiajinia quiniaa jaara tama
nojorijiaaja juayonuujutaquiaa, nojoriiri
maja na naata jatiqui quiniu. ¹⁸Naaju-
huaj, niaari cua sequeriquiaa, janiyana
samaruhua tohuatanijia Satanás
cumaacatani. Jaara naa quiriritij, ¿Satanás-
tucua taa pueyaracaanu quiri jiyaniijiani,
nojuaja jaara tama na samaruhuaaja
tohuatanijia tama na cumaacatajaaja?
¹⁹Naajuhuj, janiya jaara samaruhua
tohuatanijia Satanás cumaacatani, taa
nia sequeyacuajani, ¿nia niishitiojosano
pueyariuhuj, cana cumaacata nojori
tohuatanijioquiaa samaruhuani? ¿Taa nia
sequeyani? ¿Satanás cumaacataate?

Majoruhua. Naacuajitij, tama niajaniya-
jaaja nia niishiri, niaari jiyajeneya. ²⁰Naa
Pueyaso cumaacata cua tohuatanijiosaca-
ri samaruhuatej, naacuajiti nia niishiri,
Pueyasoori tari nia masuya seetanujua-
naa na muerasu nia quiniuria.

²¹Niojinia nia niishiriojorejuhuaj: cumuee-
ca pueyano jaara na tia cojuua queraatia na
miaquejotaja casaata, majaari tamonu naata
na jiitiasano casami jaariuutianu. ²²Saniniuu-
jia, socua cumueeca pueyano jaara nocua
tiuquiri, na miaquejotaja casaa jaariuutiaari,
cuno, nocua na tiuushano juucuan. Na
nuhuaji, na jaariuutiasano casami paari, na
pueya na serotasocoriquiano. Naajuhuj,
janiyari Satanás jiitiasano jaariuutiajani.

²³Cante cua jiyano quiaquiyani,
nojuajaari cua paraca. Cante cua naacutaa-
quiya pueya rerecojonura Pueyasorani,
nojoriiri saaja pueya cocuataa Pueyasocuai.
Naaratej, jacaria nia niishiriojore casaa nia
niishiriojia janiyajiniji.

Samaruhuari riujuiujia na quiquiojiniohua
(Mt 12.43-45)

²⁴Samaru jaara tohuatare pueyanojiniji,
joojuashiquio rucuaneyajari na samaatejara
na pajenura. Jaara na riuriataaquiri,
niishiriojari: “Cua quiquiojinia riujuiyaro-
huaraqui teje cua tohuatacanucujani”.

²⁵Samaru tiuquishacariuhua cuno pueyano-
cua, na riuriatasuhuari shaaco, juhua
maninia netoonujusano tia, maninia
jeenucuasanojuhuaj. ²⁶Naaratej, cuno
samaruuri socua sesa miijiaca nojuajiniji
siete narta samaruhua riquiohua nata na
quiniuria. Puetunu nojorijianaari cuno
pueyanojinia tiuquitasuhua. Naacuajitij,
cuno pueyanoori socua sesara jiyacateja,
tarija na quiniujiniji.

Seetanujuanaa shuquiriaatia quiniu cutara

²⁷Jesu pohuatasacari nio, tamonu
maajiiri jiyacari pueya tajiniji naa
nacaree:

—iShuquiriaatia quijia cutaraari cuno maaji cante quia raquiaarini, cante quia canashitiquiaarini!

²⁸Jesuuri saaja na riucuaaree:

—Socua shuquiriaatia quijia saniya sajara cante Pueyaso rupaa tojjijiani, cante Pueyaso panishano miiquiaajaaniuhuaaj.

Sesa pueyari saaja Pueyaso cumaacata miishano niqiniu panijiaa
(Mt 12.38-42; Mr 8.12)

²⁹Socua queraatia pueyari Jesuucua rerejoriquiaa puetunu na shocuaqueyajaan. Jesuuri juhuacatecara naa pohuatatee nojori niquiara:

—Nio pa quishacari pueyari sesa miijiaa. Nojoriiri cua sequequiaa, jiyajeneta casaa cua miiniuria Pueyaso cumaacata, nojori niishiniuria janiyari Pueyaso Jiyarosaroni. Seetanujanaa majaari socua cua niqitiniu quiniutianiya nojori, cua cumaacata cua miishano. Nojoriiri saaja niqiniutianiya cutara taa cua miishaanutaniyani, naatej taa supuetana Jonás* miishaaquiaaricuaani. ³⁰Jonás miishaanuuri nocuaji jiuujiaatesano quiquiaari cutara. Naacuajitij, Nínive tiacajinia quiniaa pueyari niishiquiaari Jonásri Pueyaso jiyarosano quiquiaari. Janiyari naa miishaanutaniyajaaniuhuaaj, nio pa quishacari pueya niishiniuria janiyari Pueyaso Jiyarosaroni. ³¹Cua supuetana Salomón jaara Israel pueya jiyaniijia quiquiaari, jiyacari tamonu maajiiri pananu shuucuaji jiyajinia jiyaniijia quiquiaari. Nojuajaari jiyanhua tucacaanuji niquiaari narta jiyaniijia Salomón tojiniuucua, jiyanhua niishijia Salomón quishacari. Jiya puequesacari Pueyaso saniniujishacari pueya, cuno maajiiri jiyacari sanenutaniya nio pa quishacari pueyacuara na tonujunura, nojori ruuretanuucua socua Niishijiajanana cutara Salomónjiniji. Cuno

Niishijiaari niya nia tajinia quiyacuaja. Janiyacuajaari nojuajani. ³²Naajuhuaaj, cuno tariucuaacaanu Nínive tiacajinia quiniaa pueyari saneecuatunutaniya Pueyaso nequesoreesacari nio pa quishacari pueya. Nojoriiri nio pa quishacari pueyacuara tonujunutaniyaju-huaaj, nojori tacatoyaquiniuucua nojori jiuujia sesa nojori miishanojiniji, Pueyaso rupaa nojori tojiyaquiniuucua. Nínive pueya cutaraari noojia tacatoquiaari sesa nojori miishanojiniji, Pueyaso sequenu panishano caminiujiniunia Jonás jaara Pueyaso rupaa pohuatatquiaari nojori niquiara. Pueyaso sequenu panishano caminiujiniunia quiarijia nia tajinia quiyani, nojuajaari socua cutara Jonásjiniji. Janiyacuajaari nojuajani.

Pueya jiuujia cuhuatanajiniji pohuatasano
(Mt 5.15; 6.22-23)

³³Pueya jaara samaritiu noshitiri, majaari na jamotanu. Majaari na niatanu conatu cariquiaco. Maninia cutaraari jiyocuaacaanu na morotanu, tiaco tiuquitianaa cuhuatariquiano. ³⁴Pa namijiaari juhua pa cuaqueya cuhuatana-juhuaaj. Naacuajitij, paa jaara Pueyaso casaacua jiaatiaja quirini, paari cuhuashiqui quiya puetunujuanaani. Saniniuujia, pa namijia jaara sesa casaa niqiniuucua jiaatiaja quiri, paari ninishiqui quiya puetunujuanaani. ³⁵Tama nia cuaqueyajaaja nia cojuare, niaa mariqui nioojia cuhuatana maquishajareeri. ³⁶Niaa jaara puetunujuanaa juhua cuhuashiqui quiya, sesa casaacua jiaatiaashijia nia quishacari, niocua maninia niquijia quiri puetunujuanaa, juhua samaritiu cuhuatasacari niajaniya. Naacuajitij, niocua niishijia quiri, maninia mijia nia quiniuria.

Jesu nacasusacari Fariseocuaca, Moisés Rootasanojiniji niishitiojonaanio
(Mt 23.1-36; Mr 12.38-40; Lc 20.45-47)

³⁷Jesu puecasacari pocuanu, tamonu Fariseo pueyanoori na masuuquiaari na

tiajinia na miaquenura. Jesuuri na tiajinia quiaquiaari. Na tiuquishacari, miaquejajinia cajishijianaari. ³⁸Fariseo pueyanoori jiuujiatequiaari na niquishacari Jesuuri shuquitoo tari cajiriquiaa miaquenura. Judiocuacaari jiyaniija, nojori rucoojosacari tamasaca pueya tajinia, tamasaca sesa miishanoori na naata nojoriicua pacunu. Nocuaji nojoriiri shuquitianu niishijia, tiajinia nojori tiuquishacariuhua. ³⁹Naa cuno Fariseo pueyano niishiriojosacaritij, Jesuuri saa na sequereejaa:

—Niajaniya Fariseocuacanaa, niaari juhua noo pueya, canapuede saaja na ratujua cuaqueya jeequejoquiaacuajani, saaja na miacojua cuaqueyano. Majaari na jiniacuma na jeequenu. Niaari naajuhuj. Niaari sapuenu maninia pueya niquishano. Saniniuujia nioojiacaari jiyanoehua sesa quia, casami nia masejonuucua nia nohuasejonuta, puetunu sesa nia miiniutiajanaajuhuj. ⁴⁰Mosanucanaa, ¿niaateeri niishiyauquia, pa cuaqueya Shipininiiaari poojia shipiniquiaarijuhuaj? Naaratej, nioojia nia jeequere cutara, maja saaja nia cuaqueya. ⁴¹Niaa jaara puetunu nioojiainia nia niitiasanojuanaa jiyatere Pueyasora na quiniuria, niaa maara juhua jeequesano quiri puetunujuanaa.

⁴²‘iNiaari taraatia miishaariquiano, Fariseocuacanaa! Niaari miaquesano jaamasucua serojoquiaa jacaria diez jaamasucua, puetunu cien jaamasucuaajinijiniojuanaa, Pueyasora nia niquitioscoriquiano. Cuno jaamasucuaari culantro, menta, socua tamonu jaamasucuaniojuanio. Niaari naa maninia miiquiaa taa Moisés niishitiojoquiaaricuaajani. Naajaa, Moisésri niishitiojoquiaarijuhuua maninia pa miiniuria parta pueya, Pueyaso pa paniniuriajuhuaj. Majaari cuno na sequesano nia miiniu quiquiaa. Puetunu

na sequesanojuanaa tojjijiaa nia quiri. Majaari saaja jaamasucua niquitiojojuaca nia quiniu.

⁴³‘iNiaari taraatia miishaariquiano, Fariseocuacanaa! Niaari jiyaniijianucua shuriucua cajiniucua jiaatiaquiaa, Pueyaso secojojua tiajinia nia quishacari, juhua cutara pueya nia quiniuria pueya niquiara. Naajuhuj, niaari pueya paniquiaa nojori saruhuatanura niajaniya juhua jiyaniijianucua, nia rucuanesacari tiacajinia.

⁴⁴‘iNiaari taraatia miishaariquiano! Niaacuajaari juhua niquishoo jamaca. Pueyari juhuajaniya na caco rucooquiaa na niishiyaquishacari. Naajuhuj, pueyari juhuajaniya nia rupuequiaa, nojori niishiyaquishacari nioojiari jiyanoehua sesa, juhua pueyano mocua jamajinia.

⁴⁵Jiyacaritij, tamonu Moisés Rootasanojiniji niishitiojonaari Jesu sequeree:

—iNiishitiojonanaa, naa quia sequesacari Fariseocuacatej, quiaari canaa sequeyajuhuj!

⁴⁶Jesuuri na riucaaree:

—Taaquiririni. iNiaari taraatia miishaariquianojuhuaj, Moisés Rootasanojiniji niishitiojonaanaa! Puetunu nia rootasanojuanaari juhua jiyanoehua niiquia casaa nitiascoriquiano. Majaari nia tojjitajaca pueya nia naacunu quiquiaa quenaaja nia juaashiquia sacasaruta, cuno niiquia casaa nitiasaanura. Naacuajitij, pueyari maja na naata rejeretanu nia niishitiojosano.

⁴⁷‘iNiaari taraatia miishaariquiano! Niaari macunucua niojotajara shipinijioquiaa shanohuara, tariucuaaanu pueyara Pueyaso sequesano caminiujiuniaa nucuhuacuaji, teyano nia supuetanaa puecooquiaaricuaajani. ⁴⁸Naacuajitij, canaari niishiyani, niaari nia supuetanaa miishano shuquiritiaa, nia cojuasacari nojori puecoosano nucuhua.

⁴⁹Naacuajitij, Pueyasoori na niishiniutia sequesquiaari:

“Janiyari cua sequenu panishano caminiujiuníaa jiyaramiquiniutianiya Israel pueyacuani, cua rupaa niishitiojonaanio. Israel pueyari noojiaqueya puecoonutaniya. Tamasacaari naquiya miishaanutaniyajuhuaaj”.

⁵⁰Cunora, Pueyasoori nio pa quishacari pueya naminiutianiya puetunu na sequenu panishano caminiujiuníaa nanacaacuajanaa, canapueete nio jiya coteejajiniji puecoosaa-quiaaricujajani. ⁵¹Coteenujanaa mosaaquiaari Abel. Na nuhuaji, queraatia Pueyaso sequesano caminiujiuníaa puecoosaaquiaari. Na nuhuaji, Zacaríasri socua jaatesaaquiaari monujuhuaaj. Nia supuetanaari na moquiaari Pueyaso Secojoua tiajinia, Pueyaso Shuriucua Quiquio tacoji, Pueyasooacara catijiasaqui shuriucua. Seetanujanaa nia sequeyanijia, nio pa quishacari pueyari namishaanutaniya puetunu nojori puecoosaanuucujanaa.

⁵²INiaari taraatia miishaariquiano, Moisés Rootasanojiniji niishitiojonaanaa! Niaari najuhuaa Pueyaso Rupaa jiitiaa. Majaari nia tojinu paniniu, Pueyaso jiyanooshano pueya nia quiniuria. Saniniuujia, tamasa jaara Pueyaso Rupaa niishiniu paniri, Pueyaso muerasu nojori quiniuria, majaari nojori nia niishitiojonu paniniu quiquiaa.

⁵³Jesu jaara nio sequequiaari, Moisés Rootasanojiniji niishitiojonaa, mariyata Fariseocuacaari jiyanhua juaaquioree. Jiyanhua nojori juaaquiosacari, nojoriiri Jesu nequesoreenu coteeree queraatia. Nojoriiri Jesu pocuatenu paniriquiaa sesa juucua. ⁵⁴Nojoriiri nocuara tonujunu paniriquiaa juucua, jaara sesa quiri na sequesano.

Jesu niishitiojosano, maja sapuenu maninia pueyano niquishano pa quiniuria

12 ¹Jiyacaritij, jiyanhua jiyanhua queraatia pueyari Jesuucua rerejoree. Tama nojorijiaarjia rapijiotoo-

riquiaa puera nojori rerequeejosacari. Jiyacaritij, Jesuuri saa na pueyaja sequenu coteeree. Naa nojori sequereeri:

—Tama nia cuaqueyajaaja nia cojuare Fariseocuaca pan poreetajaacuai. Nojori niishitiojosanoori juhua pan poreetaja. Majaari na jataniniu pueya, sesa nojori miiniujiniji. Nojoriiri sapuenu maninia miijiaca pueya niquishano tamasa niquiara. Saniniuujia, nojori jiuujiaari saa sesaja pueyaracaanu. ²Nia niishiri, puetunu jiyasohuaja miishanojuanaari niishishaanutaniya. Puetunu jamosano casaajanaari niquishaanutaniyajuhuaaj. ³Puetunu nia sequesanojuanaa ninishiquini, cuhuashiqui caminiujiushaanutaniyari. Naajuhuaaj, nia sasacojosano tama nia sohuacamaraajaajani, cunoori jiyocuacaanu tia nijiniji nacatasaanutaniya puetunu pueya tojishocoriquianojanaa.

Cante puereshiya cutarani (Mt 10.26-31)

⁴Cua rupenaanaa, majaari nia puerenu canapueete nareja pa cuaqueya mojuani. Nojoriiri maja na naata socua sesa na miiniu pajaniya, paa jaara tariucua macu quiyani. ⁵Seetanujanaa nia sequereeraj, cante puereshiya cutarani. Noo nia puerere cutara, cante cumaacaraca cutara na jatanura niajanija mani quiquiojiniani, na cusojuanu nuhuaji niajanija. Saaja nojuaja nia puerere cutara.

⁶Cinco shuhuari saaja caapiqui cumaneecaniyojuata masesano. Pueyara, cunoori najuhuaaj. Naajaa, majaari Pueyaso niyajetanu cuno shuhua jaara puecoosaare. Nojuajaari na niishiya cutara. ⁷Naajuhuaaj, nia miesuuri puetunu serojosanojuanaa. Pueyasoori na niishiya. Naaratej, maja nia puerenu. Niaari socua jiyanhua Pueyaso panishano cutara queraatia na cojuasano shuhujiniji.

**Tamasaca niquiara pa sequare paari
Jesucristo pueyani**

(Mt 10.32-33; 12.32; 10.19-20)

⁸Cua tojitiare. Cante tamasaca niquiara sequejani: “Janiya Jesucristo pueyanoni”, naajuhujaj, janiyari cua Que Pueyaso seya niquiara sequenutaniyani: “Nojuaja cua pueyano”. ⁹Cante saniniuu-jia tamasaca pueya niquiara seetaa janiyajinijini, cua pueyano na quishacari-ni, janiyari cua Que Pueyaso seya niquiara na tamacanutaniyajuhujaj.

¹⁰Cante cua sesacareeni, nojuaja na naata jiyanooshaanu. Saniniuu-jia, maja cutaraari na naata jiyanooshaanu cante Pueyaso Sohuanu sesacareeni.

¹¹Cua muerasu nia quiniuucua, niaari Pueyaso secojojua tiajinaqueya jiyatasaa-nutaniya, nequesoreenaa niquiara, mijiria jiyaniijianucua niquiaranio. Nojori nequesoreesacari niajaniya, majaari nia niishiriojonu taa nia riucuanutaniyanoj, casaa nia sequenutaniyajaniuhujaj. ¹²Nia riucuanu panishacari, Pueyaso Sohuanu-ri jiyacari nia niishitiojonutaniya taa nojori nia riucuanutaniyani.

Puereetaari casamiriaca pa quishacari

¹³Tamonu pueyanoori pueya tajiniji naa Jesu sequequiaari:

—Niishitiojonanaa, cua tarajanu quia sequare na niquitionura janiya canaa shipininio jiitiasanojiniji, taa canaa shipininio sequequiaari canaacuajani, saminio na quishacarijia.

¹⁴Jesuuri saaja na riucuaare:

—Pueyanonaa, ¿janiyateeri pueya nequesoreenara jiyatesaaquiarini, cua serotanura niajaniya nia shipininio casamini?

¹⁵Jesuuri naa nojori sequequiaarijiu-huaj:

—Jiyanohua nia cojuare tama nia cuaqueyajaaja, maja casamiicua jiaatiaja-

ca nia quiniuria. Pa naata shuquiriaatia quiniu casamiiju. Queraatia casamiiri maja na naata seetanujuanaa shuquiriaa-tia quijiacara na jiyatenu pajaniya.

¹⁶Na nuhuaji, Jesuuri pueya niishitio-ree nio miriqui pohuatasanota. Naa sequareeri:

—Tamonu pueyanoori quiquiaari, jiyanohua casamiriaca. Na cuhuariquiaji-nia na natoosanoori jiyanohua muetuquiaari. Naacuajitij, queraatia miaquesocoriquiano jiitiaquiaariiri na cuhuariquiajiniji na carojotasano. ¹⁷Tama sequareejaarijia: “¿Taa cua miiniutianiya-ni? Cua tiajosano cua racatajara cua carojotasanoori puetunujuanaa tari mishaja quiya. ¿Tee cua racatanutaniya shusha cua carojotasanoorinitioj? ¹⁸¡Jaj, niishiquiinijia! Coteenu cua tiajosano cua casamiicuaji niyaroorohuaraquij. Janiyari socua puereetucucura tiajonutaniyani. Janiyari cuniqui mishinijionutaniya puetunu cua carojotasano cua cuhuari-quiajinijiniojuanaani, puetunu cua jiitiasano casamijianaanio. ¹⁹Na nuhuaji, janiyari tama cua cuaqueyajaaja sequenutaniyani: ‘Pueyanonaa, quiarijia cutara juhuajaniya quia quiri. Quiaari queraatia casamiriacacuaaja, queraatia marijiara. Quiaari queraatia quia miaque-socoriquiano jiitiaacuaja. Quiarijia cutara quia samaatere. Quia miaquere. Quia rature. Tama quia cuaqueyajaaja quia shuqiritiri”. ²⁰Cuno niucuaaja, Pueyasoori na sequequiaari: “Moseeca-naa, quiaari quiarijia macu juhuaquenutaniya. ¿Canteeri puetunu quia jamuesano casamijianaa jiitianutani-ya quia nuhuajini? ¿Canra na quiniutianiyarini?” ²¹Naa miishaanutani-yari puetunu pueyajanaa, cante saaja tama nerajaja ratatequiaa casamini. Cuno, jamuejaca casamiriaca pueyani, nojoriiri seetanujuanaa casamiijiuniucua Pueyasora.

Pueyasoori na muerasu cojuaja maninia
(Mt 6.25-34)

²²Na nuhuaji, Jesuuri na saquirojosano pueya sequequiaari:

—Naaratej nia sequeyanijia pueyanaa, majaari nia tacaaniu casaa nia miaquenu-taniyani, casaa nia cushiniutianiyan.

²³Pueyasoo jaara pa shipiniquiaari saminio pa quiniuria, majaari jiyajeneta nera na rishitiniuria pajaniyajuhuj. Naajaari-huj, nojuaja jaara pa cuaqueya shipiniquiaari, majaari jiyajeneta na cushitiniuria pajaniyajuhuj. ²⁴Riquiacu-jua nia niquiriquia. Majaari nojori natoojonu. Majaari nojori carojotanu na racatasocoriquiano, na nuhuaji na mijosocoriquiano. Naajuhuj, majaari nojori jiitianu na mijosano na racataja. Majaari tiaca nojori jiitianu na carojota-sano nojori racatajarajuhuj. Naajaa, Pueyasoori nojori mijotequiaa. Niaa cutaraari socua jiyanhua Pueyasoo panishano cuno riquiacuhujajini.

²⁵Naajuhuj, nia nequesotaanijia, niaa jaara socua tamonu juucara rishiniu paniriquia quera nia shaajenu panishacari, ¿nia naatateeri socua rishiniu, jiyanhua nia tacaaniutia? Maja nia naata. ²⁶Naaratej, nia tacaaniu jaara najuhuaa quiya socua shiitaniyojua nia rishiniuria, ¿niaatucua casaara tacaari tamonu casaacuan?

²⁷Natau shuucuaca nia niquishurij, taa nojori corequetaani. Majaari nojori poonijionu. Majaari na cusupuenuunujuhuj. Supuetana jiyaniijia Salomónri jiyanhua shanhua toqueyaraca quiquiaari. Cuno jiyanhua shanhua niquishano na cushishano toqeni, naajaa, majaari na shototanu cuno natau shuucuaca. ²⁸Pueyasoori cuno natau shuucuaca shipiniquiaari rupaquijia nia shanhua niquishocoriquianotej. Jaara sorere, tariqui catijiashiya saniniurijia

pan majeetetajara. Pueyasoo jaara naa maniniushitiyacuaa shuucuacatej, ¿majateeri na naata cushitiniu niajaniya-juhuj, jatarinitiaja Pueyasoo tua tiuujiacanaa? ²⁹Naaratej, nia sequeyanijia, maja nia tacaaniutia nia pajenu casaa nia miaquenutaniyani, casaa nia ratunutaniyani. ³⁰Pueyasoo niishiyashijia-pueyari pueyaracaanu na panishano casaacua tacaquiaa. Niajaniya cutaraari Queraca. Nojuacuajaari tari niishiya puetunu nia panishanojuanaa. ³¹Naaratej, nia niishiriojore Pueyasoo panishano nia miiniuria. Nojuajaari saniniuuja nia niqutionutaniya puetunu nia panishanojuanaa.

Nia casami nia racatare Pueyasoo shuriucua
(Mt 6.19-21)

³²Maja nia puerenu, cua muerasuniyojuanaa. Niaari secajaniyojua. Naajaa, cua Queeri nia panijia. Capora na quiniucua, inia niqutionutaniya puetunu na jiitiasanojuanaari! ³³Nia casami nia niqutiojore cumaneecara. Na nuhuaji, cuno cumaneeca nia niqutiojore nareja casamijiuniucua pueya. Naa nia miishacaritij, niaari jiyocuaaanu racataa nia jiitiasano. Tee Pueyasoo racataa nareja nera nia niqutiosanocujani, cuniqui, nia cumaneeca quiquioori maja na piquiniu. Niaari tii nia racatasano jiitianutaniya pueyaracaanu. Majaari nohuasejojua na naata nocua tiuquiniu na nohuasenua. Naajuhuj, surequeyari maja na naata miaquenu nia casami tii. ³⁴Nia casami jaara naa racatasano quiya jiyocuaaanu Pueyasoo shuriucuatej, niaari saaja Pueyasoo nia niishiriojonutaniya, tee nia casami racatasano quiyacuaani.

Jeenucasano nia quiri nia Jiyaniijiaacujia

³⁵Juhuaa jeenucasano nia quiri pueyaracaanu, nia sashishacari nia Jiyaniijia, taa tiajiniaaco maninia

seyacuaani. Nojori sashishacari na jiyaniijia, nojoriiri na toqueya cushiyono quiya tari, na samaritiu noshitishanoju-huaj. ³⁶Naa jeenucuasano nia quiriijihuaj, juhua cuno seyaja. Nojoriiri na jiyaniijia sashiya na caminiujiniji na tiuquishacariuhua. Nojuaja jaara tohuateya piquishuhua, nojoriiri ritia nocuaji riatanutaniya tia tohuateya. ³⁷Shuquiriaatia quijiaca cutaraari cuno seya, canapue te na jiyaniijiaacuaji suteyajaani, na jiyaniijia cuaara tiuquiriohuajaatijia. Seetanujuanaa nia sequeyanijia, nojori jiyaniijiaari nojori cajitijionutaniya miaquejajinia. Na toque maniniuqui jocuanutaniyari na mianuutenura nojori. ³⁸Nojori jiyaniijia jaara tiuquiriohua shiyaqueya, juhuaquenu panishacari, naajaa, shuquiriaatia quijiaca quiniutaniyari cuno seya, nojori jaara suteyajaa tia tohuateya riatariquiano nojori jiyaniijiaacuaji. ³⁹Nio nia niishirijihuaj, tia camaru jaara niishiri taacari nohuasejoja niniutianiyan, nojuaja maara suture na tia cojuanura, maja nohuasejoja tiuquiniuria na casami na nohuasenura. ⁴⁰Naajuhuaj, jeenucuasano nia quiri pueyanaa, juhua cuno sutejaca seyaja. Niaa jaara jiyaniya juhuanajuaja maja cua tiuquini quiniutianihua, janiyari jiyacari nia jiyajenetenutaniyani.

**Jesu pohuatasano maninia serujiniji,
sesa serujinijinio
(Mt 24.45-51)**

⁴¹Jiyacaritij, Pedroori Jesu nequesotaree:

—Jiyaniijianaa, ¿quiaate nio pohuataree saa canaaraja, puetunu pueyarajanaa soj?

⁴²Jiyaniijiaari na riucaaree:

—Tamonu seru jaara maninia seru quiri, nocua tiuushano, niishijiajuhuaj, na jiyaniijiaari cuno na seru jiyatenutaniya narta seya jiitariquiano na niti na

niyacari. Nojori jiyaniijia niyacari, cuno seeratasano seruuri narta seya mianuutenutaniya maninia, taa nojori jiyaniijiajanaa mianuutequiaa nojoricuaani. ⁴³Cuno seruuri shuquiriaatia quiniutianiya na jiyaniijia jaara na riuriatasuhua naa maninia miyanojua, taa na sequesaaquiaari na miiniuriacuajani. ⁴⁴Seetanujuanaa nia sequeyanijia, na jiyaniijiaari cuno maninia seru jiyatenutaniya puetunu na jiitiasano casamijianaa cojuana na quiniuria. ⁴⁵Saniniuujia, cuno seru jaara sesa miiniuria niishiriojore, na jiyaniijiaari na jiyaniijiaari jiyanhua tarishiniutianiya, nojuajaari niishirionutaniya nojuaja na naata miiniu na panishano. Cunora, nojuajaari narta seya majoonu coteenutaniya, seya maajipohuanio. Naajuhuaj nojuajaari saaja miaquejonutaniya. Pueyaracaanu rarujunutaniyari. Mashaasequejonutaniyariuhua. ⁴⁶Na jiyaniijiaari na jiyaniijia juhuanajuaja maja na tiuquini quiniutianihua, jiyacaritij, cuno juucaja, na jiyaniijiaari tiuquiniutianihua canashiaquiji. Naa cuno seru miiniuucua sesatej, na jiyaniijiaari jiyanhua na saniitionutaniya. Na jatanutaniyari Pueyaso tojiyashijiaca pueyata na saniitiosocoriquiano.

⁴⁷Tamonu jiyaniijia jaara na seru rootare maninia, taa nojuaja miiniutianiyan, cuno seru jaara jeenucuaaquiri na jiyaniijiaacuaji, mariyata jaara miyaquiri taa na jiyaniijia sequequiaari na nuhuajiriacuajani, nojuajaari jiyanhua majacusaanutaniya cutara. ⁴⁸Saniniuujia, tamonu seru jaara sesa miiri na niishiyaquiniuucua na jiyaniijia panishano na miiniuria, nojuajaari saaja secaja majacusaanutaniya. Naajuhuaj, cante queraatia niquitiosaareeni, cuno serujinijiri queraatia masenu panishaanutaniya. Naajuhuaj, cante jiyatesaaree queraatia jiitiana na quiniuriani, na jiyaniijiaari

nocua tiuuniutianiya socua jiyanoehua maninia miihia na quiniuria.

Jesuucua tiuuijacaari narta pueya panishoo
(Mt 10.34-36)

⁴⁹Mijiria niquiaarinijia, juhua mani cua noshitiniuria pueya tajinia. iSeetanujuanaa na noshitiriquia tarinij! Cua rupaari juhua mani quiniutianiya.

⁵⁰Coteenu, janiyari jiyanoehua saniniujiushaanutianiya juhua manitiani. Nocuaji coojaari tacaya janiya jaara naa miishaa-rejaatijia. Seetanujuanaa na jiyateriquia tariucua tucuateenonij. ⁵¹¿Niaateeri jiyaniya janiyari niquiaarini mijiria quiniiaa quiniuria juhuajaniya? iMaja! Seetanujuanaa nia sequeyanijia, janiyari niquiaarini pueya cua raquiriojotanura.

⁵²Naaratej, pueyari quiarijia juayonuutanu coteenutianiya. Pueyano jaara necocuata jiitiare jiuujianaraca niquiohuan na tiajinia, jiuujianaraca nojorijinijinio jaara cucua tiuuri, cuno caapiqui cucua tiuyashijacaari saniniujia nojori juaajiaa quiniutianiya. Naa noojiaqueya pueyajinijinio tiuuniucua cucuatej, queraatia pueyari naa tama tacaresetanutaniyajaacujua. Naacuajitij, tamonu tiajinia, querajaa pueyari caapiquiriyatu cucua tiuuijaca juaajiaa quiniutianiya.

⁵³Pueyari necohua paracaajia quiniutianiya, necohua tiuushacari cucua. Naajuhua, necohuari na que paracaajia quiniutianiya na que tiuushacari cucua. Naajuhua, maajipohuari necojori paracaajia quiniutianiya necojori tiuushacari cucua. Naajuhua, necojoriiri na nucua paracaajia quiniutianiya na nucua tiuushacari cucua. Naajuhua, maajipohuari necohua niquiocohua paracaajia quiniutianiya, necohua niquiocohua quiniuucua cucua tiuuijaca. Naajuhua, pueya niquiocohuari na quinia paracaajia quiniutianiyajuhua, cucua tiuuijaca na quinia quiniuucua.

Pueya cuaara niishiiria quiarijia Pueyaso miishanojiniji, casaa na niishitiniu paniani
(Mt 16.1-4; Mr 8.11-13)

⁵⁴Jesuuri naa sequequiaari pueyajuhua:

—Niaa jaara niquitioocua niquiquiaa pananu tiuquishocora, niaari sequequiaa: “Maruqui niniutianiya”. Seetanujuanaa naa quiquiaari. ⁵⁵Naajuhua, paratu jaara piyarojoquiaa pananu shuucua, niaari sequequiaa: “Tacareejonuqui quiniutianiya”. Naa quiquiaari. ⁵⁶Pueyanaa, ¿niaateeri seetanujuanaa niishijiaa? Niaari maninia niishiquiaa jiya cajiniocua nia niquishano, nio jiyajinia nia niquishanonio. Saniniujia, nia niquishacari quiarijia Pueyaso miishano nia niquiara, majaari cuno nia niishiniu, casaa na sequenu paniani. Naaratej, majaari seetanujuanaa niishijiaa niajaniya.

Niaacuara tonujunata nia jeecatoore
(Mt 5.25-26)

⁵⁷Niaacuajaari niishiya, sesa miijiacaari saniitiosaanutianiya. Naaratej, tama niajaniyajaaja nia niishiriojore, casaate maninia nia miiniuriani. ⁵⁸Tamonu pueyano jaara quiocuara tonujure quia sesonuucua na casaa, quia saniri juhuata nata pocoojonu maninia, na jaatucusacari quiajaniya nequesoreena pueyanocua. Quia sequerenoj casaa quia miiniutianiya nerani, na jiyanooniuria quiajaniya. Quiaa jaara jeecatoyaquiri nata, nojuajaari quiocuara saquiriojotanutianiya nequesoreena pueyano. Jaara quiocuara saquiriojotare nequesoreena pueyano, nequesoreenaari saniniujia quia niquitionutianiya na pueya, quia nujuate-saanura nujuatejojuajinia.

⁵⁹Seetanujuanaa nia sequeyanijia, majaari nia tohuatanu quiniutianiya nujuatejojuajini, niaa jaara puetunu

nequesoreena sequesano cumaneecajanaa niquitiorejaatijia niaacuara tonujuna pueyano.

Nioojia nia tacatore sesa nia quiniujiniji

13 ¹Jiyacari, tamasaca pueyari Jesuucua tiuquiiijioquiaari. Cuno pueyari naa Jesu pohuataquiaari:

—iJiyaniijia Pilatoori* Galilea jiyajini-jinio pueya puecoorucuaa! iNa nuhuaji, nojori nanaca cojitiriiri Pueyasooacara nojori puecoosano seya nanacata!

²Jesuuri nojori sequeree:

—¿Niaateeri jiyaniya cuno Galilea pueyari naa miishaarucuaa socua jiyanhua sesa miijiaca nojori quiniuucua narta Galilea pueyajiniji?

³Seetanujuanaa nia sequeya cutaranijia, nojoriiri maja socua sesa miijiaca quiquianu niajanijajiniji. Niajanijaju-huaj, niaa jaara tama nioojiajaaja tacatoyaquiri sesa nia miiniujiniji, niaari taraatia puecoosaariquianojuhuaj.

⁴¿Cuno dieciocho pueyariuhuj, canapue-te cusunucanu cuno jiyaconaja tia jaara nojori shiniacacanu Siloé cuari shuriucuatej? ¿Niaateeri jiyaniya nojori socua sesa miijiaca quiquianu narta Jerusalén tiacajinia quiniaa pueyajiniji?

⁵Seetanujuanaa nia sequeyanijia, nojoriiri maja socua sesa miijiaca quiquianu niajanijajiniji. Janiyari quiarjia nia numooteyani, niaa jaara tacatoyaquiri nioojia sesa nia miiniujiniji, niaari taraatia puecoosaanutaniyajuhuj.

**Miriqui Jesu niishitiojosano
muetuhuo naanajiniji**

⁶Jesuuri na nuhuaji pueya niishitiojo-quiaari nio miriqui pohuatasana:

—Tamonu pueyanoori higo naana jiitiaquiaari na uva cuhuariquiajinia. Tamacari, na camaruuri nocua quiaquiaa-ri na niquiniuria. Na jajau mianu paniriquiaa juucuaari. Shaanoori

quiriquiaa. ⁷Cunora, na cuhuariquia cojuana sequereeri: “Quia niquiri nio naana. Janiyari pueyaracaanu najuhuaa niquiaani na jajau pajenura. Pueyaracaa-nu metuyaquiyari. Tari na shocojorucuaari jiuujianaraca marijia. iQuia nure! Tamonu cuaara na nujuasa-qui natasaaria, na metunura cutara”.

⁸Cuhuariquia cojuanaari na riucaaree: “Jiyaniijianaa, quia tarinitiarejaara tamonu marijia. Janiya na pajama jiya tacarojotanutaniyani na sasetanura. Na nuhuaji, janiyari juunu cueaca na pajama paatiniutaniyani. ⁹Janiya jaara naa na miirini, metunutaniya naasucua. Jaara metuyaquiri, pocua socua na nureni”. Naajuhuj pueyanaa, Pueyasoori sashiya, maninia miijiaca nia quiniuria.

**Jesu jeeacasacari porocuatucua
samaatenu juuca**

¹⁰Tamonu samaatenu juuca, Jesuuri tamonu tiacajinia niishitiojoriquiaa Pueyaso secojojua tiajinia. ¹¹Tamonu maaji cusosuuri tii quiriquiaajuhuj. Dieciocho marijiaari na shoconujuquiaari porocuatua na quishacari. Samaruuri naa na jiyatequiaari. Majaari quenaaja na naata maninia nujuanu quijia. ¹²Jesu jaara na niquiquiaari, na sequereeri:

—iMaajiniaa miji! iQuia nijiniacuaja tari jeequerohua!

¹³Jesuuri na juaashiquia niaree maajiicua. Jiyacaritij, maajiiri maninia jeequequee. Nojuajaari Pueyaso maniniu-huaqueetanu coteeree naa na miishaanuucuatej. ¹⁴Pueyaso secojojua tiajinia jiyaniijiaari juaarii naa Jesu miiniucua samaatenu juuca. Naaratej, tii quiniaa pueya sequeree Jesu niquiaraari:

—iSeis juucacuaajaari quiya puetunu semaanajinijanaa pa poonijionura! iNiocua cuno juuca nijioriquia nia naatanijiosaanura, maja samaatenu* juuca!

¹⁵Jiyaniijia Jesuuri sequeree:

—iSapueni juhua maninia mijiica niquishano pueyanaa, puetunu niajaniya-janaari nia juunu, nia burro samaacartaquiaa samaatenu juuca, nia jaatucusocoriquiano mohuaca na raatenura! ¹⁶¿Nio maajiiriuhuj? Nojuaja cutaraari supuetana Abraham niquiohua-cuajinio supueno. ¿Majateeri maniniajuhua samaatenu juuca pa samaacatanura Satanás morojosano? Dieciocho marijiaari tari nio maaji shoconjurucuaa pueyaracaanu porocua-tu na quishacari.

¹⁷Naa Jesu sequesacaritij, puetunu na paraajanaari caririquitiuri. Saniniuuja, puetunu pueyajanaari shuquiriaatia quiriquiaa nojori niquishacari queraatia maninia Jesu miishano na cumaacata.

**Miriqui Jesu pohuatasano
mostaza jajaujiniji**
(Mt 13.31-32; Mr 4.30-32)

¹⁸Jesuuri sequequiaari:

—¿Taate cua naata niishitiojonu niajaniani, nia niishiniuria taa Pueyaso poonijiya pueya jiuujiajinia na rupaatani? ¹⁹Na rupaari juhua mostaza jajauniyojua, pueyano natasano na cuhuariquiajinia. Cuno jajau jaara moritiare, puereetuucara caneyari. Naacujitij, shuhuari na cashacucuaacua jesuya. Naajuhuj, Pueyaso rupaari caneya pueya jiuujiaacajini puetunu nio jiyajiniajanaa maninia mijiica nojori quiniuria.

**Miriqui Jesu pohuatasano
pan poreetajajiniji**
(Mt 13.33)

²⁰Jesuuri nio pohuataquiaari socua:

—¿Casaa cua pohuatanutaniya nia niishiniuria taa Pueyaso poonijiya mijiria na rupaatani? ²¹Pueyaso rupaari juhua pan poreetaja maaji cojitishano trigo cashojuata, shanacusano jiuujianaraca

shiitianiyojua tohuatashijinia. Pan poreetajaari puetunu cuno cashojua miniquiootasanojuanaa poreeteja. Pueyaso rupaari naa poonijiojuajuhuj.

**Juhua shiitianiyojua tohuateyari quiya
Pueyasoocua pa quianura**
(Mt 7.13-14; 21-23)

²²Jesuuri Jerusalén tiacajiniara quiariquiaa na pueyata. Nucuacono quiasacari, pueya niishitiojoriquiaa tiacajiniaari, shiitianiyojua tiacajinianio. ²³Jiyacaritij, tamonu pueyanoori na nequesotaree:

—Jiyaniijianaa, ¿saaja quenaaraqui pueyateeri Pueyaso pueyara jiyatesaanutaniya?

Jesuuri nojori riucuarée miriqui:

²⁴—Jiyanohua nia saniniujiuri shiitianiyojua tohuateyaco nia tiuquiniuria, Pueyaso nia rupuenura. Juhucarijia nia numooteyanijia, queraatia pueyari nocua tiuquitianu paniniutianiya juucua. Majaari nojori naata quiniutianiya saaja. ²⁵Cua tojitiare. Tia camaru jaara sanere, tohuateya tionutaniyari. Nijaniya, cante na tia carijiniacuma quiyajaani, niaari tohuateya piquiniuniutianiya najuhuanaj. Naa jaara naa nacare: “iJiyaniijianaa, canaacuaji quia riatare tohuateya!”, nojuajaari nia riucuanutaniya: “Maja cua niishiniu tejenote nijaniyani”. ²⁶Jiyacaritij, niaari juhuacatecara sequenutaniya: “¿Majateeri canaa quia niishiniu? Canaacuajaari quiata miaquenuujuani. Canaari quiata ratujua mariyatani. Quiaacuajaari canaa tiaca nuucucacajinia niishitiojojua”. ²⁷Tia camaruuri nia riucuanutaniya: “Janiya-cuajaari tari nia sequereeni, maja cua niishiniu tejenote nijaniyani. Nia quiojorohua niiquiji, puetunu niajanijayanaa sesa mijiicacanaa”. ²⁸Naa na taanuusacari nijaniyatej, niaari nujuquetunutaniya. Niaari nia quiaa

miaquenutaniya jiyanoehua nia taraajenu-ta, nia niquishacari Abraham, Isaac, Jacobo, puetunu pueyara Pueyaso sequesano caminiujiuniaa Pueyaso shuriucua quiyanocuaa. ²⁹Queraatia tamasa pueyapueeri nijionutaniya puetunu jiyacajiniinijuanaa Pueyaso shuriucua cajitiuniuria, nojori miaque-nuunura nata. Nijionutaniyari pananu muetasamaji, pananu tiuquishacoinio, pananu shuucuaaji jiyacajiniinio, pananu muetasamaji miaquetajara jiyacajiniinio-juhuaj. ³⁰Quiarijiani, queraatia pueyari juhua tojishoo quiya narta pueyara. Cuno quishacari saniniuujia, nojori cutaraari seetanujuanaa tojishano pueya quiniutianiya Pueyasora, Pueyaso tojitiajaca nojori quiniuucua mijiria. Naajuhuaaj, quiarijiani, queraatia pueyari juhua tojishano pueya quiya narta pueyara. Saniniuujia, jiya puequesacari, nojoriiri najuhuana quijiaca quiniutianiya Pueyasora, nojori tojitiaaquiniuucua nojuaja.

**Jesu taraajesacari Jerusalén
tiacajinia quiniaa pueyacua
(Mt 23.37-39)**

³¹Jiyacari noojiaqueya Fariseocuacaari Jesuucua tiuquijioquiaari. Nojoriiri Jesu numooteree:

—iNiiquiji quia mashiri! iJiyaniijia Herodes quia monu paniya!

³²Jesuuri nojori sequeeree saaja:

—Cuno pueyanoori niishijia juhua jaami. Naa nia caminiujiushuhua cua sequesano cuno jaamiria: “Janiyari samaruhua tohuatanijiyani. Janiyari cusosuhua naatanijiyajaanihuaj. Janiyari naa miya quiarijiani, tariquijiu-huaj. Janiyari tama tariqui tucuanutaniya puetunu cua miiniu panishanojuanaani”. Naa nia sequesuhua cuno pueyano. ³³Cuaara rupaquijia cua sashiiria. Janiya quiarijia rucuananutani-yajaarani, tariqui, tama tariquinio.

Janiya cuaara mosaaria cutara Jerusalén tiacajinia, tee cuniqui puetunu pueyara Pueyaso sequesano caminiujiuniaajanaa puecoosaaquiaaricuaani. Majaari tamaqui cua monu quishaanutaniya.

³⁴Jerusalén tiacajinia quiniaa pueyanaa, niaacuajaari Pueyaso sequesano caminiujiuniaa puecoojuaca. Niaari Pueyaso jiyaramiquishano pueya jacujuaca saitia. Janiyari juucua pueyaracaanu nia rerejonuucua jiaatiajani, taa caacara-ja necohua rijioquiaacuaa na nesu cariquiaconi. Niaari saaja paniyaquiquiaa cua cojanura niajaniya. ³⁵iCunora, cua tojitiaari! Nia quiquioori tojetaarucua-janaa shaaqui quiniutianiya. Naajuhuaaj, majaari socua nia niquiniu quiniutianiya janiya, niaa jaara nia timitiasacari janiya sequerejaatia: “iCuaara shuquiriaatia quiria pa Jiyaniijia, Pueyasojiniji tiuquihuano!”

**Jesu naatanishacari cusosu
poreno pueyano**

14 ¹Tamonu samaatenu juuca, Jesuuri tamonu Fariseocuaca jiyaniijia tiajinia quiaquiaari miaquenu-ra, socua tamasa Fariseocuacatanio. Nojoriiri Jesu shootiaturiquiaa nojori niishiniuria casaa na miiniutianiya samaatenu juucani. ²Jiyacaritij, tamonu pueyanoori Jesu taccoji nujuariquiaa, poreno cusotaano. ³Jesuuri Moisés Rootasanojiniji niishitiojonaa nequesota-ree, Fariseocuacano:

—¿Taa nia serojuquiaa Moisés Rootasanojiniani? ¿Maninate cusosu pa naataniniu samaatenu juuca?

⁴Nojoriiri saaja sanaa na tojitariquiaa. Jesuuri cusosu quiaeree jiyacari. Na naataniriiri. Na jiyarorohua na tiajiniaari. ⁵Na nuhuaji, Jesuuri cuno Fariseocuaca sequeeree:

—Nia burro, nia juunu jaara raama tiyare samaatenu juuca, ¿niaatucua

samaatenu juuca shocoterejaara, raamajini jaaniuhua nia seru?

⁶Majaari nojori riucuanu quirii quenaaja.

Taa pa miyani queranacunura masuusano pa quishacari, taamueca pueyate masuushiyajaaniuhuj

⁷Jesuuri shootiariquiaa taa masuusano pueya socua panishano cajitiucujinia nojori cajitiuniuria riutioconeetariquiaani. Jesuuri cunora nojori niquiara pohuateree nio pohuatasano. Naa sequereeri:

⁸—Quiaa jaara masuusaariquia camishacari queranacunura, maja cumaati quia cajiniu socua tojishano pueyano cajijiaranojinia, tamonu pueyano mariqui tiuquiriiri socua tojishano pueyano quiajanijajini. ⁹Socua tojishano pueyano jaara tiuquishii, nia masuuna pueyano naasucuaari quiocua niniutianiya na sequenura quiajanija: “Shiiquia. Quia sanere nio pueyanooquaji”. Naacuajitij, quiaari cajitishaanutaniya quia caririquiniutia pueya paniyaquishano cajitiujinia, miaqueja puequeetujinia. ¹⁰Nocuaji nia sequeyanijia, niaa jaara masuusaariquia miaquenura tamonu tiajinia, niocua cajishiiquia socua paniyaquishano cajitiujinia. Naacuajitij, quia masuuna jaara niquiri quiajanija, nojuajaari quia sequenutaniya: “Cua rupuenanaa, iniya quia cajishii socua panishano cajitiujinia!” Naacuajitij, cuniqui quiata quiniaari niishiniutianiya, quiajanijajini nia masuuna panishano pueyano. ¹¹Naajuhua Pueyasora, cante tama na cuaqueyajaaja jiyateya juhua tojishano pueyano na quiniuriani, nojuajaari cararasaanutaniya. Saniniuujia, cante tama na cuaqueyajaaja jiyateya juhua panishoo pueyanoni, nojuajaari maninia jiyatesaanutaniya juhua tojishano pueyanora.

¹²Jesuuri na masuuna pueyano sequereejuhujaj:

—Quiaa jaara queranacunu paniya, majaari quia masuunu saaja quia rupuenaa, quia tapueyocuaca, quia panishano pueyano. Naajuhujaj, majaari quia masuunu quia shuriucua quiniaa casamiriaca pueya. Quiaa jaara nojori masuure, nojoriiri quia masuunutaniya saniniuujia. Naacuajitij, quiaari tari namishaarohuacuaja. Cunora, majaari socua quia masenu quiniutianiya Pueyasojiniji. ¹³Naaratej, quiaa jaara queranacunu paniya, quia masuure casamijiuniucua pueya, sesaruneca pueya, sesacujuanucua pueya, cariyojuarujurinio. ¹⁴Naacuajitij, quiaa jaara naa miiri, quiaari shuquiriaatia quijia quiniutianiya cutara. Majaari nojori naata masuunu quiajanija saniniuujia. Naaratej, Pueyaso cutaraari maninia miiniutianiya quiajanija saniniuujia, na samiitianijosacariuhua maninia miijiaa pueya.

Miriqui Jesu pohuatasano na queranacunujiniji
(Mt 22.1-10)

¹⁵Jesuta cajiyano pueyano tojishacari naa Jesu pohuatasanotej, Jesu sequereeri:

—iShuquiriaatia quijia cutaraari cuno, cante Pueyaso shuriucua miaquenutaniya jiyocuaanuni!

¹⁶Jesuuri na sequeree:

—Tamonu pueyanoori queraatia sumatuquiaari pueyata na queranacunura. Nojuajaari coteenu queraatia pueya masuuquiaari. ¹⁷Quera miaquenuusacari, na seru jiyaroreeri na masuusano pueya na sequenura: “Miji, puetunujuanaa tari jeenucuasaaree niaacuaji. Nia miaqueese”.

¹⁸Puetunu masuusano pueyajanaari juhuacatecara sequequiaari maja na naata quianu miaquenuucua. Coteenu

masuusano pueyanoori cuno seru sequeeree: “Janiyari shusha maseree tamonu cuhuariquiani. Janiyari nocua quiaa na niquiniuucuan. Cua jiyanoori quenaaja. Maja cua naata quianu quiata queranacunuucua”. ¹⁹Tamonu masuusano pueyanoori sequeeree: “Janiyari diez poonijiojuaca juyaca masereeni. Na saniniuucua quiaanjia. Quiocua cua jiyanoori cua quiaaquishacari queranacunuujinia”. ²⁰Tamonu masuusano pueyanoori sequeerejuhuaj: “Shusha camiriinjia. Cunora, maja cua naata quianu”. ²¹Seruuri tamajaaja tacateyaro-hua na camarnu tiajiniohua. Na jiyaniijia pohuatasuhua na masuusano pueya sequesanoori. Na jiyaniijiaari juaaquii. Na seru sequeereeri: “Ritia quia quiaare tamasaca pueya masuunuucua tiaca nucuaacaco. Miji quia rijiocoo casamijiu-niucua pueya, sesaruneca pueya, sesacujua pueya, cariojuarujuri pueyano”. ²²Seru tiuquishacarihua, na jiyaniijia sequesuhuari: “Jiyaniijiana, janiyari tari miiriini taa quia sequeeree janiyacujani. Juhuanajuaja maja tia mishiniu”. ²³Na jiyaniijiaari na sequeeree: “Socua pueya quia pajecoo tiaca nucuaacaco, tamasaca tiacajiniara nucuaaconio. iSocua pueya quia nenecojocoo nojori niniuria, cua tia mishiniuria! ²⁴Seetanujuanaa nia sequeyanijia, coteenu cua masuusano pueyajininioni, majaari quenaaja niquiriyatu nojorijinijinio saniniu quiniutianiya cua sumatusano”.

**Saaja tama na cuaqueya panitiajaajarijia
na naata Cristo nuhuajiniu**
(Mt 10.37-38)

²⁵Jiyanohua queraatia pueyari Jesuta quiojoriquiaa. Jesuuri nojoriicua tacateree. Nojori sequeereeri:

²⁶—Cante cucua niya cua pueyano na quiniuriani, nojuaja cuaara niishiiria nio.

iMaja nia naata cua pueyano nia quiniu nia paniaquishacari janiya socua nia quejiniji, nia nucujinijinio! Nia niquiocua, nia niquiohua, nia tapueyo-cuaca, nia rimiatuhajuahuaj, nia panishacari nojori socua janiyajiniji, imajaari nia naata cua pueyara nia quiniu! Naajuhua, imajaari quenaaja nia naata tama nia cuaqueyajaaja panijia nia quiniu socua janiyajiniji! ²⁷Cante tama na cuaqueyajaaja panitiaaquijia cucuarani, majaari na naata cua pueyanora na quiniu. ²⁸Niaa jaara jiyaconaja tia tianu paniri, imajate coteenu nia cajiniu nia niishiriojonura taa cumaneecate panishaanutaniyani, na tucuatnura puetunujuanaa? Naajuhua, niaari niishiriojiya, queraatia quiyacuajate nia cumaneeca. ²⁹Niaa jaara coteenu naa miyaquiri, niaari najuhua morijucua nujuatejonutaniya, na nuhuaji majaari socua nia cumaneeca quiniu nia tucuatnura nia tia. Puetunu nia tia niquiniaajanaari juhuacatecara nia macaatiutiutianiya. ³⁰Nojoriiri sequenutaniya: “Cuno pueyanoori tianu coteecanu najuhuanaj. Majaari na naata na tucuatnua quiarijia”. ³¹Naajuhua, jiya jiyaniijia jaara quianu paniri narta jiyaniijia miaquetonura, imajate coteenu na cajiniu na niishiriojonura, na naatate diez mil na pueyata shocotanu cuno tamonu jiyaniijia, nocua niyano veinte mil na pueyatani? ³²Cuno jiyaniijia jaara niishiri, maja na naata na shocotanu quiniutianiya narta jiyaniijia nocua niyano, majaari na miaquetonu quiniutianiya. Saniniuujia, tucuaaanu narta jiyaniijia quishacarijia, nocua jiyaramiquiniutianiya na pueyari, nata nojori pocoojonura maninia, nojori jiyanoootoonura. ³³Naajuhua, niaa jaara carteyaquiri puetunu nia jiitiasanojuanaa, majaari nia naata cua pueyanora nia quiniu.

Miriqui Jesu pohuatasano shonijiniji
(Mt 5.13; Mr 9.50)

³⁴Shoni jaara tiquiriigua quiya, maniniaari, pa panishano. Jaara shaacara quiqui, ¿taate na naata tiquiriigua na quiniuhua? Maja na naata. ³⁵Najuhua-na quiyari. Majaari quenaaja maninia na quiniu cuhuariquiajinia jatasocoriquiano maninia na moritianiniuria nataacuaca. Majaari quenaaja maninijuhua, na paatishaanura na moquijianura, natau pajama niojosocoriquiano. Jaara naa maninia quiyaquiriti, nareja jatashiyari. Cante numaaracani, cuaara tojitiaara miriqui cua pohuatasano. Cuaara na niishiiriajuhuaj. Seetanujanaa cua tojitiajaca pueyani, nojoriiri juhua shoni mijiria.

Jesu pohuatasano miriqui
tashucano borregojiniji
(Mt 18.10-14)

15 ¹Roma tiacajinia quijia jiyaniijia-ra cumaneeca masejona, mariyata sesa mijiaca pueyari Jesuucua nijioriquiaa na pohuatasano nojori tojitianura. ²Cuno pojoriiri Fariseocuaca soosano pueya quiriqiaa, Moisés Rootasanojiniji niishitiojona soosano pueyano. Cunora, Fariseocuacaari, mariyata Moisés Rootasanojiniji niishitiojonaari tama rimiaaqueturiqiaaja Jesuucua. Naa pocaturiquiaa Jesuuri: —Cuno pueyanoori sesa mijiaca pueya shanacuquiaa nocua nojori nijionura. iJuhajaniya nojoritia miaquequiaaja-riuhua!

³Naaratej, Jesuuri nojori niquiara pohuataree nio miriqui pohuatasano:

⁴—Niaa jaara cien borregohua jiitiriqia, nojorijinijinio niquiriyatunioyua jaara tashucua, ¿taa nia miiquiaani? ¿Niaatucua nia noventa y nueve borregohua cureeno tiujiaaquiri

rupaquijia cuhuariquiajinia, tashucano borrego nia pajenura, niaa cuaara na riuriatarohuaatijia? Taaquiriirinij. Niaacuajaari naa miiquiaaquij. ⁵Niaa jaara na riuriatasee, niaari nia shuquiriniutia na paquiohua nia numeecuaji. ⁶Niaa jaara na tiuquitarohua nia tiajiniohua, niaari nia rupuenaa, mariyata nia shuriucua quiniaa rerejotenutaniya nia sequenura nojori: “iCuata nia shuquiriri quiarijia! iTari riuriatarohua cua borregonioyua tashucuanonijia!”

⁷Seetanujanaa nia sequeyanijia, naajariuhua, jiyocuaaanu quiniaari jiyanohua shuquiritiqiaa niquiriyatu sesa mijiaca noojia tacatore sesa na miiniujiniji. Cuno pueyanoori socua jiyanohua shuquiritasano tamasa noventa y nueve pueyajiniji, canapuetucua tari maninia pueyacuani.

Jesu pohuatasano miriqui
juurequetesano cumaneejiniji

⁸Naajuhua, tamonu maaji jaara diez cumaneecaraca quiri, jaara niquiriyatu juurequetera tiajiniaaco, ¿maatucua taa miirini? Na samaritiu noshitiniutianiyari, na tia na netoonujunura. Pueyaracaanu jacaria na pajenutaniyari cuaara na riuriatareajaatijia. ⁹Na riuriatasacari na juurequetesano cumanee, maajiiri na rupuenaa, mariyata na shuriucua quiniaa maajipohua rerejotenutaniya na sequenura nojori: “iMiji nia nimia! iCuata nia shuquiriri! iTari riuriatarohua cua juurequetesano cumaneenijia!” ¹⁰Seetanujanaa nia sequeyanijia, jiyocuaaanu Pueyaso seyari naa shuquiriquiaajuhua sesa mijiaca noojia tacatore sesa na miiniujiniji.

Jesu pohuatasano taa tamonu pueyano
jiyanoquiaari neyanuni

¹¹Na nuhaaji, Jesuuri nio pohuatareejuhuaj:

—Tamonu pueyanoori caapiqui niyanu-raca quiquiaari. ¹²Socua naatujuaari na que sequeree: “Cua quenea, quiarjia cua niquitioie quia jiitiasanojiniji, quiria quiriquiano quiaa jaara shaajeyare”. Naacujitij, na queeri puetunu na jiitiasanojuanaa niquitiojoree necohua. ¹³Socua naatujuaari rupaquijia camuee-nujuquiaari na que tiajinia. Na nuhuaji, puetunu na que niquitiosanojuanaa nojuajani, nojuajaari saniniuuja tamasaca na niquitiojoree na cumaneecara. Na nuhuaji, na cumaneecata quiaquiaari tucuaaanuuri, tamonu jiyajinia. Cuniqui, puetunu na cumaneecajanaa puecaquiaariiri sesa na miiniutia. ¹⁴Nojuaja jaara puetunu na cumaneeca puecaquiaarijianaa, cuno jiyajiniaari jijanohua miaajesacari quiquiaari. Mashajaari juhuacatecara miaajequiaari. ¹⁵Cunora quiaaree tamonu tahuecua cuno jiyajiniaari, nera na poonijionura. Cuno tahueri na jiyaroree na cuhuariquiajinia na cushiya na cojuanura. ¹⁶Mashajaari cushiya miaquesano miaquenu paniriquiaa juucua na miaajenuta. Cunoori tamaatia purootu cocua quiquiaari. Majaari tamonu pueyano niquitionu quijia quenaaja na miaqueso-coriquiano. ¹⁷Na nuhuaji, tama sequereearijia: “Cua queeri queraatia na tiajiniaaco seyaraca. Nojoriiri maninia miaquenuquiaa taquiya. Nojori sumatuuri cureequiaajuhua. ¿Janiyarijia-taj? iJaniyari niya quera cusoya cua miaajenutani! ¹⁸iCua queecua tacateyaro-huaraqij! Janiyacua na sequesuhuan: ‘Cua quenea, janiyari Pueyaso miiquianu sesani. Janiyari sesa miiquianu quiajani-yajuhua. ¹⁹Majaari socua na sequenu quia niyanuta. Janiyari puera sesa miijiani. Cua jiyatere juhuari juhua quia seru cua quiniuria, quiara cua poonijionura’”. ²⁰Naa na niishiriojonu nuhuajitij, mashajaari quiaquiaariuhua na queecua.

“Tucuaaanu na quishacarijia na que tiajiniji, na queeri na niquiri. Nocua taraajereeri. Nocua neteyareeri na naacunura. Na cacaseeri. Na nujuuneque-reejaariuhua. ²¹Neyanuuri na que sequeree: “Cua quenea, janiyari sesa miiquianu Pueyasoni, quiajaniyano. Majaari cua sequenu quia niyanuta”. ²²Na queeri saaja na tiaco seya sequeree: “iRitia! iSocua maniniuqui toque miji nia riquioo! iNiocua quianu cushitirinioj! iJaaniisho nia cushitiri! iSapatu nia cushitirijuhua! ²³Pa riuutianishano juunu niquiojua nia quiacoo mosocori-quiano. Quiarjia pa queranacure. Pocua miaquenuureni, quianu pa shuquiritiasacari. ²⁴Nio quianunioyuaari juhua macu quiriquiaa. Quiarjia samiitiarohuari. Nojuajaari shaajequiaari. iTari pocua muetarohuari!” Naacujitij, nojoriiri juhuacatecara queranacuquiaari. ²⁵Jiyacaritij, jiyapueranuuri cuhuari-quiajinia quiriquiaa. Na tacatesacariuhua tiajiniohuara, jaara tari cateca quiriquiaa, saaja pueya tojiriri jaaquequenuyanoori, nianujuniuyanonio. ²⁶Naaratej, na que tiaco seru piiriiri: “Miji, cua sequere, ¿casaara tiajinia cojuatuneshiyani?” ²⁷Seruuri na riucuaree: “Quia nuhuajisha-nacuaa tari tiuquiriohuano. Quia queeri shuquiriaatia quia maninia na tiuquishacariuhua, maja cusosu. Naaratej, canaa sequereeri querasapiquia juunu niquiojua canaa monura”. ²⁸Jiyacaritij, jiyapueranuuri jijanohua juaaquii. Majaari tiajinia na tiuquiniu paniniu quiriquiaa. Nocuai na queeri nocua tohuatamaa carijiniacuma, na nenecojonura tiajinia na tiuquiniuria. ²⁹Na que sequeree saajaari: “Quiaacuajaari niishiya, janiyari pueyara-caanu poonijioquiaa quiarani. Majaari quenaaja cua tarijionu quiquiaa quiajaniya. Naa maninia tojjia cua quishacari quiajaniyatej, imajaari quia niquitionu quiquiaari janiya quenaaja niquiriyatu

cabraniyojua, cua queranacunura cua rupuenata! ³⁰Quiarijia saniniuujia, quia niyanu seque tiuquishacariuhua, iquiaari querasapiquia juunu niquiojua moree nera! iNojuajaari quia cumaneeca puecacan u paanatujiuicua!” ³¹Na queeri na sequeree: “Sanajanaa, quiaari pueyaracaanu cuata quiya. Puetunu cua jiitiasanojuanaari quia casaa. ³²Naajaa, quiarijiani, maninia pa queranacure. Shuquiriaatia pa quirij. Quia tarajanuuri juhua macu quiriquiaa tari. Quiarijia samiitiarohua pajaniyaraari. Nojuajaari juhua tashucuacanu pocuaji. Quiarijia pocua muetarohuari”.

Miriqui Jesu pohuatasano pueyanojiniji, cante na jiyaniijia cumaneeca riutiocojuani

16 ¹Jesuuri na pueya pohuataquiaari nio miriqui pohuatasanojuhuaj, nojori na niishitiojonura:

—Tamonu casamiriaca pueyanoori tamonu pueyano jiitiaja na casami cojuariquiano, na cumaneecanio. Tamasaca pueyari cuno camarnu pohuataree na seruna na cumaneeca riuticoriquiaa jiyasohuaja, tama nerajaa-ja. ²Cunora, jiyaniijiaari cuno na seru sequeree: “¿Taa quia miiquiaa janiyani? iQuiaana sesa miiquiaa! Quiarijia cua niquitiore quia naajiotasano puetunu quia miishanojinijianaa. Majaari socua quia quiniu quiniutianiya cua casami cojuana”. ³Cunora, cumaneeca cojuanaari niishiriojooque. Tama sequereejaarijia: “¿Taa cua miiniutianiyarini cua jiyaniijia jaara cua jatara cua poonijosanojiniji? Janiyari maja cumueecani, cuhuariquiajini nia cua poonijionura. Naajuhua, jiyanojua cararaatiaari quiria, pueyajini-ji nareja cua mashiniquijionura cua panishano. ⁴iJaj! Tari niishiquiniijia taa cua miiniutianiyani tamasaca taraajenura cucua, nojori masuunura janiya nojori tiajinia cua quiniuria, janiya jaara nio

poonijosanojiniji jatasaaireni”. ⁵Naaratej, nojuajaari naa miiquiaari. Juhucatecara sequequiaari pueyari, nojori nijionura nocua, canapue na jiyaniijia niquitioj- quiaari casamicuajani. Coteenu tiuquinia pueyano nequesotareeri: “¿Casaa cua jiyaniijia niquitiojocanu quiajaniyani?”

⁶Pueyanoori na riuquaree: “Cua niquitio- canu cien patacucia mishaja shiyocuan”. Cumaneeca cojuanaari na sequeree: “Ritia quia cajiri. Niya quiya quia masesano casamijiniji naajiotasano. Tamonu quiarinio quia miiri. Quia naajiotare saaja cincuenta patacucia mishaja shiyocua”. ⁷Na nuhuaji, tamonu pueyano nequesotareeri: “¿Quiajaniyari- huaj? ¿Casaa cua jiyaniijia niquitiojocanu quiajaniyani?” Na riuquareeri: “Cua niquitiojanu cien canaasatu mishaja trigoni”. Cumaneeca cojuanaari na sequeree: “Niya quiya quia masesano casamijiniji naajiotasano. Tamonu quiarinio quia naajiotare saaja ochenta canaasatu mishaja trigo”. ⁸Na jiyaniijia jaara niishiquiaari sesa na seru miishano, na sequeree: “iQuiaaqui jiyanojua niishijia tama quia cuaqueyajaaja quia cojuanura!”

⁹Seetanujanaa pueyanaa, Pueyaso niishiyashijia pueyari socua jiyanojua niishijia cuhuashiqui quijia pueyaji- niji. Nojori cutaraari niishijia maninia nojori miiniuria narta pueya, pueya paniniuria saniniuujia nojori.

⁹Naarate nia nacasuyanijia, naa capora nia quirijiuhuaj, maninia nia miiniuria pueya. Maja nia casami nia jamuenu. Cunocujaari nareja Pueyaso niquitiosano niajaniya. Naacuajitij, capora nia quishacari mijiria jaara puequema, nia Jiyaniijiaari nia tiuquinitianutaniya pueyaracaanu quishaqui jiyocuaaanu, jiyanojua na shuquiritasacari niajaniya.

¹⁰Pueyano jaara jiyatesaare secaja casami cojuana na quiniuria, nojuaja

jaara maninia cojuaquiaa cuno secaja casami, na camarnuuri nocua tiuuniutianiya. Naaratej, na camarnuuri queraatia casami cojuanara na jiyatenutianiya. Saniniuuja, cante jiyatesaaree secaja casaa cojuana na quiniuriani, cuno pueyano jaara secaja na cojuasanojiniji nohuasejoquiaa jiyasohuaja, majaari tari nocua tiuushaanu. Nojuaja jaara jiyatesaare queraatia casami cojuanara, naa nohuasejonutaniyajaariuhuaj.

¹¹Naajuhuj, niaa jaara maninia jiitiaaquiquiaa mijiria casami, Pueyasoori niaacua tiyacuiniutianiya seetanujuanaa maninia jiyocuacaanuji casami nia jiitianura. ¹²Naacuajitij, niaa jaara tamonu pueyano casami cojuaaquiquiaa maninia, ¿Pueyasotucua taa niquitiore niaarano na riuriotacani? Maja cutaraari nia niquitiosaanu quiniutianiya.

¹³Poonitijosano pueyanoori maja na naata caapiqui jiyaniijara poonijionu. Jaara caapiqui jiyaniijiaraca quiri, tamonu samiritiaari, na panishacari tamonu. Naajuhuj, niquiriyatu jiyaniijia tojjia quiniutianiya maniniaari, na soosacari tamonu. Naajuhuj pueyanaa, majaari nia naata Pueyasocua jiaatianu, cumaneecaacuanio. Niaa jaara cumaneeca panijia quiri, niaari cumaneecara poonijjotesaanutianiya saaja. Naacuajitij, Pueyasoori maja na naata nia poonitijionu nera.

¹⁴Fariseocuacaari jiyanhua cumaneeca panijiaa quijia. Naaratej, nojori tojjishacari Jesu sequesano, nojoriiri saaja na rerequeteree. ¹⁵Jesuuri nojori sequeere:

—Niaacuajaari tama nia cuaqueyajaaja jiyatequiaa sapuenu pueyano maniniu nia niquishaanura. Pueyasocuajaari nioojia niishiya. Niaari pueya jiyajenetequiaa nojori jiyanishacari niaari Pueyaso panishano cutara, queraatia casami nia jiitiasacari. Saniniuuja, casaa pueya

jiyatequiaa socua jiyanhua na panishanorani, Pueyasoori cuno soya cutara.

Moisés Rootasanoori coteenu quiquiaari, quiarijia quiya cutaraari quiarinio Pueyaso Rupaa

¹⁶Moisés Rootasano, mariyata puetunu tariucuacaanu Pueyaso sequenu panishano caminiujunaa pohuatasanojuanaari pueya tojjitasocoriquiano quiquiaari, Tiuquinijiona Juan pohuatasanojuhuaj. Quiarijia saniniuuja, maninia rupaa Pueyasojinijiiri pohuatasaaquiaa, taa Pueyaso jiyanoonu paniya pueyani, na muerasu nojori quiniuria. Quiarijiani, puetunu pueyajanaari jiyanhua saniniujiya Pueyaso muerasu nojori quiniuria.

¹⁷Nio jiyari shaajeriquiano, jiya cajiniocuanio. Saniniuuja, tariucuacaanu pueyara Pueyaso sequesano caminiujiunaa pohuatasano cutaraari maja na shaajenu quiniutianiya quenaaja.

Jesu niishitijosano, pueyano carteyaquiniuria necocua (Mt 19.1-12; Mr 10.1-12)

¹⁸Pueyano jaara necocua cartere tamonu maajitia na caminiuria, cuno pueyanoori jiyanhua sesa miya Pueyaso niquiara. Naajuhuj, cante cartesano maajitia camiyani, cunoori sesa miyajuhuj.

Jesu pohuatasano casamiriaca pueyanojiniji, Lázarojinijinjo

¹⁹Casamiriaca pueyanoori quiquiaari. Jiyanhua maniniuqui toqueya cushiyojojuaari, juhua jiyaniijianucua toqueya. Jiyanhua na shuquiriniutia, puetunu juucajanaa queranacujuaari. ²⁰Jiyacari-tij, casamijiu pueyanoori quijiajuhuaj. Jiyanhua sapueyaraca. Nojuajaari cuno casamiriaca pueyano tia tohuateyaji niojotasano puetunu juucajanaa. Na sesaari quijia Lázar. ²¹Nojuajaari

casamiriaca miaquejajiniji totinijosano raacua miaquenu panijia juucua. Saaja sareyari na sapueya rimianacunuujua. ²²Na nuhuaji, cuno casamijiu pueyanoori cusoquiaari. Pueyaso seyari na riquiaari supuetana Abrahamta na quiniuria, Pueyaso muerasurano shanohua quiquiojinia. Cuno casamiriaca pueyanoori cusoquiaarijiuhuj. Jamosaaquiaariiri. ²³Sesa mijjiacarano quiquiojinia na quishacari, naquiya na miishacari tii, nojuajaari mauquiaari. Cuniqijii tucuaaanu niquirii Lázaro, shuquiriaatia quiyano supuetana Abrahamta. ²⁴Casamiriaca pueyanoori nacaree: “iCua supuetana Abrahamnaa, cucua quia taraajere quenaaja! iLázaro quia jiyarore cucua! iCuaara na juaashiquia nacatu shiiria mohuacajinia! iCua niti shiniajaquee quenaajacua! iJaniyari puera jiyanoahua naquiya miya nio manijiniani!” ²⁵Abrahamri saaja na riuquaree: “Sanajanaa, quia niishiri taa jiyanoahua maninia quia quiquiaarini, pueyaracaanu jiyocua quia quishacari. Lázaro saniniuujia jiyanoahua taaatia quiquiaari pueyaracaanu, jiyocua na quishacari. Lázaro quiarjia niya cumanijia shiya. Quiaari saniniuujia naquiya miishiyacujua. ²⁶Naajuhuj, jiyanoahua tucuaa taaori pa tajiinia quia. Cunora, cante niqijii niuuniu paniya cuniquijiria quiocuani, majaari na naata. Naajuhuj, cante quia quiquiojiniji niuuniu paniya niqijiriani, majaari na naatajuhuaj”. ²⁷Casamiriaca pueyanoori supuetana Abraham sequeroahuacuhuj: “Naa naasucua quia supuetana Abrahamnaa. Naajaa, quia secojijaniija, Lázaro quia jiyarorohua quia que tiajinia. ²⁸Tii quiyajaari cu tapueyocuaca. Cinco tarajanuhuaracanjia. Lázaro cuara nojori numooteera, maja nojori quejoosaanurajuhua nio saniitiosaqui quiquiojinia”. ²⁹Abrahamri na riuquaree:

“Nojoricuajaari Moisés Rootasano jiiitaa, puetunu Pueyaso sequesano caminiujiniana naajiotasanojuanaano. Quia tapueyocuaca cuara tojtiaara cuno”. ³⁰Casamiriaca pueyanoori riuquaree: “Naa naasucuatuhuj, cua supuetana Abrahamnaa. Naajaa, tamonu pueyano macunucujajinijio jaara muetarohua nojoriicua, nojoriiri noojia tacatonutaniya sesa nojori miiniujiniji”. ³¹Abrahamri saaja na riuquaree: “Nojori jaara Moisés Rootasano tojtianu paniyaquiquiaa, Pueyaso sequesano caminiujiniana naajionuutasanonio, majaari nojori tojtianu quiniutianiyajuhuj, macu pueyano jaara samiitiarohua”.

Puereetaari quiniutianiya sesa mijjiacara
(Mt 18.6-7, 21-22; Mr 9.42)

17 ¹Na nuhuaji, Jesuuri na pueya sequequiaari:
—Mijiria, pueyari pueyaracaanu sesa miitishaaquiaa. Jiyanoahua taaatia quijiaari cuno, cante sesa miitirii tamonuni. ²Jiyano pueyanoratej, maara socua maninia quiri nera, puereetuca saajia jaara na riquiajiniji morotasaare, shoniniacu caminia jiuujiajinia jartasocoriquiano. Jaara naa miishaaretej, maara maninia quiri, maja sesa mijjiara na jiyatenura niquiriyatu nio muerasuniyjuajinijinio. ³Cunora, tama nia cuaqueyajaaja nia cojuare maja quenaaja sesa nia miitiniuria pueya.
⁴Quia tarajanu jaara sesa miiri, quia nacasurenoj. Nojuaja jaara taraajerohua sesa na miiniucua quiajaniya, quia jiyanoorinioj. ⁵Nojuaja jaara sequeyarcua sesa miya quiajaniya niquiriyatu juuca, naajaa, quia jiyanooriquia, nojuaja jaara quia sequere: “Sesa miirii quiajaniyanijia. Cua jiyanoori quenaaja”. Nojuaja jaara quia pacutejore sesa miiniu siete cuno juucaja, naajaa, majaari na tarinitianu jiyanooniu.

**Pueyasooocua tiuujia pueyanoori
jiyanohua cumaacaraca**

⁵Jesu saquiriojosano pueyari Jesu sequequiaari:

—Jiyaniijianaa, socua jiyanohua canaa quia tiutiri Pueyasooocua, socua cumaaca canaa jiitianura.

⁶Jiyaniijia Jesuuri nojori riucaaree:

—Pueyasooocua nia tiuuniu jaara quiri quenaaja juhua mostaza jajauniyojua, jiyanohua shiitianiyojua, niaa jaara nio satuna jiyona sequere: “Niiquiji quia pacure. Moojinia quia nujuasee”, maara nia sequesano tojiri.

**Pueyasora poonijionatucua
taa miijia quiriquianij**

⁷Niaa jaara seruraca quiriquia, nojuaja jaara tiajinia tiuquiriohua quia cuhuari-quiajiniji tee na namitiariquiaacuajani, quia seya cojuanuujiniji soj, ¿niaatucua na sequere: “Miji, quia miaquesuhuaa?”

⁸Majaruhua. Niaari saaja na sequenutaniya: “iQuiria quia sumature! Cua mianuutere coteenu. Cua raaterejuhuaj. Cua miaquenu nuhuaji, quiocua saniniuu-jia miaquerohua. Quiocua raturohuajuhua”. ⁹Na nuhuaji, nia seru jaara puetunu nia sequesanojuanaa miiri, ¿niaateeri na sequequiaa “paacarasho”? iMaja! ¹⁰Naajuhua, niaa jaara puetunu Pueyaso sequesanojuanaa miiri, tama nia sequerejaaja: “Janiyari maja maninia seruni. Majaari tama cua niishitiajinijiaaja cua miiniu quiquiaa cua Jiyaniijia. Janiyari saaja pueyaracaanu paniquiaa cucua na tequejonura juhua naatujuaacuani”.

**Jesu naatanijosacari diez pueya,
lepraraca cusosuhua**

¹¹Jesuuri Jerusalén tiacajiniara na pueyata quiariquiaacuhua. Jiyacari, Galilea jiya, Samaria jiya tajiniaaco

quiariquiaari. ¹²Quera na tiuquishacari shiitianiyojua tiacajinia, diez pueya lepraraca* cusosuhuari na naacuquiaari. Nojoriiri tucuaanuujijia Jesuucua nijuatusee. ¹³Nojoriiri Jesuucua nacaree:

—iNiishitiojona Jesunaa, canaacia quia taraajere!

¹⁴Jesu niquishacari nojori, nojori sequereeri:

—Nia cuaqueya nia niquitishii pueyacuara secojonaa, taa supuetana Moisés sequequiaaricuajani.

Nojori canujuucatusacarijia, nojori cusuuri shaajee. ¹⁵Tamonu nojorijiniinio niquishacari na cuaqueya tari cushiriqui, nojuajaari Jesuucua tacateyarohua. Nojuajaari na rupaa paaretariquiaa na maniniuhuaqueetasacari Pueyaso. ¹⁶Jesu cariquimiai mojuquetaseeri. Jiyocuara naniriiri. Jesu sequereeri: “iPaacarasho Jesunaa!” Cuno pueyanoori Samaria* jiyajiniinio tahue quiquiaari. ¹⁷Jesuuri na pueya niquiara naa sequere:

—¿Majateeri diez cusosuhua naatanijosaanu quirii? ¿Teeteeri narta naataconohua nueve pueyani? ¹⁸¿Saaja nio tahueteeri tacaterohua Pueyaso na maniniuhuaqueetanura?

¹⁹Na nuhuaji, Jesuuri cuno tahue sequere:

—Quia sanere. Quia quiaarohua. Quiaacuaja naatarohua cucua quia tiuuniucua.

**Taa na quiniutianiyani,
Jiyaniijia Cristo tiuquishacariuhua
(Mt 24.23-28, 36-41)**

²⁰Fariseocuacaari Jesu nequesotaquiaari taacari Pueyaso Jiyarosocoriquiano niniutianiya jiyaniijia na quiniuria mijiriani. Jesuuri nojori riucaaree saaja:

—Pueyaso Jiyarosano jiitiasacari na muerasu, majaari namijiata niquishano. ²¹Majaari na naata sequesaanu: “Niya

quiya pa Jiyaniijia quiquio”, “Jati quiyaruhua”. Pueyasocujaaari tari niya jiitiaa na muerasu nia tajiina.

²²Na nuhuaji, Jesuuri tama na pueyajaaja sequequiaari:

—Na nuhuaji, taraatia quishacariiri quiniutianiya. Niaari cua niquiniuucua jiaatianutaniya niaata cua quiniuria rupaquijia, taa niaata cua quiya quiarijia-cuaani. Majaari nia niquiniu quiniutianiya janiya. ²³Tamasacaari nia sequenutaniya: “iNiya quiyacujaja nia Jiyaniijia!” Tamasacaari saniniuujia sequenutaniyacujaja: “iNoj, jati quiyatej!” Majaari nia tojiniu jiyano pueyatej, nojori jaara naa nia sequeriquia. Majaari nojori neteyotanu najuhuanaj. ²⁴Mijiria cua tacatesacariuhua, cuno juuca, janiyari niquishaanutaniyani, naatej, taa miacana puetunu jiya cajiniocujajanaa niquishaaquiacuaani na nunujusacari.

²⁵Saniniuujia, mijiria cua quishacarijia, janiyari coteenu jiyanoehua naquiya miishaanutaniyani. Nio pa quishacari pueyari cua paniyaquiniutianiya. ²⁶Quera cua tiuquiniu panishacariuhua mijiria, naa quiniutianiyari taa mijiria quiniiaa pueya quiquiaaricuaa supuetana Noé quishacarini. ²⁷Naa quiquiaariiri cuno quishacari. Mijiria quiniiaa pueyari juhuajaniya miaquenuujua. Raruujuaari. Juhuajaniya maaji camiyojuaari. Pueyari necojori camiyoteja. Pueyari naa juhuajaniya miijioriquiaa Noé jaara tiuquitiaquiaari na puereetuca buquejini. Canashiyaquiji, maruuri jiyanoehua niquiaari. Puetunu mijiria quiniiaajanaari cusonuquiaari pajaacajinia. ²⁸Naa quiquiaarijihuua supuetana Lot quishacari Sodoma tiacajinia. Cuno pueyari juhuajaniya miaquenuujua. Raruujuaari. Casami masejojuaari. Juhuajaniya na casami niquitiojojuaari. Na cuhuariquia-ca natojojuaari. Na tiacara

tiajojuaariuhua. ²⁹Naa juhuajaniya nojori quishacaritij, Lotri tohuataquiaari Sodoma tiacajiniji. Jiyacaritij, maniiri asufreta cojitishano juhua maru niquiaari jiyocuacaanuji. Puetunu cuno sesa miijiacajanaari manijinia catequiaari. ³⁰Naa quiniutianiyajaariuhua quera jiya puequesacari. Pueyari juhuajaniya quiniutianiya. Janiyari jiyacari canashiyaquiji tiuquiniutianiuhuani.

³¹Cuno juuca, pueyano jaara na tia cacojiria quiya, cuaara roseyaquiiira na casamiicua tiajiniaaco. Naajuhua, pueyano jaara na cuhuariquiajinia quiya, nojuaja cuaara tacateyaquihuara na tiajinia. ³²Nia niishiriquia supuetana Lot niquiocua. Na mashishacari, nojuajaari ritia cusoquiaari na nijiniara na niquiniuucua, na casamiicua na taraajesacari. ³³Cante saaja shuquiriaatia mijiria na quiniuria niishiriojojuaani, nojuajaari na nuhuaji jiyanoehua taraatia quiniutianiya Pueyasooju. Saniniuujia, cante tama na cuaqueyajaaja panitaja cua tojijiaara na quiniuriani, nojuajaari pueyaracaanu shuquiriaatia quijiaari jiyatesaanutianiya.

³⁴Cua tojiri. Cuno niucujahuaj, caapiqui pueya jiuriatoosacari juucua na maquetujinia, niquiryatujuaari rishaanutaniya jiyocuacaanura, Pueyaso pueyano na quiniuucua. Tamonuuri tiujiasaanutaniya saniitiosocoriquiano. ³⁵Cuno juucajuhuaj, caapiqui maajipohua riiquiniuushacari jatiqui juucua, cucua tiuujiaari tarajanu shuriucujaji rishaanutaniya. Tamonuuri tiujiasaanutaniya saniitiosocoriquiano. ³⁶Caapiqui pueya quishacari cuhuariquiajinia, cua pueyanoori rishaanutaniya. Tamonuuri tiujiasaanutaniya saniitiosocoriquiano.

³⁷Jesu pueya tojishacari naa Jesu sequesanej, nojoriiri na nequesotaree: —¿Tee nio quia pohuatasano niquishaanutaniyarini?

Jesuuri nojori riucaaree miriqui:

—Tee casaa moqueyani, mohuari tii rerejiya.

Naajuhuj, majaari quenaaja niquiriya-tu Pueyaso tojiyashijia cureneu quiniutianiya saniitiosoo.

Jesu pohuatasano mashiquiojiniji, pueya nequesoreena pueyanojinijinio

18 ¹Jesuuri na pueya pohuataquiaari nio miriqui pohuatasano nojori na niishitiojonura, nojori cuaara Pueyaso secojora pueyaracaanu, nojori taacanu-yaquiniutia. ²Naa nojori sequereeri:

—Tamonu tiacajinia, pueya nequesoreena pueyanoori quijia. Pueyaso puereyashijia quijiaari, pueya rerequete-janio. ³Cuno tiacajiniaja tamonu mashiquioori quiquiaarijiuhuj. Mashiquioori cuno nequesoreenaacua rucuanajoja pueyaracaanu. Na secojojuaari sesa na miinia pueyano cuaara na niquitiohuara na casaa saniniuuja, sesa na miishanojiniji nojuaja. ⁴Majaari nequesoreena tojinu paniniu quijia pueyaracaanu cuno mashiquio. Naajaa, pueyaracaanu nocua na rucanejosacari, cuno nequesoreenaari socua tama sequequiaarijaaja: “Janiyari maja Pueyaso puerejani. Janiyari pueya tojiyashijia cutarani. ⁵Naajaa, naa nio mashiquio taajetesacari janiya pueyaracaanutej, janiyari quiarijia na panishano miiniutianiya nerani, mariqui cua juaatijiore pueyaracaanuuri na nenecojosacari janiya”.

⁶Maninia na pueya niishiniuria na pohuatasano, Jiyaniijia Jesuuri naa nojori sequerohuacuhuj:

—Naa miiquiaariiri, cuno pueya nequesoreena seque. Jiyanojua pueya rerequeteja quiquiaariiri, naajaa, nojuajaari maninia miiquiaari cuno mashiquiora. ⁷¿Nia que Pueyasoorijiataj? ¿Niaateeri jiyaniya maja nojuaja tojinu quiniutianiya na muerasu, canapuate na

secojoquiaani juuca, niucuanio? ¿Pueyasoteeri nia sashitiniutianiyajaara? ¡Maja! ⁸Nojuajaari maja na tarishiniu quiniutianiya. Ritia nia naacunutaniyari sesa nia miijiaca pueyacuaji. Sesa nia miijiacaari namishaanutianiya niaacua. Naaratej, majaari secojonu nia tarinitianu. Mijiria cua tiuquishacariuhua, ¿janiyate Pueyasooocua tiuujiaca riuriatanutianiya naa pueyaracaanu secojonuujuacani?

Jesu pohuatasano miriqui Fariseo pueyanojiniji, Romano jiyaniijiaa cumaneeca masejojuajinijinio

⁹Jesuuri socua nio miriqui pohuatasano pohuataquiaari noo pueya niquiara, canapuate tama na cuaqueyajaaja jiyaniijiani nojoriiri maninia pueyano. Naacuajitij, nojoriiri tamasa pueya soojea, nojori jiyaniishacari cuno pueyari socua sesa miijiaca nojorijiniji. Cunora, Jesuuri nojori niquiara naa pohuataquiaari:

¹⁰—Fariseo pueyanoori quiaquiaari Pueyaso Secojoua tiajinia na secojonura Pueyaso. Jiyacaritij, Romano jiyaniijiaa cumaneeca masejoja pueyanoori quiaquiaari Pueyaso na secojonura tiijuhuaj. ¹¹Fariseo pueyanoori nujuari-quiaa Pueyaso na secojosacari. Naa sequeriquiaari: “Pueyasonaa, paacarasho janiyari maja juhua tamasa pueyani. Tamasa cutaraari nohuasenuujuaca, sesa miijiaca, maaji porocujahuaj. Naajuhuj, shuquiriaatia quiyaniija, janiyari maja sesa miijiania juhua nio pueyanouja niya cuata secojiyani, cumaneeca masejona pueyanoni. ¹²Janiyari caapiqui juuca miaqueyaquiquiaani puetunu semaanajanaa cua shuqiritiniuria quiajaniya. Naajuhuj, janiyari pueyaracaanu puetunu cua masesanojinijijianaa niquitioquiaa quiarani, taa Moisés rootaquiaaricujani”. ¹³Cumaneeca masejonaari saniniuuja

tucuacaanuji nujuasee. Na secojosacari, majaari quenaaja na maunu quiriquiaa jiyocuacaanu. Tama nojuajaari na jiriquia piquiriquiaa na taraajenuta sesa na miishanojiniji. Naa sequereeri: “Pueyasonaa, cucua quia taraajere. ¡Cua jiyanoori! ¡Sesa miijianijia!” Naa secojoquiaariiri. ¹⁴Seetanujuaanaa nia sequeyanijia, cumaneeca masejonaari Pueyaso jiyanooshano tacateyarohua cutara. Fariseo pueyanoori saniniuuja jiyanoyaquishoo tacateyarohuacujua. Naacujitij, cante tama na cuaqueyajaaja jiyateya juhua maninia pueyano na quiniuria tamajaajani, nojuajaari cararasaanutaniya. Saniniuuja, cante sesa na miishano seetaaquijiani Pueyaso jiyanooniuria nojuajani, Pueyasoori cuno pueyano jiyatenutaniya seetanujuaanaa sesa miyaquijia na quiniuria.

Jesu niasacari na juaashiquia conaajaacua
(Mt 19.13-15; Mr 10.13-16)

¹⁵Jiyacaritij, conaajaari poosaariquiaa Jesuucua, Jesu nianura nojoriucua na juaashiquia, Pueyaso jitianura maninia nojori. Jesu saquiriojosano pueya jaara niquiquiaari conaaja pooshiyano Jesuucua, nojoriiri na poonaa juaarii. ¹⁶Jesuuri saaja conaaja poonaa sequeree, conaaja cuara nocua poosaaria. Na nuhuaji, na pueya sequereeri:

—Naatujoori cuara poosaaria cucua. Maja na poonaa tenujunu. Cante Pueyaso muerasura quiniu paniyani, nojori cuara jiyateera tama na cuaqueyajaaja juhua nio naatujooriria. ¹⁷Seetanujuaanaa nia sequeyanijia, cante tama na cuaqueyajaaja jiyateyaquiya juhua naatujooriria Pueyaso rupaacua na tiuuniurianni, cuno pueyanoori maja na naata Pueyaso muerasura na quiniu.

Casamiriaca pueyano pocoojosacari Jesuta
(Mt 19.16-30; Mr 10.17-31)

¹⁸Tamonu Judiocuaca camarnuuri Jesu nequesotaquiaari:

—Maninia niishitiojonanaa, ¿taa cua miiniutianiyani, jiya puequesacari cua samiitianishaanura, pueyaracaanu quijiaa cua quiniuria Pueyasotani?

¹⁹Jesuuri na riucuaree:

—¿Casaara quia sequeya janiya maninia pueyanotani? Saaja Pueyaso cutaraari seetanujuaanaa maninia. Majaari socua tamonu quiniu. ²⁰Pueyanonaa, quiaacuajaari Moisés Rootasano niishijia. Naa naajiotasanocujaari qiya: “Maja quia camishoo maaji numuetucunu. Maja monu. Maja nohuasenu. Maja tamonuucua saquiriojotanu quia sapojonuta. Quia que, quia nucua tojjia quia quiri”.

²¹Pueyanoori Jesu riucuaree:

—Janiyacujaari cua naatujuajiniji puetunu cuno tojjiajanaani.

²²Naa na sequesacaritij, Jesuuri na sequeree:

—Quiyajaari niquiriyatu casaa quia miishoojua. Nio quia miiri: puetunu quia jitiananojuanaa quia niquitiojore cumaneecara. Na nuhuaji, casamijuniucua pueya cuno cumaneeca quia niquitiojore nareja. Naacujitij, quiaari jiyanoohua casamiriaca quiniutianiya cutara jiyocuacaanu. Na nuhuaji, quiocua nimiohua cutara, cua pueyano quia quiniuria.

²³Na tojjishacari Jesu sequesano, nojuajaari jiyanoohua taraajequee, jiyanoohua queraatia casamiriaca na quishacari. ²⁴Jesu niquishacari nojuaja taraajeyano, Jesuuri na pueya sequeree:

—Casamiriaca pueyara, jiyanoohua jiyajenetaari Pueyaso muerasu nojori quiniuria. ²⁵¿Camelloteeri na naata cusupuetaja cuhuoco tamajiria tajiniu? Maja na naata. Naajuhuj, casamiriaca pueyanora, socua jiyanoohua jiyajenetaari Pueyaso muerasu na jatanishaanura.

²⁶Pueya tojjishacari naa Jesu sequesano-tej, nojoriiri naa na nequesotaree:

—¿Canteeri Pueyaso muerasura quiniutianiyantioj?

²⁷Jesuuri nojori riucuaaree:

—Maja pueya na naata tama na cuaqueyajaaja jiyatenu Pueyaso muerasu nojori quiniuria. Naajaa, Pueyaso cutaraari na naata.

²⁸Pedroori Jesu sequeeree:

—Jiyaniijianaa, ¿canaarijiataj? Canaari puetunu canaa jiitiasanojuanaa tiujiaquiaarini canaa nuhuajiniuria quiajaniya.

²⁹Jesuuri na riucuaaree:

—Seetanujuanaa nia sequeyanijia, cante na panishano casaa tiujiaquiaari Pueyasora na poonijionurani: na tia, na que, na nucua, tapueyocuaca, necocua, necohua, nojuajaari socua jiyanhua queraatia masenutaniya mijiria na quishacarijia. ³⁰Na nuhuaji, samiitiani-shano quiniutianiyari pueyaracaanu shuquiriaatia na quiniuria Pueyaso shipinishocoriquiano quiarinio jiyajinia.

**Jesu pacutesacari pohuatanu,
nojuaja mosaanutaniya**
(Mt 20.17-19; Mr 10.32-34)

³¹Jesuuri saaja na doce saquiriojosano pueya jiyataaree tamocora. Naa nojori sequeereeri:

—Paari quiarijia Jerusalén tiacajinia quiaani. Janiyari quiniqi puetunujuanaa miishaanutaniyani taa tariucuacaanu pueyara Pueyaso sequesano caminiujiuniaa sequequiaaricuaja janiyajinijini.

³²Naacuaajitij, janiyari tahua niquitiosaanutaniyani. Nojoriiri cua macaatiniutianiya. Taraatia cua miitiuniutianiyari. Cua riocojotunutaniyari. ³³Cua piquitiuniutianiyajaariuhuaj. Na nuhuaji, cua motunutaniyari. Naajaa, jiuujianaraca juucajinia, janiyari samiitianutaniuhuani.

³⁴Majaari Jesu pueya niishiniu quiriquiaa quenaaja na sequesano. Majaari nojori niishiniu quiriquiaa casaa Jesu sequeriquiaani. Juhua miriqui sequesanoori quiriquiaa nojoriria.

**Jesu jeecasacari cariojuaru pueyano
Jericó tiacajinia**

(Mt 20.29-34; Mr 10.46-52)

³⁵Na pueyata Jesu quishacari tari cateca Jericó tiacaacuara, cariojuaru pueyanoori nuu shuucuaji cajiriquiaa, cumaneeca na masejonura pueya tajishacari nucua.

³⁶Cariojuaru tojishacari queraatia pueya tajiyno, pueya nequesotareeri:

—¿Casaatejanojoni?

³⁷Pueyari na sequeeree:

—Nazaret tiacajinijinio Jesucuaaja tajiya.

³⁸Cariojuaruuri nacaquee:

—iJesunaa! iSupuetana David niquihuacuajinio supueno pueyanonaa! iCucua quia taraajere quenaaja!

³⁹Jesu puetanaa pueyari na juaarii na sanaajanura juucua. Nojuajaari saaja socua jiyanhua nacaree:

—iSupuetana David niquihuacuajinio supueno pueyanonaa! iCucua quia taraajere!

⁴⁰Jesu tojishacari nojuaja, nujuaseeri. Jesuuri pueya sequeeree cariojuaru cuaara jaatucusaaria nocua. Cariojuaru tiuquishacari nocua, Jesuuri na nequesotaree:

⁴¹—¿Casaa quia paniya cua miiniuria quiajaniyani?

Cariojuaruuri Jesu riucuaaree:

—iJiyaniijianaa, niquijara quiniu paniuhuanijia!

⁴²Jesuuri na sequeeree:

—iNiquijara quia quiriohua! Quia namijiacuaja tari jeequerohua cucua quia tiuushacari.

⁴³Jiyacaritij, cariojuaruuri maninia niquijara qiquii. Jesu nuhuaji sacuaareeri na shuqiritianuta Pueyaso. Puetunu Jesu miishano niquiniaajanaari Pueyaso maniniuhuaqueetariquiaa.

Jesu pocoojosacari Zaqueota

19 ¹Jesuuri Jericó tiacajinia tiuquijioquiaari na pueyata.

Tiaca jiuujiaaco quiariquiaari. ²Cuno tiacajinia quiquiaariiri casamiriaca pueyano. Na sesa quiquiaari Zaqueo. Zaqueori Roma tiacajinia quijia jiyaniijia-ra cumaneeca masejona camarnu quiquiaari. ³Nojuajaari Jesu niishiniu panijia juucua. Majaari na naata niquiniu quiriquiaa Jesu, puera jiyanoehua pueya quiniuucua Jesu shocua. Naajuhuj, Zaqueori puera posucuashi quijia. ⁴Cunora, Zaqueori netequiaari Jesu tacoji. Nuu shuucuaji sicómoro naanaa-cua macaseeri, maninia na niquiniuria tiji Jesu, jaara cunoco tajimia. ⁵Jesu tajishacari Zaqueo cariquiaco, Jesuuri nocua mauree. Na sequereeri:

—Zaqueonaa, iritia quia rosemohua! Janiya quiarijia quia tiajinia maquenuta-niyani.

⁶Zaqueori ritia rosemohua. Jesu tiuquinitiaree na tiajiniaari jiyanoehua na shuquiriniutia. ⁷Tamasaca pueya jaara Jesu niquiquiaari Zaqueo tiajinia tiuquiyano, puetunu nojorijianaari Jesu sesacanu coteequiaari. Tama sequeturi-quiaajaarijia: “Cuno pueyanoori sesa mijia pueyano tiajinia tiuquishii”. ⁸Na nuhuaji, Zaqueori nujuaree. Jesu sequereeri:

—Seetanujuanaa quia sequeyanijia, Jiyaniijianaa, janiyari quiarijia quiocua tiuuriini. Naacujitij, janiyari casamijiu-niucua nareja niquitiojonutaniya puetunu cua jiitiasano cajiniocuajiniijianaani. Naajuhuj, janiya jaara puera cumaneeca masecanu tamasaca pueyajiniji cua sapojonutani, janiyari nojori niquitionu-taniuhua socua jiyanoehua queraatia cumaneecani cua nohuasesanojiniji nojori.

⁹Jesuuri na sequeree pueya niquiara:

—¡Quiarijiani, nio tiajinia quiniaa pueyari tari jiyanooshaaree! Nio pueyanocuajaari supuetana Abraham niquiohuacuajinio supuenojuhuj.

Nojuajaari cucua tiuuri taa Abraham tiuquiaari Pueyasocucuaani. ¹⁰Janiya-cujaari cunora mijiria niquiaarini, tashucuano pueya cua pajenura, nojori cua jaariutianura Sesaaca.

**Miriqui Jesu pohuatasano diez
cumaneecajiniji
(Mt 25.14-30)**

¹¹Tii quiniaa pueyari Jesu pohuatasano tojitariquiaa. Jesuuri tari cateca quiriquiaa Jerusalén tiacajiniji. Pueyari jiyaniriquiaa Jesuuri Israel pueya jiyaniijia quiniutianiya tari, Pueyaso muerasu na jiitianura mijiria. Nocujia, Jesuuri nojori pohuataree nio miriqui pohuatasano, nojori na niishitiojonura. ¹²Naa nojori niquiara pohuataree:

—Tamonu jiyaniijia niyanuuri quiquiaari. Nojuajaari tucuaaanu tamonu jiyajinia quiaquiaari jiyaniijia na jiyatesaanura. Jiyaniijia na jiyatesaanu nuhuaji, nojuajaari tacateri-quianohua quiriquiaa, narta pueya jiyaniijia na quiniuria. ¹³Na nuhuajiria, nojuajaari diez na seya sequeree nocua nojori nijionura. Nojuajaari puetunu nojorijianaa niquitiojoree niquiriyatu cumanee, orojiniji* shipinishano. Nojori sequereeri: “Nio cumanee nia poonitijiore, janiya cuara tiuquiriohuajaatiinijiaj”. ¹⁴Na nuhuaji quiaqueeri. Na jiyajinijinio pueyari maja na niquiniu paniniu quijia cuno pueyano. Cunora, nojoriiri pueya jiyaramiquirii na nuhuaji, jiyaniijiajanaa nojori sequenura: “Maja canaa paniniu cuno pueyano, canaa jiyaniijia na quiniuria”.

¹⁵Naajaa, nojuajaari saaja jiyatesaaree jiyaniijia na quiniuria. Na nuhuaji, na jiyajinia tacateyarohuari. Jaara tiuquishuhua, na cumaneeca na niquitio-josano seya sequereeri, nocua nojori nijionura. Nojuajaari niishiniu paniriquiaa taa cumaneeca socua nojori

reratequiaarini, nojori poonitijosacari na niquitijosano cumaneeca. ¹⁶Coteenu seruuri nocua nimiaa. Na jiyaniijia sequeeseeri: “Cua jiyaniijianaa, cua poonitijosacari quia niquitiosano cumanee janiya, janiyari socua diez cumaneeca reratecanuni”. ¹⁷Na jiyaniijiaari na sequeree: “iManiniacuaja! iQuiaacuajaari maninia cua seru! Quiaari secaja cua niquitiosano quiajaniya poonitijioriquiaa shitimia quiria. Naaratej, janiyari quia jiyatenutaniya diez tiaca jiyaniijia quia quiniuriani”. ¹⁸Na nuhuaj, tamonu na seruuri nocua nimiaajuhuaj. Nojuajaari na jiyaniijia sequeree: “Cua jiyaniijianaa, cua poonitijosacari quia niquitiosano cumanee janiya, janiyari socua cinco cumaneeca reratecanuni”. ¹⁹Na jiyaniijiaari na sequereejuhuaj: “Quiaari cinco tiaca jiyaniijia quiniutianiya”.

²⁰Na nuhuaj, tamonu na seruuri nocua nimiaajuhuaj. Na jiyaniijia sequeeseeri: “Jiyaniijianaa, nia quia quia cumanee quia niquitiosano janiya. Janiyari na cojuacanu maniniani, toqueraujinia jiuniosano. ²¹Janiyari naa miiquianuni cua pueresacari quiajaniya. Janiyari niishiyani, quiaari quiarta pueyacua taraajeyashijia. Quiaari tamasaca racatasanojiniji poojua. Quiaari tamasaca natoosanojiniji senoojuajuhuaj”. ²²Na jiyaniijiaari na juaari: “Sesaacanaa, tama quia sequesanoatajaaja janiyari quia nequesoreenutaniyani. ¿Naatee? ¿Quiaateeri niishiquianu janiyari pueyacua taraajeyashijiani? ¿Janiyateeri tamasaca racatasanojiniji poojuani? ¿Janiyateeri tamasaca natoosanojiniji senoojuajuhuaj? ²³Quiaa jaara jiyaniquianu janiya naa miijiani, ¿casaara cua cumanee quia niquitioyaquiquianu cumaneeca cojuanaarini? Nojori jaara cua cumanee poonitijiocanu, janiya maara socua queraatia na riuriatasuhuanu, cua tiajinia

cua tiuquishacariuhua”. ²⁴Cunora, na jiyaniijiaari tii quiniaa pueya sequeree: “iCua cumanee nia jaariutiare cuno! Nia niquitiore cua maninia seru, cante diez cumaneeca jiitiaacuajani”. ²⁵Nojoriiri na sequeree: “Jiyaniijianaa, ¿casaarateni? Nojuacuaja tari diez cumaneeca jiitiaa”. ²⁶Jiyaniijiaari saaja nojori riucuree: “Seetanujuanaa nia sequeyanijia, cante tari jiitiaani, nojuajaari socua niquitiosaanutaniya. Cante na jiitiaaquiyani, secaja na jiitiasanoori puetunujuanaa jaariutiasaanutaniya, cucua tiuyashijia na quiniuucua. ²⁷Quiarijia, cua paraa saniniuuja, cuno pojori canapueete cua paniyaquiquianu nojori jiyaniijia quia quiniuriani, miji nia jayore nojori. Niya cua niquiara nia puecoore cua ruuretajaca seque”.

Jesu tiuquishacari Jerusalén tiacajinia

(Mt 21.1-11; Mr 11.1-11; Jn 12.12-19)

²⁸Nio na pohuatanu nuhuaj, Jesuuri na pueya puetaarecuhuaj Jerusalén tiacajiniara. ²⁹Jaara cateca quiriqiaa tari Betfagé tiaca, Betania tiacanio, Olivo cuhuariquia tuhuananujuhuaj, Jesuuri caapiqui na pueya sequeree:

³⁰—Cuno shiitianiyojua tiacajinia nia quiaare, pa tacoji niquishiyani. Niaa jaara tiuquishii, niaari burro riuriatanutaniya morotasano, pueyano cajishoojua na nijinia. Niaa jaara na niquishii, niocua na samaacartasee. Niaari na jaatucumohua miji. ³¹Pueya jaara nequesotare niajaniya casaara nia samaacartaanoj, niocua na riucure: “Jiyaniijia na paniya”.

³²Jesu pueyari quiaaree. Nojoriiri na riuriatasee taa Jesu sequequiaaricuajani.

³³Nojori samaacartasacari burro, na camaruhuari nojori nequesotaree:

—¿Casaara nia samaacartaa canaa burroni?

³⁴Nojoriiri na riucuree:

—Jiyaniijia na paniya.

³⁵Na nuhuaji, nojoriiri na jaatucuyaro-hua Jesuucua. Jesu pueyari na toqueya niojoree burro nijinia Jesu cajijiara. Na nuhuaji, nojoriiri Jesu cajitirii na nijinia. ³⁶Na quiasacari Jerusalén tiacajiniara, pueyari na toqueya muevoquiaari nucuaco Jesuucua. ³⁷Nojori rosetanu panishacari Olivo cuhuariquia tuhuana-nujiniji, puetunu Jesu pueyajanaari juhuacatecara nacooviaari nojori shuquiriniutia. Nojoriiri Jesu maniniu-huaqueetariquiaa puetunu na cumacata na miishanojuanaa nojori niqiniuuca. Nojoriiri cunora jiyano-hua shuquiritari-quiaa Pueyaso. ³⁸Nojoriiri na nacoori-quiaa:

—iPueyaso cuaara shuquiritiiria pa Jiyaniijia, Pueyaso Jiyarosano na quiniuuca! Pueyaso pocua taraajerohua-ni. Pa jiyanoorihua. iNojuajaari jiyano-hua maninia! iPa shuquiritarienoj!

³⁹Cuniqui pueya tajinia quiniaa Fariseocuaca tojishacari naa nojori sequesantej, nojoriiri Jesu sequeeree:

—iNiishitiojonanaa, quia pueya quia sanaajare, maja naa nojori sequenura!

⁴⁰Jesuuri saa sequeereeja:

—Seetanujuanaa nia sequeyanijia, nio pojori jaara sanaajetare, isairi saniniuuja naconutanuyacujua!

⁴¹Tari Jesu quishacari Jerusalén tiaca shuriuaca, na niquishacari cuno tiaca, Jesuuri cuno tiacajinia quiniaacua nujuqueree. ⁴²Cunora, juhua pueyano sequeeree Jerusalén tiacaari:

—Jerusalén tiacanaa, quia niishitiri-quia quiarijiani, casaa quia paniya jiyanooshano quia quiniuriani, shuquiriatia quia quiniuriajuhuaj. Taraatia quijianaa, quia Jiyanooriquia-noori juucua niya quiya. Majaari quia niishiniu nojuaja, juhua nimishitiu quia quishacari. ⁴³Cunora, na nuhuajiiri jiyano-hua taraatia quiniutianiya quia.

Quia paraari quia mataconutianiya quia shocuaqueya, na cosenura maninia quiajaniya quia mashiyaquiniuuca. Naacuaajitij, quia paraari quicua juhuacanutianiya na miaquejonura quiajaniya. ⁴⁴Quiaari jiyareta sureesaanutianiya. Quia tiacajinia quiniaari puecoosaanutianiya. Quia tiacaari puetunu niyartasaanutianiyajanaa. Majaari tamonu saajia cureenu quiniutianiya quenaaja tamonu saajia caco maano. Quiaari naa miishaanutianiyatej quia niishiyaquiniuuca, Pueyasoori quicua niquiaari najuhuanaj, quicuaaji na tacunura juucua. Quiaari saaja na ruuretacanu.

Jesu jaacasacari seya niqutiojonaa Pueyaso Secojoua tiajiniji

(Mt 21.12-17; Mr 11.15-19; Jn 2.13-22)

⁴⁵Na nuhuaji, Jesuuri Pueyaso Secojoua tiajinia tiuquiquiaari na pueyata. Nojuajaari juhuacatecara pueya tohuatanijoree, canapuete na seya niqutiojoriquiaacuajani Pueyasooacara puecoosocoriquiano. ⁴⁶Jesuuri nojori sequeeree:

—Tariucuacaanu Pueyaso Rupaajinia naa naajiotasaaquiariti Pueyaso sequesano: “Cua tiaari pueya secojonuuja janiya”. iNiaari saniniuuja na jiyatecanu nohuasenujuaca quiquiora!

⁴⁷Puetunu juucajanaa, Jesuuri jiyacari pueya niishitiojoriquiaa Pueyaso Secojoua tiajinia. Narta Judiocuaca jiyaniijianucuaari saaja na monu paniriquiaa. Pueyacuara secojonaa jiyaniijianucua, Moisés Rootasanojiniji niishitiojonaa, mariyata narta Judiocuaca jiyaniijianucuanio, puetunu nojorijianaari tari roojotooriquiaa juucua taa na motunutianiya Jesuni. ⁴⁸Puetunu pueyajanaari saaja shamaatia tojitariquiaa puetunu Jesu sequesanojuanaa. Cunora, majaari cuno jiyaniijianucua naata monu quiriquiaa Jesu.

**Pueya nequesotasacari Jesu,
cante na jiyaronani**

(Mt 21.23-27; Mr 11.27-33)

20¹Tamonu juuca, Jesuuri Pueyaso Secojojua tiajinia niishitiojori-quiaa. Pueya niquiara pohuatariquiaari taate nojori naata Pueyaso muerasura quiniuni. Jiyacaritij, pueyacuara secojonaa jiyaniijianucuaari Jesuucua nijiomaa. Moisés Rootasanojiniji niishitiojonaari nojoritia nijiomaajuhuj, narta Judiocuaca camarucuanio. ²Nojoriiri Jesu nequesotaree:

—¿Cante quia jiyatecanu Pueyaso Secojojua tia jiyaniijia quia quiniuriani? ¡Canaa quia riucuaré! ¿Cante quia jiyaronani?

³Jesuuri nojori sequeree saniniuujia:

—Janiya nia nequesotanu paniyajuhuj. Cua riucuatere. ⁴¿Cante Juan jiyaroquiaari na tiuquinijionura pueyani? ¿Pueyasote na jiyaroquiaari, tama narta pueyajaaja soj?

⁵Nojoriiri juhuacatecara tamajaaja pocoojoquiaari. Tama sequetooriquiaa-jaarijia:

—¿Taa pa riucuanutaniyani? Paa jaara sequereni: “Pueyaso na jiyaroquiaari”, nojuajaari pa sequenutaniya: “¿Casaara nocua nia tiuyaquiquiaariirini?”

⁶Saniniuujia, paa jaara na sequereni: “Juancuaja nareja pueya jiyarosano quiquiaari”, puetunu pueyajanaari pa jacunutaniya saitia na puecoonura pajaniya. Nojoricuajaari sequequiaa: “Juanna seetanujuanaa Pueyaso sequenu panishano caminiujionura quiquiaari”.

⁷Nojoriiri cunora Jesu riucuarée:

—Johuj. Maja canaa niishiniu canaquitijia Juan jiyaroquiaari na tiuquinijionura pueyatej.

⁸Naaratej, Jesuuri nojori sequeree:

—Janiyajuhuj, majaari cua sequenu quiniutianiya nijaniya, cante cua jiyaroquiaarini naa cua miiniuriatej.

**Miriqui Jesu pohuatasano sesa
miijiaca poonijionaajiniji**

(Mt 21.33-44; Mr 12.1-11)

⁹Na nuhuaji, Jesuuri pueya niishitiojorinu coteerohuacuhuj nio miriqui pohuatasanota. Sequereeri:

—Tamonu pueyanoori cuhuariquiajinia uva nattooquiaari. Na nuhuaji, na niquitioquiaari tamasa pueyari, nojori cojuanura nera. Na camaruari tucuaanu quiaaree, tii na shocotejonura marijia.

¹⁰Uva quishacari noshuriujua, saniya cuhuariquia camarujuaanaari na seru jiyaroree cuhuariquia cojuanaa pueyacu. Jiyarosaaereeri tiji na masenura na camarurajanaa, uva carojotasanojiniji. Na camarujuaanaacuajaari tarijia pocoojoquiaari cuhuariquia cojuanaa pueyata, taa nojori niquitiojutaniana na carojotasanojinijini. Cuhuariquia camaru seru tiuquishacari, icuhuariquia cojuanaari na piquitiurii saaja! Na jiyaroturohua juhuasuuri. ¹¹Cunora, cuhuariquia camarujuaanaari tamonu na seru jiyaroree. Cuhuariquia cojuanaari na miitiurii sesajuhuj. Na saarijiotureeri. Na piquitiuriiri. Na jiyaroturohua juhuasujaariuhuj. ¹²Cuhuariquia camarujuaanaari socua tamonu na seru jiyaroree nojoriicua. Nojoriiri sesa miitiurii nojuajuhuj. Na nuhuaji, nojoriiri na caponeeree cuhuariquiajiniji tariucua naatishano.

¹³Naaratej, cuhuariquia camaruari tama sequereejaaja: “¿Taa cua miiniutianiyarini? Quiyanuniyojua jiyaroreeraquij. Cuno pojori jaara cua panishano niyanu niquitiuri, maja naasucua nojori rerequetenu quiniutianiya nojuaja”.

¹⁴Saniniuujia, cuhuariquia cojuanaa jaara cuhuariquia camaru niyanujuanaa niquirii nojoriicua niyano, tama nojorijiaarijia sequetoree: “Nojuacuaja cuhuariquia camarura quiniutianiya na

que niti, na que jaara shaajeyariquia. iPa morej! Paari nio cuhuariquia camarura quiniutianiya saniniunijia”. ¹⁵Naacujitij, cuno cuhuariquia cojuanaa pueyari cuhuariquia camaru niyanu jaatiurii cuhuariquijajiniji. iCuniqui na motureeri!

Naa nojori na pohuatanu nuhuajitij, Jesuuri pueya nequesotaree:

—Naa nojori miiniucua neyanutej, ¿taa na que miiniutianiya cuno sesa pueyarini? ¹⁶Seetanujanaa nia sequeyanijia, nojuajaari nocua quianutianiya nojori na puecoonura. Na nuhuaji, na cuhuariquia niquitionutianiya tamasa pueyari, nera nojori cojuanura cutara.

Pueya tojishacari nio, nojoriiri sequequiaari:

—iJuhuej! iPueyaso cuaara naa miyaquiiariatej!

¹⁷Jesuuri nojori niquinijiree. Nojori sequeereeri:

—¿Naatee? ¿Nio naajiotasanooriuhuj, tariucuacaanu Pueyaso Rupaajiniani? ¿Niaate niishiya casaa na sequeyani? Naa sequeyariquij:

“Saitia tianaa pueyari tamonu saajia soojotanutianiya, nojori jiyaniishacari cuno saajia sesarujajau. Na nuhuaji, cuno saajiaari socua panishano saajiaari jiyatesaanutaniuhua”.

¹⁸Cante cuno saajiaacua tiuriyani, nojuajaari juhua rashiquijiniutianiya. Cuno saajia jaara pueyanoocua tiyare, cuno pueyano jacanajonutaniyari. Shahuej.

¹⁹Jiyacaritij, pueyacuara secojonaa jiyaniijianucua, mariyata Moisés Rootasanojiniji niishitiojonaari Jesu quianu panirii juucua. Nojoricuajaari niishirii, Pueyaso saquiriojosano Israel pueya jiitianaa nojori quiniucua, Jesuuri miriqui pohuatariquiaa nojorijiniji, tianaajiniji na pohuatasacari. Naajaa, jiyacaritij, majaari nojori quiatunu

quiquiaari Jesu, nojori pueresacari Jesu panijiaa pueya.

Jiya jiyaniijia cuaara niquitiosaaria na sequesano cumaneeca
(Mt 22.15-22; Mr 12.13-17)

²⁰Naaratej, nojoriiri tamasa pueya jiyaramiquiquiaari Jesuucua, sapuenu juhua maninia pueya niquishano. Cuno pueyari jiyaramiquishaaquiaari Jesu nojori pocuate-nura sesa juucua, nocuara tonujusaanura. Jesu jaara nojori riucuaquiaari sesa, maara Romano* jiyaniijia niquitiosaquiaari saniitosocoriquiano. ²¹Naacujitij, cuno pueyari Jesu nequesotaquiaari:

—Niishitiojonanaa, canaari niishiyani, quiaari maninia niishitiojona. Majaari sesa quia sequesano. Naajuhuj, majaari rimajata quia niquiniu pueya. Quiaacua-jaaari seetanujanaa niishitiojoquiaa, taa Pueyaso paniya canaa miiniuriacuajani. ²²Cunora, canaa quia sequere taa canaa miiniutianiya. Roma tiacajinia quijia jiyaniijiaari pa sequequiaari Judiocuaca cuaara cumaneeca niquitiojoora nera, na jiitiasano pueya pa quishacari. Naaratej, ¿maniniateeri pa miiniuria na sequesano?

²³Jesuuri niishiqui nojoriiri nojuaja nequesotariquiaa najuhuanaj, nojori sapojonuta. Cunora, nojori sequeereeri:

²⁴—Cua niquitiri quia cumanee. ¿Niooriuhuj? ¿Cana naaquito nocuani? ¿Cana sesate nocua naajiotasanoni?

Jesu riucuatueeri:

—Cunocua canaa sequesano Roma tiacajinia quijia jiyaniijia César* naaqui, na sesajuhuj.

²⁵Jesuuri nojori sequereeri:

—Jiyaniijia César cuaara tama na casaajaaja niquitiosaaria. Nojuacuajaari na camaru. Saniniuujia, Pueyaso nia niquitiore cutara nerano tama na casaajaaja. Nojuajaari pa camaru.

²⁶Saaja maninia Jesu riucuasacari pueya niquiara nojori, majaari nojori

naata nocuara tonujunu quirii. Nojoriiri saniya jiuujiateree Jesu riucasacari saaja maninia nojori. Naacuajitij, nojoriiri socua sanaajetaree.

¿Paate samiitiaconutaniuhuani?

(Mt 22.23-33; Mr 12.18-27)

²⁷Na nuhuaji, noojiaqueya Saduceocua-cajinijinioori Jesuucua niquiaari. Saduceocuaaari jiyanjia macunucua pueya maja na samiitiaconu quiniutianihua. Naaratej, nojoriiri Jesu sequeeree:

²⁸—Niishitiojonanaa, supuetana Moisés cuajaari pa rootaa na naajioneejinia, pueyano jaara cusoyare mueyaju, tarajanu cuaara camiriia mashiquio, mueya na mueratenura tarajanu niti.

²⁹Tamonu mashajaari seis tapueyocuacacara quiquiaari. Nojuajaari jiyapueranu quiquiaari. Coteenu camiquiaariiri. Nojuajaari cusoquiaari muetuhuojuu.

³⁰Cunora, na nuhuajishanaari na mashiquio camirii. Nojuajaari muetuhuojuu cusoquiaarijuhuaj. ³¹Naaratej, neyaca tarajanuuri mashiquio camiquiaarijuhuaj. Nojuajaari muetuhuojuu cusoquiaarijuhuaj. Puetunu cuno mashiquiorijianaari naa camiyoquiaari cuno maajitia. Puetunu nojorijianaari cusunuuquiaari muetuhuojuu. ³²Na nuhuaji, pueya mashiquioori shaajequiaarijuhuaj. ³³Naacuajitij, macunucua jaara samiitiacorohua, ¿teyano cuno siete neyacaajinijiniote seetanu neyacajanaa quiniutianiyani? Cuno mashiquiocuaaari puetunu cuno siete pueya niquiocua quiquiaari.

³⁴Jesuuri nojori riucuarere:

—Mijiria pa quishacarijia, canuu, maajipohuari camiyoquiaa. ³⁵Saniniuujia, majaari noo pojori camyonu quiniutianiya canapuate samiitianijiosaanutaniuhacuajani, maninia quijiaa nojori quiniuucua Pueyaso niquiara mijiria. ³⁶Majaari nojori

shaajenu quiniutianihua. Nojoriiri shaajeyashijiaa quiniutianiya juhua Pueyaso seya. Nojori samiitiaconuucua macujiniji, cunora, nojoriiri Pueyaso muerasujuanaa quiniutianiya cutara. ³⁷Supuetana Moisés cuajaari pa niishitiquiaari, macunucuaari samiitiani-jiosaanutaniuhua. Moisés ri naa naajiotaquiaari Pueyaso sequesano nojuaja nequeru casaja noshiyanojinijitij. Pueyasoori naa sequequiaari Moisés:

“Janiyari quia supuetana Abraham Jiyaniijiani, quia supuetana Isaac Jiyaniijiano, quia supuetana Jacobo Jiyaniijiajuhuaj”.

³⁸Naacuajitij, paari niishiyani, puetunu Pueyasooocua tiuujiaca shaajecono pueyajanaani, nojoricuajaari saminiucua quiya Pueyasora. Pueyasoori maja macunucua Jiyaniijia. Na pueya shaajeconocuaaari saminiucua quiya nera cutara.

³⁹Noojiaqueya Moisés Rootasanojiniji niishitiojonaa pueya tojishacari naa Jesu sequesanootej, nojoriiri Jesu sequeeree:

—Maniniacuajaari quia sequesano, Niishitiojonanaa.

⁴⁰Naa Jesu rihuanesacari saaja maninia nojoritij, majaari socua pueya nequesoreenu paniniu quiriqiaa nojuaja.

¿Cante Cristo supuetanani?

(Mt 22.41-46; Mr 12.35-37)

⁴¹Jesuuri naa nojori nequesotaree saniniuujia:

—¿Casaara na sequesaaquiaacuaraari-ni, Pueyaso Jiyarosanaaari supuetana David niquiohuacuajinio supuenutaniya? ⁴²⁻⁴³Supuetana Davidjanaacuajaari naa naajiotaquiaari na jaaquequejoneejinia:

“Jiyaniijia Pueyasoori cua Jiyaniijia Cristo sequequiaari: ‘Cua miaquetajara quia cajirijiaara, janiya cuaara quia paraa shocotare puetunujuanaajaatijia’”.

⁴⁴¿Cristotucua taa David niquiohuacuajinío supuereni? Davidcuajaari na sequeya “cua Jiyaniijata”.

Cuno pueyari maja na naata na riuucuanu quiriqiaa.

Jesu numootesacari na pueya, Moisés Rootasanojiniji niishitiojonaa pueyacuaji
(Mt 23.1-36; Mr 12.38-40; Lc 11.37-54)

⁴⁵Puetunu pueyajanaa tojtiasacarijia Jesu, Jesuuri naa na saquiriojosano pueya sequeree:

⁴⁶—Tama nia cuaqueyajaaja nia cojuare Moisés Rootasanojiniji niishitiojonaa pueyacuaji, nia miyaquiniucuaaji taa nojori miiquiaacuani. Nojoriiri tucuaque toqueya cushiniu maniniucuaquiaa na rucuanejotajara pueya niquiara, pueya shootianura nojori. Nojoriiri paniquiaa pueya saruhuatanura nojori juhua tojishano pueya, nojori rucuanajosacari tiaca jiuujiajinia curotasano cajitiucujinia. Nojoriiri socua panishano cajitiucujinia cajiniu maniniucuaquiaa Pueyaso Secojojuu tiajinia, tamasaca tiajiniajuhuaj, nojori jaara masuusaare queranacunura. ⁴⁷Naajuhuaaj, nojoriiri mashiquiopue tiaca masequiaa secaja cumaneecata nojori sapojonuta. Naa jiyasohuaja nojori miiniu nuhuajitij, pueya niquiara, nojoriiri najuhuaana tucuyocua secojoquiaa Pueyaso, pueya jiyaniinuria nojori maninia pueya cutara. Naa nojori miiniucuatej, nojoriiri jiyanhua saniitiosano quiniutianiya.

Casamijiu mashiquio niquitiosacari na cumanee juuranee Pueyasora
(Mr 12.41-44)

21 ¹Pueyaso Secojojuu tiajinia, Jesuuri casamiriaca pueya shootiariquiaa na cumaneeca niojijano cumaneeca racataja quiquiojinia, nojori niquitiosano Pueyasora. ²Jesuuri tamonu casamijiu mashiquio niquiriijuhua

caapiqui cumaneeniyojuu niaano tiijuhuaaj. Na niasanoori nareja cobrejini-ji* shipinishano cumaneeca quiquiaari.

³Jesuuri na pueya sequeree:

—Seetanujuanaa nia sequeyanijia, cuno casamijiu mashiquioori socua queraatia niquitioree Pueyaso, cuno casamiriaca pueyajiniji. ⁴Puetunu cuno pojorijianaari saaja na cureeno cumaneecajiniji niquitiojiya puetunu nojori panishanojuanaa nojori masejonu nuhuaji. Cuno mashiquio cutaraari puetunu na miaajaa-ra na masetajara cumaneecajanaa niquitioree.

Jesu pohuatasacari, Pueyaso Secojojuu tia niyartasaanutaniya
(Mt 24.1-2; Mr 13.1-2)

⁵Noojiaqueya tii quiniaa pueyari pocoojoriquiaa Pueyaso Secojojuu tiajiniji. Jiyanhua shanohua saitia shipinishano quiriqiaari. Nojoriiri na shootiariquiaa, naajuhuaaj taa na maniniu shitishaaquiaari nareja pueya niquitiojosano casamitiani. Jesuuri nojori sequeree:

⁶—Puetunu cunojuanaa niaa na niquiyani, tamacari niyartasaanutaniyari. Majaari quenaaja tamonu saajia cureenu quiniutianiya tamonu caco maano. Puetunu niyartasaanutaniyajanaari.

Taa nio jiya puequenu panishacari quiniutianiyani
(Mt 24.3-28; Mr 13.3-23)

⁷Na pueyari Jesu nequesotaquiaari:

—Niishitiojonanaa, ¿taacari nio tia niyartasaanutaniyarini? ¿Casaa canaa niquiniutaniyarini, canaa niishiniuria quia sequesanoori quera tohuateya?

⁸Jesuuri nojori riuucaree:

—Tama nia cuaqueyajaaja nia cojuare niaa mariqui sapojosaareeri. Queraatia sapojonuujua pueyari supuenutaniya. Nojoriiri sequenutaniya: “¡Janiya

Cristoni, Pueyaso Jiyarosano! iNio jiya quera puequeya!” Niaa jaara naa sequesaretej, majaari nia tojiniu cuno sapojonuujuaca. ⁹Naajuhuj, majaari nia puerenu niaa jaara tojiri tamonu jiyajiniinio pueyari tamasaca jiyacajiniji pueyata miaquetoojiya, naajuhuj, pueya jaara juaatiaoquiaa tama nojori jiyaniijia nojori jatanurajaaja. Naa quiniutianiyari coteenu. Naajaa, juhuanojuaja maja nio jiya puequesacari.

¹⁰Jesuuri naa nojori pohuatariquiaa socua:

—Tamonu rupaa pocuajacaari miaquetoonutaniya tamaatia rupaa pocuajacata. Naajuhuj, tamonu jiyajiniinio jiyaniijiaari miaquetoonutaniya tamonu jiyajiniinio narta jiyaniijia. Naa queraatia miaquetoonuuri quiniutianiya. ¹¹Rijiaari jiyanoehua jiuuquuijutianutaniya queraatia jiyacajinia. Jiyanoehua miaajenuuri quiniutianiya queraatia tamonu jiyacajiniajuhuj. Paaqueja cusonuuri quiniutianiya nia, tamaquicuajuhuj. Naajuhuj, jiyanoehua puereeta casaari niquishaanutaniya jiyocuaanu, mijiria quiniaa niishiniuria jiya puequenuraari tari catecanoya.

¹²Cuno puereeta quiaquishacarijia, niaari quioosaanutaniya naquiya nia miishaanura, cua pueya nia quiniuucua. Niaari jaatucusaanutaniya Pueyaso secojonuuja tiajiniaqueya nequesoreesocoriquiano. Niaari nujuatejojuacajinia nujuatejosaanutaniya. Niaari nia pueya camarucuaacua, mariyata jiyaca jiyaniijianucuaacua jaatucusaanutaniya nequesoreesocoriquiano. Niaari naa miishaanutaniya nia pohuatanuucua janiyajiniji pueya niquiara. ¹³Naacujitij, nia naata cuno jiyaniijianucua niquiara pohuatanu janiyajiniji. ¹⁴Nioojiaca nia cajitiri, maja juhuacarijia nia niishiriojouna taa nia riucuanutaniya nojorini.

¹⁵Janiyacuaajaari jiyacari nia niishitiojo-

nutaniyani taa nia riucuanutaniyanoj, mariyata casaa nia pohuatanutaniya jiyanoehua cua niishitiajatani. Niaari nojori sanaajanutaniya maninia nia rihuuanesacari saaja. Nia paraari maja na naata nia sequesano rerequetenu quiniutianiya. ¹⁶Jiyacarijiuhuj, tama nia queyajaarijia nia tacartanutaniya, cua pueya nia quiniuucua. Nia tapueyocuaacari nia tacartanutaniyajuhuj, nia jiyasocujinio supueno pueyajuhuj, nia rupuenaanio. Nojoriiri noojiaqueya niajaniyajiniinio puecoonutaniya.

¹⁷Puetunu mijiria quiniaa pueyajanaari nia niquiniu paniaquiniutianiya cua pueya nia quishacari. ¹⁸Naajaa, majaari nia puerenu. Majaari quenaaja niquiriya-tu miesu shaajenu quiniutianiya nia nacajiniji, Pueyaso jaara paniaquiri. Pueyaso jaara naa nia miesu cojuaacuaa, ¿maatucua casaara cojuaaquiri saniya niajaniyani? ¹⁹Naaratej, rejeretajaca nia quiri. Naa cutaraari shacantuuca quijiacara jatanishaanutaniya pueyacaanu nia rishiniuria, niaa jaara cumaatia nujuatare pueya miishacari sesa niajaniya.

²⁰Niocua niishiri Jerusalén tiaca tari niyartasaanutaniya, niaa jaara na paraa niquiri puetunu na shocuaqueyanaa maano. ²¹Jiyacaritij, canapute Judea jiyajinia quiyani, cuno pojori cuaara mashiiria tuhuananuhuaacua. Canapute Jerusalén tiacajinia quiyani, nojori cuaara ritia mashiiria tiji. Canapute na cuhuariquiajia quiyani, nojori cuaara tacateyaquihuara Jerusalén tiacajinioh-
hua. ²²Cuno quishacari, jiyanoehua saniitiosacariiri quiniutianiya. Jiyacaritij, puetunu Pueyaso Rupaaajinia naajiotasanojuanaari tohuatenutaniya.

²³Jiyanoehua taraatia quiniutianiyari noo maajipohuara, canapute manajaatohua quiya jiyacarini, mariyata canapute conaaja supueja jiitiaani. Jiyanoehua

naquiya quiniutianiyari cuno quishacari nio jiyajinia. Nio jiya pueyari jiyano hua saniitiosaanutaniya. ²⁴Noojiaqueya nojorijini jinioori puecoosaanutaniya tahua miaquetoosacari nojoritia. Tamasca nojorijini jinioori quioosaanutaniya. Nojoriiri puetunu jiyacajini arajanaa rijiosaanutaniya poonitijosocoriquiano. Taucuacaari Jerusalén tiaca jiitianutaniya tama nojoririjaa ja, Jerusalén tiaca nojori jiitianu cuara puequerejaatijia, taa Pueyaso sequequiaari tamajacuajani.

**Taa na quiniutianiyani Jesu
tacatesacariuhua**

(Mt 24.29-35, 42-44; Mr 13.24-37)

²⁵Mijiria quiniaa niishiniuria jiya quera puequeya, nojoriiri puereeta casaa niqiniutianiya pananujinia, racajinia, riyajinia juhuaj. Shoniniacu caminiaacuaji shiriiqitiuniutianiyajaariuhuaj, jiyano hua na queyocuasacari. Nojoriiri cushitiiniutianiya na pueretunutaju huaj, jiyano hua cojuata shoniniacu caminia cajiniuucuasacari. ²⁶Mijiria quiniaari cusojonuunutaniya na puerenuta, nojori niishiriojosacari taa nio jiya miishaanutaniani. Puetunu jiya cajiniocua Pueyaso shipinishano casaajanaari jiuuquiutiasaanutaniya jiyano hua. ²⁷Jiyacaritij, mijiria quiniaari na niquitiuniutianiya cohuaja najacajinia niyano, jiyano hua shacantuuca cua cumaacata. ²⁸Naaratej, niaa jaara nio cua pohuatasano niquiri tari coteyano, niocua tama cumaquitioorejaa ja. ¡Niocua timiri! ¡Niaacuajaari quera rijiosaanutaniya niqijij, pueyaracaanu cuata nia quiniuria!

²⁹Jesuuri nojori pohuataree nio miriqui pohuatasano juhuaj:

—Higo naana nia niquiri, tamonu jaranacujua naananio. ³⁰Na jaamasucua jaara mueratuure, niaari niishiya, tacareejonuqui quera quiniutianiya. ³¹Naaju huaj, niaa jaara puetunu cua pohuatasano ju-

naa niquiri tari tohuateyano, niocua jiyacari niishiri, janiyari quera tiuquihuani, Jiyaniijajanaa cua quiniuria.

³²Seetanujanaa nia sequeyanijia, puetunu cua sequesanojuanaari tohuateenutaniya Pueyaso tojtiaashijiaca pueya puequeyaquishacarijia. ³³Jiya cajiniocua, mariyata nio jiyari shaajenutaniya. Cua sequesanoori saniniuuja puetunu tohuateenutaniyajanaa cutara, taa cua sequeyacuajani.

³⁴Tama nia cuaqueyajaaja nia cojuare niaa mariqui cua tojiyashijiacara quiriuhuari. Naaratej, majaari shuquiriaatia nia quiniu paniniu juucua nia queranacunuuta, nia mashaasequejonuta, mijiria casaacua nia niishiriojonutano. Maja naa nia quiniu, janiya mariqui nia cariyatureeri, jeenucuasoo nia quishacari, canashiyaquiji cua tiuquishacariuhua. ³⁵Cua tiuquishacariuhua, juhua norijiotaja quiniutianiyari puetunu mijiria quiniaa pueyarajanaa, taa norijiotaja canashiyaquiji majaacuaani.

³⁶Cunora, cucuaji jeenucuasano nia quiri juhuacarijia. Pueyaso nia secojore pueyaracaanu, maja naquiya nia miishaanura cuno taaatia quishacari, taa cua sequeyacuajani, mariyata juhuajaniya nia nujuatunura cua tajoji, cua nequesoresacari puetunu pueyajanaa.

³⁷Jesuuri puetunu juucajanaa niishitiojua Pueyaso Secojojua tiajinia. Saniniuuja, niucua quiojojuaari Olivo cuhuariquia tuhuananujinia tii na quiniuria. ³⁸Puetunu pueyajanaari tariquicuaji quiojojua Pueyaso Secojojua tiajinia, nojori tojiniuria Jesu pohuatasano.

**Judiocuaca camarucua
roojotoosacari Jesu nojori quianura**

(Mt 26.1-5, 14-16; Mr 14.1-2, 10-11;

Jn 11.45-53)

22 ¹Quera Pascuara queranacunuusacari quiquiaari, pueya miaquesacari pan* na poreetajaaju

shipinishano. ²Jiyacari, pueyacuara secojonaa jiyaniijianucua, mariyata Moisés Rootasanojiniji niishitiojonaari roojotooriquiaa juucua taa nojori motunutaniya Jesuni, nojori juaatiyaqui-niutia pueya. Nojoriiri narta pueya pueretujuaca, jiyanhua queraatia pueya paniniucua Jesu.

³Jiyacaritij, Satanásri Jesu pueyano Judas Iscariote jiuujiajinia tiuquiquiaari.

⁴Nojuajaari pueyacuara secojonaa jiyaniijianucuaacua quiaquiaari, Pueyaso Secojoua tia cojuanaa jiyaniijianucuaa-cuajuhuj. Judasri cuno pojoritia pocoojoquiaari. Nojori sequeereeri nojuaja na naata nojori quiatenu Jesu. ⁵Nojoriiri shuquiririi. Cunora, Judas sequetureeri taa cumaneeca nojori niqutionutaniya nojuajani. ⁶Judasri jaarajaaja nojori sequesano tojirii. Jiyacaritij, Judasri juhuacatecara niishiriojoquiaari taa na quiatenutaniya Jesu jiyasohuajani.

**Jesu miaquesacari na
nuhuajiria na pueyata**

(Mt 26.17-29; Mr 14.12-25; Jn 13.21-30;
1 Co 11.23-26)

⁷Poreetajaaju pan miquenu juucaari tari quiquiaari. Cuno juucajuhuaj, borregoori mosano quijia, Pueyaso niquiara miaquesocoriquiano Pascuara queranacusakari. ⁸Cunora, Jesuuri Pedro jiyaroree Juannio, nojori miaquesocoriquiano nojori majeetenura. Nojori sequeereeri:

—Nia quiaare. Borrego nia majeetesecuaa pocuaji, pa miaquesocoriquiano quiarijia Pascuara*.

⁹Nojoriiri na nequesotaree:

—¿Tee quia paniya canaa majeetenurani?

¹⁰Jesuuri nojori riucuree:

—Niaa jaara Jerusalén tiacajinia tiuquishii, niaari tamonu pueyano riuriatanutaniya mohuaca taquitiaano

patacojinia. Niocua na nuhuaji rupaamia na tiajinia. ¹¹Cuno tiajinia na tiuquishacari, niocua cuno tia camaru sequeere: “Canaa niishitiojona naa quia sequeya: ‘¿Teete sohuacani, cua pueyata cua miaquejara quiarijia Pascua niucuan?’” ¹²Nojuajaari nia niqutiniutianiya puereetuca sohuaca, nataco na tiajinia, tariucua jeenucasano. Niocua cuniqui miishii puetunujuanaa pa miaquesocoriquiano.

¹³Jesu pueyari quiaaree. Nojoriiri puetunujuanaa riurataquiaari taa Jesu sequequiaari nojoricuajani. Nojoriiri tii miishii puetunujuanaa, Pascua niucua nojori miaquesocoriquiano.

¹⁴Jaara tari quiquiaari Pascuara miaquesacari niucua, Jesuuri na saquirio-josano pueyata cajitiushii miaquejajinia.

¹⁵Jesuuri nojori sequeere:

—Janiyari jiyanhua niaata miquenu paniriquiaa nio Pascua niucuan, pueya moyaquishacarijia janiya. ¹⁶Seetanujanaa nia sequeyanijia, majaari socua cua miquenu quiniutianiya Pascuara, janiya jaara tiuquiriohuajaatijia puetunu Pueyaso muerasuranotajanaa. Jiyacari cutara, paari jatiqui miquenutaniyani, Jiyaniijiajanaa cua quishacari.

¹⁷Na nuhuaji, Jesuuri ratujua pataree. Pueyaso sequeereeri:

—Paacarasho nio mashacara.

Na pueya sequeereeri:

—Jajaa, nio nia masetare. Nia rature puetunu niajanijajanaa. ¹⁸Seetanujanaa nia sequeyanijia, majaari socua cua ratunu quiniutianiya uva* caacajiniji, janiya jaara tiuquiriohuajaatijia, Jiyaniijiajanaa cua quiniuria puetunu Pueyaso muerasurajanaa.

¹⁹Na nuhuaji, Jesuuri pan ririi. Pueyaso secojoree nocuaraari. Na neecasereeri. Na pueya na niqutiojoreeri. Nojori sequeereeri:

—Nioori cua cuaqueya niaacuara mosocoriquiano. Niocua naa miiriquia

pueyaracaanutej, nia niishiriojonura janiya.

²⁰Nojori miaquenu nuhuaji, Jesuuri ratujua patareejuhuj. Naa sequereeri:

—Cua nanacaari niaacuara shoonutaniya nia jiyanooshaanura seetanujuanaa. Majaari socua seya nanaca panishaanu quiniutianiya. Quiarijiani, saaja cua nanaca shoonuucua, Pueyasoori pueya jiyanooniutianiya.

²¹Cua tojitiare. Quiarijiani, cante cua tacartanutaniya pueya na motenura janiyani, nojuajaari cuata miaqueya.

²²Janiyari naa miishaanutaniyani taa janiyajiniji juhuacarijia pohuatasaquiaa-ricuajani tariucuacaanu Pueyaso Rupaajinia. Saniniuujia, cua tacartanaari jiyanoohua taraatia quiniutianiya naa na miiniuucua janiya.

²³Jesu pueyari jiyacari juhuacatecara nequesoreetooree tama nojorijiaaja:

—¿Canteeri na tacartanutaniyani?

Cante seetanujuanaa jiyaniijiajanaani

²⁴Jesu pueyari tama juayonuutariquiaa-jaacujua, teyano nojorijinijiniote jiyaniijiajanaani. ²⁵Jesuuri nojori sequeree saaja:

—Mijiria, jiya jiyaniijianucuaari jiyanoohua jiyaramiquiniu niishijia nojori jiitiasano pueya, juhua nojori poonitijio-sano pueya. Nojoriiri tama nojorijinijiaaja sequeja: “Canaari maninia miiquiaa canaa pueyani”. ²⁶Niajaniya saniniuujia, majaari naa nia quiniu juhua nojorijia. Cante socua tojishano pueyano quiya niajanijajinini-nioni, nojuaja cuaara tama na cuaqueyajaaja jiyateyaquiiria na cumaaca paaretaja pueyacua. Cuaara quiiria jacaria pocuaja. Naajuhuj, cante jiyaniijiajanaa quiya niajanijajinini-nioni, nojuaja cuaara jiyateera tama na cuaqueyajaaja juhua nia serura. ²⁷¿Taa nia sequeyani? ¿Cante jiyaniijiajanaani?

¿Miaqueyano pueyanotee? ¿Na mianuute-na soj? ¡Miaqueyano pueyanocuaaja! Naajaa, janiyari juhua nia seru quiquiaa niaarani, maninia cua miiniuria niajaniya. Naajuhuj, naa maninia miijiaca nia quiriqia.

²⁸Niaacuajaari pueyaracaanu cua cojiriquiaa janiya jaara saniniujiushaari-quiaani. ²⁹Naaratej, janiyari nia jiyatenutaniya jiyaniijianucua nia quiniuriani, taa cua Que jiyatequiaari janiyacuaani, Jiyaniijia cua quiniuria. ³⁰Naacuajitij, niaari cua miaquejajinia cajituniutianiya cuata nia miaquejonura, cuata nia raruujunurajuhuj, Jiyaniijiajanaa cua quishacari. Niaari mariyata jiyaniijianucua quiniutianiya, supuetana Israel doce niquiohuacuajinio supueno pueyapue nequesoreenaa nia quiniuria.

Jesu sequesacari Pedro,

nojuaja nocuaji seetanutaniya

(Mt 26.31-35; Mr 14.27-31; Jn 13.36-38)

³¹Jiyaniijia Jesuuri Pedro sequequiaari:

—Simónnaa, cua tojiri. Satanásri niaacuara sequerucuaa Pueyaso, jiyanoohua na saniniujiuniuria niajaniya. Naacuajitij, niaari jiyanoohua saniniujiushaanutaniya, naatej, taa trigo quejooshiya jiyocuaaanucuaani, paratu panura na cocua. ³²Janiyari saniniuujia Pueyaso secogoree quiocuara cutarani Simónnaa, cucua tiuuniu quia tarinitiaa-quiniuucuaaji. Naacuajitij, quiaa jaara quioojia tacatorohua cucua, quiocua quiarta pueya cumaquiriohuajuhuj, nojori tiuuniuria seetanujuanaa pueyara-caanu cucua.

³³Simónri Jesu sequeree:

—¡Cua Jiyaniijianaa, quiaa jaara nujuatejojuajinia nujuatesaare, janiya cuaara nujuatesaaria quiatajuhuaj! ¡Quiaa jaara mosaare, naajaa, janiya cuaara cojiritiasaaria quiajanijajuhuj!

³⁴Jesuuri na sequeree:

—Pedronaa, seetanujuanaa quia sequeyanijia, caacaraja niunijiaquishacarijia quiarjia, quiaari tari naa cucuaji seetanu caminiujiuniutianiya pueya niquiara: “iMaja cua niishiniu Jesu!”

Quera Jesu miishacari taraatia

³⁵Jesuuri na pueya nequesotaree:

—Janiya jaara nia jiyaramiquiquiaari Pueyaso rupaa nia pohuatanura caashoqueejuni, cumaneeca quiquiooju, sapatuujunio, ¿niaateeri nia panishano casaa niquitioyaquishaaquiaari?

Nojoriiri Jesu riuwaree:

—Maja. Canacuajaari puetunu canaa panishanojuanaa niquitiojosaaquiaarini.

³⁶Jesuuri nojori sequeree:

—Quiarjia saniniuuja, cante caashoqueracani, cuaara na pataara. Cante cumaneeca quiquioracani, cuaara na pataarajuhuj. Cante nijiniaquetucujaja mueruu jiiitaaquiyani, cuno cuaara niquitioora na shiniquiaacuaji toque, nijiniaquetucujaja mueruu na masenura na toque samitia. ³⁷Seetanujuanaa nia sequeyanijia, tariucuaaanu Pueyaso Rupaajinia janiyajiniji naajiotasanoori tohuateenutaniya. Janiyajiniji naajiotasanoori naa sequeyatej: “Nojuajaari jiyanishaaree sesa mijia, sesa mijiacata na teetesacari”. Puetunu janiyajiniji naajiotasanojuanaari tari tohuateya taa na naajiotasaaquiaaricujani.

³⁸Nojoriiri Jesu sequeree:

—Jiyaniijianaa, niya quiya caapiqui nijiniaquetucujaja mueruu.

Nojori riuwareeri:

—Tariucujaja.

**Jesu secojosacari Pueyaso,
Getsemaní cuhuariquijainia**
(Mt 26.36-46; Mr 14.32-42)

³⁹Na nuhuaji, Jesuuri tohuataquiaari tijajiniji. Olivo cuhuariquia tuhuananujiniara quiaareeri. Nojuajaari cuniqui

quianura jiiitiquiaari. Na saquiriojosano pueyari na nuhuajiyaree. ⁴⁰Na tiuquishacari tii, Jesuuri nojori sequeree:

—Pueyaso nia secojore, niaa mariqui sesa miiriiri niaa jaara saniniujiushaare.

⁴¹Na nuhuaji, Jesuuri tamajaaja quiaaree socua nojori taccoji, juhua saajia tishaqui, pueyano jasacari. Tii mojoquetasee Pueyaso secojonuraari. ⁴²Naa secojoreeri:

—iCua Quenaa, maja cua miiniu paniniu naquiya! Naajaa, janiya cuaara miyaquishaaria taa cua paniyani. Janiya cuaara miishaaria cutara taa quia paniyacuajani.

⁴³Jiyacaritij, Pueyaso seruuri jiyocuaaanuji nocua nimiaa na cumaquiniuria.

⁴⁴Jesuuri jiyanohua naquiya miiriquiaa. Noojaari quera jiaqueriquiaa na tacaanuitia. iJiyanohua, jiyanohua secojoriquiaa Pueyasoori! Cunora, na paneyacaari puereetujaaca juhua nanaca quiriquiaa, na caatesacari jiyocua. ⁴⁵Na secojonu nuhuaji, Jesuuri sanerohua. Na pueyacia tacateyarohuari. Nojori niquishuhua maquetiuyano saajaari, puera nojori taraajenuucua. ⁴⁶Jesuuri nojori sequeree:

—¿Casaara nia maquetiuyani? Nia sanecature. Pueyaso nia secojore na cojuanura niajaniya, maja sesa nia miiniuria niaa jaara saniniujiushaare.

Judiocuaca camarucua quiasacari Jesu
(Mt 26.47-56; Mr 14.43-50; Jn 18.2-11)

⁴⁷Jesu pocuasacarijia na pueyata, queraatia pueyari jiyacari nocua tiuquishii. Judasri cuno pojori puetariquiaa. Nojuajaari Jesu doce saquiriojosano pueyajinijinio quiquiaari. Judasri Jesuucua nimiaajanana. Na saruhuataseeri na nujuunuta. ⁴⁸Jesuuri na sequeree:

—Judasnaa, ¿quiaate tama cua tacartaajaaja, quia nujuunuta sapojonu janiya?

⁴⁹Jesu pueya niquishacari casaa cuno pueya miiniu paniriquiaani, nojoriiri Jesu nequesotaree:

—Jiyaniijianaa, ¿canaate nojori miaqueyani?

⁵⁰Tamonu nojorijinijinioori pueyacuara secojonaa jiyaniijia seru pirii na mueruuta. Saaja na miaquetajara numoco jaatereeri. ⁵¹Jesuuri na sequeree:

—iTariucua! Maja naa miiniu.

Jesuuri numoco ririi. Na ruporohuari.

⁵²Judasta quiriquiaari pueyacuara secojonaa jiyaniijianucua, Pueyaso Secojoju tia cojuanaa jiyaniijianucua juhuaj, Judiocuaca camarucuanio. Nojoriiri Jesuucua nijioquiaari na quianura. Jesuuri cuno pojori sequeree:

—¿Casaara cucua nia nijioree nijiniaquetucua ja mueruutani, macacatanio nia quianura janiyani? ¿Janiyateeri nohuasejojuani, naa nia nijionura cucuatej? ⁵³Pueyaracaanu cua quishacari niaata Pueyaso Secojoju tiajinia, majaari nia quianu quijia janiya. Naajaa, quiarijia cutaraari niajaniyara, nia panishano nia miiniuria janiya. Quiarijiani, Sesaacaari cumaacaraca na panishano na miiniuria.

Pedro seetasacari Jesujiniji

(Mt 26.57-58, 69-75; Mr 14.53-54, 66-72;

Jn 18.12-18, 25-27)

⁵⁴Jiyacaritij, nojoriiri Jesu quiaree. Na jaatucutiuyareeri pueyacuara secojonaa jiyaniijia tiajinia. Pedroori tucuaaanuji na nuhuajiriquiaa. ⁵⁵Jiyacaritij, pueyari jiyaniijia tia carijiniacuma mani noshitirii. Na shocua cajituriohuari. Pedroori nojori tajinia cajishijihuaj.

⁵⁶Cuno jiyaniijia serujinijinioni, niyacoori Pedro niquirii mani jitiyano. Nojuajaari Pedro shootariquiaa. Na nuhuaji, niyacoori Pedro shishirii. Sequereeri:

—Noo pueyanoori cuno quiasano pueyanota quijiajuhuaj.

⁵⁷Pedroori seetaree. Naa sequereeri:

—Niyaconaa, imajaari quenaaja cua niishishano cuno pueyano!

⁵⁸Na nuhuaji, tamonu pueyanoori Pedro niquiriijuhuaj. Nojuajaari cuno jiyaniijia seru quiriquiaajuahuaj. Pedro sequereeri:

—iQuiaaqui cuno pojorijinijinio pueyanojuhuaj!

Pedroori saa sequereejaa:

—iMaja, pueyanonaa! iJaniya maja nojorijinijinioni!

⁵⁹Pasaja na tarishiniu nuhuaji, tamonu pueyanoori sequenu pacuterohua:

—Nio pueyanocua jaari cuno pueyanota quijia. Nojuajaari Galilea jiyajinijiniojuhuaj.

⁶⁰Pedroori saa sequereejaa:

—iPueyanonaa, maja cua niishiniu quenaaja casaa quia sequeyani!

Pedro pocuasacarijia, jiyacaritij, caacara jaari niunijioree. ⁶¹Jiyaniijia Jesuuri tacatequee. Na nijiniara niquirii Pedroori. Pedroori jiyacari Jiyaniijia sequesano nojuaja niishiquii, naa na sequesantej: “Quiaari tari seetanu caminiujiniutianiya janiyajiniji pueya niquiara, caacaraja niunijiyaquishacarijia”. ⁶²Pedroori cuniquiji tohuataquee. Jiyano hua nujuquereeri na taraajenuta, sacuaatia na seetanuucua.

Pueya macaatishacari Jesu

(Mt 26.67-68; Mr 14.65)

⁶³Jesu cojuanaa pueyari Jesu macaatiriquiaa. Nojoriiri na piquitiuriquiaa.

⁶⁴Nojoriiri Jesu namijia morotuquiaari coteenu. Na jiquioco piquitiuriohuari. Na nuhuaji, na sequetureeri:

—iQuia niishiritioj! ¿Cante quia piriini?

⁶⁵Nojoriiri socua queraatia sesa casaa sequeturiquiaa na macaatinuria Jesu.

Judiocuaca jiyaniijianucua nequesoreesacari Jesu

(Mt 26.59-66; Mr 14.55-64; Jn 18.19-24)

⁶⁶Jaara juhuaquequiaari, Judiocuaca camarucuaari rerejoree pueyacuara

secojonaa jiyaniijianucuaata, mariyata Moisés Rootasanojiniji niishitiojonaatajuhuaj. Nojoriiri Jesu jiyataquiaari Judiocuaca jiyaniijianucua rerejosaquiria. Nojoriiri na nujuatesee jiyaniijianucua tacoji, nojori nequesoreenura tii nojuaja. Nojoriiri naa Jesu nequesoreeree:

⁶⁷—Canaa quia sequere, ¿quiaate Cristo, Pueyaso Jiyarosano?

Jesuuri nojori riucaaree:

—Janiya jaara nia sequereni: “Taaquiririnij”, niaari saaja cua sequenutaniya: “Quiaa sapojiya”. ⁶⁸Saniniuujia, janiya jaara nia nequesoreere Pueyaso Jiyarosanojinijini, majaari nia riucaanu quiniutianiya janiya. ⁶⁹Naajaa, quiarijiani, janiyari puetunu cumaacaraca Quijiajanaa miaquetajara cajiniutianiya jiyocuacaanuni.

⁷⁰Naa Jesu sequesacaritij, puetunu nojorijianaari na sequeree:

—¿Quiaateeri tama sequeyajaaja quiaari Pueyaso Niyanu?

Jesuuri nojori riucaaree:

—Taaquiririnij. Naacuaaquinatejaj, taa nia sequeyacuajani.

⁷¹Nojoriiri tama sequetooreejaja:

—¿Paatucua casaara socua tamonu pueyano pajere nocuara tonujuriquiano-ni? Paacuajaari tari tama pa numaatajaaja sesa na sequesano tojitiareeni.

Pilato nequesoreesacari Jesu

(Mt 27.1-2, 11-14; Mr 15.1-5; Jn 18.28-38)

23 ¹Cuno nuhuaji, puetunu nojorijianaari sanetaree. Jesu jiyatatiuyareeri jiyaniijia Pilatoocua.

²Cuniqui, nojoriiri juhuacatecara Jesuucua saquiriojotaree na sapojonuta. Pilato sequetureeri:

—Canaari nio pueyano niishiyani.

Nojuajaari canaa Israel pueya nasojoquiaa pocuara. Nojuajaari niishitiojoquiaajuhuj, maja canaa Israel pueya

niquitiojonura canaa cumaneeca pa jiyaniijiajanaa Césarra, taa César sequequiaaricuajani. Naajuhuj, tama nojuajaari naa sequequiaa: “Janiya Cristoni, Pueyaso Jiyarosano, nia jiyaniijia cua quiniuria”.

³Pilatoori Jesu nequesotaree:

—¿Quiaate Judiocuaca jiyaniijia?

Jesuuri na riucaaree:

—Taaquiririnij. Naacuaj, taa quia sequereecuajani.

⁴Jiyacaritij, Pilatoori pueyacuara secojonaa jiyaniijianucua sequeree, pueya maanunio:

—Nio pueyano nequesoreeree tarinijia. Nojuajaari maja sesa miiijia.

⁵Nojoriiri saaja socua jiyacaterree Jesuucua tonujunu. Naa sequetureeri:

—iNojuajaari puetunu canaa Judiocuacajanaa sesoya na niishitiojosanota! Nojuajaari Galilea jiyajinia niishitiojonu coteequiaari. Quiarijia, niya niishitiojiyajaariuhua Judea jiyajiniani.

Jiyaniijia Herodes nequesoreesacari Jesu

⁶Pilato tojishacari naa nojori sequesanotej, nojori nequesotareeri:

—¿Nio pueyanote Galilea jiyajinijinio?

⁷Nojoriiri na riucaaree:

—Jaa.

Cunora, Pilatoori pueya jiyarotaree Jesu, Galilea jiya jiyaniijia Herodescua. Herodesri namitia tii Jerusalén tiacajinia quiriquiaa jiyacari. ⁸Nojuajaari pueyacaanu Jesu niquiniuucua jiaatiya juucua. Herodesri tari pohuatasaaquiaari Jesujiniji. Naaratej, Herodesri Jesu miishacari na cumaacata niquiniu panijia juucua. Naacujitij, na niquishacari Jesu, nojuajaari timirii. ⁹Herodesri queraatia nequesoreeree Jesu. Majaari quenaaja Jesu riucaanu quiquiaari nojuaja.

¹⁰Pueyacuara secojonaa jiyaniijianucuaari tii quiriquiaajuhuj, Moisés Rootasanojiniji niishitiojonaanio. Cuno

pojoriiri jiyanoehua Jesuucua saquiriojotariquiaa queraatia sesa casaa.

¹¹Herodesri na soldadohuata Jesu rerequeteriquiaa. Na macaatiriiri. Na cushitirii jiyanoehua shanohua toqueeri juhua jiyaniijia cushishano. Na nuhuaji, Herodesri pueya jiyarotarohua Jesu Pilatoocua. ¹²Herodesri cuno juuca Pilato rupuenara quiquiaari. Coteenu, majaari nojori niqutioonu paniniu quijia. Nojoriiri saaja shocotetoojua.

**Puetunu pueyajanaa sequesacari
Jesu cuaara mosaaria**

(Mt 27.15-26; Mr 15.6-15; Jn 18.39-19.16)

¹³Na nuhuaji, Pilatoori pueyacuara secojona jiyaniijianucua rerejotequiaari na tacoji, Judiocuaca camarucajuhuj, tii quiniaa pueyano. ¹⁴Nojori sequeereeri:

—Niaari nio pueyano jaatucuree cucua najuhuanaj. Niaari cua sequeturee, nojuajaari niarta pueya nasojoquiaa. Janiyacuajaari na nequesoreeriquiaa nia niqiarani. Niaacuajaari cua tojitiariquiaa cua nequesoreesacari nojuaja. Quiaarijia niishiya cutaranijia, puetunu nocuara nia tonujusanujuanaari maja seetanujanaa. ¹⁵Jiyaniijia Herodesquiiri tari niishiyajuhuj, majaari seetanujanaa nocuara nia saquiriojotasano. Cunora, Herodesri pocua na jiyarorohua. Seetanujanaa, majaari sesa na miiniu quiquianu na mosaanura. ¹⁶Janiyari na majacutenutaniya narejani, cartesaarohuari.

¹⁷Pascua juucara queranacusacari, Pilatoori nujuatesano pueyano cartenu jitiitiquiaari nujuatejojuajini. Nojuajaari naa miiquiaari pueyaracaanutej, pueya na shuqiritiniuria. ¹⁸Jiyacaritij, puetunu pueyajanaari juhuacatecara jiyanoehua nacee jatiqiu:

—iJesu quia more! iBarrabás quia cartere saniniujia!

¹⁹Tarijia cuno Barrabásri narta nasojosano Judiocuacata Romano* pueya

taanuquiaari juucua Jerusalén tiacajini. Nojuajaari jiyacari pueyano moquiaarijuhuaj. Cunora, nojuajaari nujuatejojuajinia nujuatesano quiriquiaa. ²⁰Pilatoori Jesu cartenu panijia juucua. Naaratej, Pilatoori pueyata pocojorohua socua. ²¹Pueyari saaja jiyacaterree jiyanoehua nacoonura jatiqiu:

—iCuaara mosaaria niyacutesanojinia teetesano! iCuaara mosaaria!

²²Pilatoori pueya sequenu pacuterohuacuhuj:

—¿Maatucua casaara mosaarejaarani? ¿Sesa miiritijiaaraj? Janiyacuajaari tari na nequesoreereeni. Majaari sesa na miiniu quirii na mosaanura. Janiyari na majacutenutaniya narejani. Na nuhuaji cartesaarohuari.

²³Pueyari saaja socua jiyanoehua nacooree niyacutesanojinia na mosaanura. Pueyacuara secojona jiyaniijianucuaari mariyata pueyata jiyanoehua nacooriquiaa. Puera jiyanoehua nojori nacoosacari, nojoriiri Pilato shocotaree. Cunora, Pilatoori maja na naata cartenu quirii Jesu, taa na paniriquiaacuajani. ²⁴Naaratej, Pilatoori socua tariniriohuj. Pueya panishano miiriiri. ²⁵Pueya sequesano pueyano cartereeri, cante nujuatesaquiaari nujuatejojuajiniacuajani na taanuunu paniniucua Romano pueya, na monucua pueyanohuj. Na nuhuaji, Pilatoori Jesu tarinitiaree socua, nojori mosocoriquiano, taa nojori paniriquiaacuajani.

Niyacutesanojinia Jesu teetesacari

(Mt 27.32-44; Mr 15.21-32; Jn 19.17-27)

²⁶Pueya jiyatasacari Jesu puecoosaquiria, nojoriiri tamonu pueyano quiaree Jerusalén tiacajiniara riujiuyano juucua. Nojuajaari Cirene jiyajiniujio pueyano quiquiaari. Na sesa quiquiaari Simón. Nojuajaari niyacutesano patesaree Jesu nuhuaji.

²⁷Queraatia pueyari Jesu nuhuajiriquiaa, queraatia maajipohuanio. Maajipohuari Jesuucua nujuqueturiquiaa, na nuhuaji nojori sacuasacari. Nocua sapiyonuuri-quiaari, nocua nojori taraajenuta.

²⁸Jiyacaritij, Jesuuri cuno maajipohuacua tacateree. Nojori sequereeri:

—Jerusalén tiacajiniji maajipohuanaa, maja cucua nujuquetunu. Tama niaacuajaja nia nujuquette, nia niquiohuacuanio.

²⁹Na nuhuaji, jiyanhua taraatia quishacariiri quiniutianiya niaara, jiyanhua taraatia. Jiyacaritij, pueyari sequenutaniya: “Socua shuquiriaatia quijiaca cutaraari noo maajipohua cante muetuyashijiani, cante manajeyashijianucuanu, mariyata cante mueya supueteyashijianucujaniuhuj”.

Mueyaraca maajipohuari jiyacari jiyanhua taraajenutaniya, nojori niquishacari necohua miishacari naquiya. ³⁰Naquiya miishacari, jiyacaritij, pueyari tuhuananuhua sequenutaniya: “iCanaacua quia jiyaretaare!” Naajuhuj, shiitianiyojua tuhuananuhua sequenutaniya: “iCanaacua nia tiyare canaa nia jamonura!”

³¹Jiyacariiri jiyanhua naquiya miishacari quiniutianiya. Quiarijia, janiya jaara naa naquiya miishiyacuani, ñtaaquitijia Pueyaso tojtiaashijia miishaanutaniyate-jaj?

³²Caapiqui sesa miijiaacari jaatucunuu-saariquiaajuhuj, mariyata teetejosocoriquiano Jesuta. ³³Nojoriiri puecoosaqui tiuquijioosee. Cuniqi pueya puecoosaquini, na sesa quiquiaari “Pueyano Nacaco”. Nojoriiri tii Jesu teeteree maca niyacutesanojinia. Cuno caapiqui sesa miijiaacari teetejosaarejuhuj, niquiriyatu na miaquetajara, tamonu na muenecara. ³⁴Jesu jaara tari pijiosaariquiaa maca niyacutesanoocua, nojuajaari na Que Pueyaso sequeree:

—iCua Quenaa, quia jiyanoori nio pojori! Majaari nojori niishiniu casaa na miituyani.

Na nuhuaji, soldadohuari saitia tacuari-shijiooree, nojori niishiniuria taa nojori seraatianutaniya Jesu toqueni. ³⁵Pueyari Jesu shootiariquiaa. Judiocuaca jiyaniijianucuaari jaarajaaja Jesujiniji naa tama sequetooriquiaajaaja:

—Nojuajaari saaja tamonu pueya naataniojua. Quiarijia, nojuaja jaara seetanujuanaa Pueyaso Jiyarosano Cristo quiri, cuaara roseera niyacutesanojiniji pa niquiara.

³⁶Soldadohuari Jesu macaatiriquiaajuhuj. Nojoriiri Jesu raateree piiquia vino juucua. ³⁷Jesu sequetureeri:

—Quiaa jaara Judiocuaca jiyaniijia quiri, iniyacutesanojiniji quia roserecuarajaj!

³⁸Jesu nacaacuma, suruhuatuneeri rupotasaquiaari naajiosano Griego rupaajinia, Romano pueya rupaajinia, Hebreo rupaajinianio. Tii naajiotasano quiriquiaari naa nocuara pueya saquirio-jotasano: “Nio pueyanoori Judiocuaca jiyaniijia”.

³⁹Tamonu cuno sesa miijiaacajinijinio Jesu shuriucua teetesano quiriquiaani, nojuajaari Jesu rerequeteriquiaajuhuj. Naa Jesu sequeriquiaari:

—Quiaa jaara Pueyaso jiyarosano Cristo quiri, tama quia roserejaaja cuniquiji. iCanaa quia roshinijiorejuhuj!

⁴⁰Narta sesa miijaari na juaarii:

—¿Quiaateeri Pueyaso puereyashijia? Quiaari mosaanutaniyajuhuj. ⁴¹Pajaniya cutaraari sesa pa miiniucua naquiya miishiyani. Paacuajaari maninia saniitio-shiyani sesa pa miiniucua. Saniniujia, nio pueyano pa tajiina nujuataani, inojuajaari sesa miyashijia cutara!

⁴²Na nuhuaji, narta sesa miijia juaaniaari Jesu sequeree:

—Jesunaa, majaari cua niyjetanuuja, Pueyaso jaara quia jiyatere Jiyaniijiajanaa quiniuria.

⁴³Jesuuri na riucaaree:

—Seetanujuanaa quia sequeyanijia, quiarijiani, nio juuacaja, quiaari cuata quiniutianiya shuquiriaatia quishaqui cutara.

Jesu cusosacari

(Mt 27.45-56; Mr 15.33-41; Jn 19.28-30)

⁴⁴Panacari, ijiyari ninishiquiria quiquiaari puetunujuanaa, juhua niucua! Pananu piriushacari, cuhuatemohuari.

⁴⁵Jiya quishacaritia ninishiqui, jiyacaritij, Jerusalén tiacajinia Pueyaso Secojoua tiajinia, ijiyanohua shiquiquia toquejiniji sohuacaari noojiaacoji sutequiaari puetunujuanaa querajaquera! ⁴⁶Jiyacari-jiuhuj, Jesuuri nacaree:

—iCua Quenaa, cua sohanu quia cojuare!

Naa na sequenu nuhuajitij, Jesuuri cusoquee.

⁴⁷Romano soldadohua jiyaniijia niquishacari puetunu niojuanaa, nojuajaari maninia sequeree:

—iSeetanujuanaa, nio pueyanoqui sesa miyashijia quiquianu!

Naa na sequesanoori Pueyaso shuquiri-tirii.

⁴⁸Puetunu pueyajanaa, canapuede Jesu shootariquiaa cusoyanoni, nojoriiri taraatia na tiajinia quiojoquiaariuhua. Nojoriiri tama na jiriquiaajaja piquiniu-quiaariuhua, jiyanoohua nojori tacaaniutia naa nojori monuucua Jesu. ⁴⁹Saniniuujia, puetunu Jesu niishishano pueyajanaari tii jiyojetarohuajaa, maajipohuajuhuj, canapuede Jesu nuhuajiquiaari Galilea jiyajinjicujani. Puetunu nojorijianaari tucuaanuji niquitiariquiaa Jesu.

Jesu quete niasacari raaco

(Mt 27.57-61; Mr 15.42-47; Jn 19.38-42)

⁵⁰Tamonu maninia pueyanoori quiquiaari. Nojuajaari Pueyaso tojjia pueyano quiquiaari Arimatea tiacajinijio. Cuno tiacaari Judea jiyajiniajuhuaj.

Cuno pueyano sesa quiquiaari José.

Nojuajaari Judiocuaca jiyaniijianucujini-jinio quiquiaari. ⁵¹Cuno Joseeri Pueyasocuaa tiuujia quiquiaari. Nojuajaari pueyaracaanu sashijia, Pueyaso Jiyarosocoriquiano cuara Jiyaniijia jiyatesaaria cutara. Cunora, majaari José paniniu quiquiaari cutara, narta jiyaniijianucua sequesacari Jesu cuara mosaaria. ⁵²Naacuajitij, Jesu cusosacari, Joseeri Pilatocua quiaquiaari, Jesu quete na masenura. ⁵³Na nuhuaji, Jesu quete roshinirii niyacutesanojinijiri. Na jiuniocoreeri cohuajaque quenaaruque toquejinia. Jesu quete niaree tarijia na jiuutianishano saajiajiniaari. Cuno raajinia, juhuanouaja maja macu niasaanu quiquiaari. ⁵⁴Cuno juucaari quiquiaari Judiocuaca jeenucasacari juhuacaritia samaatenu juucaacuara. Nojori samaatenu juucaari quera coteeriquiaa tari. Judiocuacaara, pananu tiuquishacari, tamonu juucaari tari coteequiaari nojoriria.

⁵⁵Cuno maajipohua, cante Jesuta nijioquiaari Galilea jiyajinjicujani, cuno pojoriiri José nuhuajiquiaari raajiniara. Nojoriiri raaco niquishii, taa Jesu quete niasaareeni. ⁵⁶Nojori riujuuushacariuhua na tiajiniohua, nojoriiri juhuataja shanohua jaanutaja cojitijiosuhua, macuucua nojori niojosocoriquiano. Na nuhuaji, nojoriiri pootia quiriohua samaatenu juuca, taa Moisés rootaquiaa-ricujani.

Jesu samiitiasacariuhua

(Mt 28.1-10; Mr 16.1-8; Jn 20.1-10)

24 ¹Coteenu semaana juucajinia, cuno maajipohuari tariquicuaji raajinia-ra quiaquiaari. Nojori cojitijiosano shanohua jaanutaja patootaareeri. ²Nojori tiuquijiosacari raajinia, saajiajiniji quejasano raa tiootiu niquitiushiiri tariucua tamocora shuquitishano. ³Naaratej, nojoriiri raaco

tiuquitiamaa. Shaaqui quiriquiaari Jiyaniijia Jesu quete. ⁴Nojoriiri shiriquirii. Majaari nojori niishiniu quiriquiaa taa nojori miiniutianiyani. Canashiyaquiji caapiqui pueyari nojori shuriucua nujuatuquee. Nojori toqueeri shacantuque quiriquiaa. ⁵Maajipohuari na puerenuta jiyocuara naniquioree. Cuno canuuri nojori sequeree:

—¿Casaara nia pajeya saminio pueyano macu niojosaquini? ⁶Maja tari nia na quiniu. ¡Tari samiitiarohuano! ¿Niaateeri tari niyaretaree na sequesano niajaníya, Galilea jiyajinia na quishacarijia? ⁷Nojuajaa-ri tari nia sequecanucuaaja, nojuaja sesa miijiaa niquitiosaanutaniya. Nojoriiri na monutaniya niyacutesanojinia. Na nuhuaji, nojuajaari samiitianutaniuhua jiuujianaraca juucajinia.

⁸Jiyacaritij, maajipohuari shusha niishiqui tarijia Jesu sequesano nojori. ⁹Nojori tacatesacariuhua jamajiniji, nojoriiri Jesu once saquiriojosano pueya caminiujiushuhua puetunu niojuanaa, puetunu Jesuucua tiuuníaa pueyajanaano. ¹⁰Cuno maajipohua, Jesu saquiriojosano pueya pohuataquiaariuhua, nojoriiri nio maajipohua quiquiaari: María Magdalena, Juana, Santiago nucua Maríajuhua, socua tamasa maajipohuanio. ¹¹Jesu once pueyara, maajipohua pohuatasanoori juhua paateca sequesano quiquiaari saaja. Nojoriiri saa cuaracashitirijiaa maajipohua pohuatanuusano.

¹²Naajaa, Pedroori tijajiniji netequiaari raajiniara. Raaco na cuuquesacari, saaja Jesu jiuniocotaja cohuaque toque niquiquiaari maanoori. Pedroori juhua jiuujiaaju tacateyarohua na shiriqiniutia, na niquishanojiniji, maajipohua pohuatasanojininio.

Jesu tojitianaa pueya niquishacari Jesu, nojori quiasacari Emaús tiacajiniara
(Mr 16.12-13)

¹³Cuno domingo* juucaja, caapiqui Jesu pueyari Emaús tiacajiniara quiojori-

quiaa. Emaús tiacaari querajaa hora* quiquiaari Jerusalén tiacajiniji, niohuacata quiasacari tiriara. ¹⁴Nojori quiojosacari nucuaco, nojoriiri Jesujiniji pocoojoriquiaa, mariyata shusha naataja pueya miishanojiniji Jesu. ¹⁵Naa nojori pocoojosacari nucuacotej, Jesujuanaari jiyacari nojori rupuesee. Juhuaaniya nojoritia pacutaareeri. ¹⁶Majaari nojori niishiniu quiquiaari cana pueyanote cuno quiquiaariní. Nojori namijiaari tojequiaari, maja nojori niishiniuria Jesu. ¹⁷Jesuuri nojori nequesotaree:

—¿Casaa nia pocoojotaacuaani?

Nojoriiri nujuatuquee. Taraajecoyano niquishaariquiaari.

¹⁸Cuno caapiqui pueyanojinijini, tamonu sesa quiquiaari Cleofas.

Nojuajaari Jesu riucuaaree:

—Puetunu pueyajanaacuaajaari niishiya casaate Jerusalén tiacajinia miishaarucuaa taraatiani. Quiaacuaajaari Jerusalén tiacajinia quiquianujuhuaj. ¿Quiaatucua casaara niishiyaquirini casaate miishaarucuaani?

¹⁹Jesuuri nojori nequesotaree:

—¿Casaate tii miishaarucuaajaarani?

Jesu sequereeri:

—iNazaret tiacajinijinio Jesuuri mosaarucuaajaj! Nojuajaari Pueyaso sequesano caminiujiunia quiquianu. iJiyanohua maninia quijiaari na cumaacata na miijosano, na niishitiojosanojuhuaj! Pueyaso timitiasano quijiaari, puetunu pueya panishanojuanaano. ²⁰Pueyacuara secojonaa jiyaniijianucua, mariyata pa camarucuaari na niquitiorucuaa Romano jiyaniijia na motesocoriquiano. Niyacutesanojinia mosaarucuaari. ²¹Canaari juucua jiyaniquianuni, nojuajaari Romano pueya taanuunutaniya, pa Israel pueya quiniuria juhuaaniya tama pajaniyajaaja. Quiarijiani, jiuujianaraca juucaari tari na shoconujiaa na mosaanujiniji. ²²Tamasa-

ca maajipohua canaa maanujinijinioori canaa shirioree nojori pohuatasanota. Nojoriiri quiarijia tariquicuaji quiojomaa Jesu raajinia. ²³Nojoriiri maja na riuriatana quishii na quete. Nojori tacatasacariuhua, nojoriiri canaa pohuatasuhua, nojorinia Pueyaso seya niquirii juhua na maquenujinia. iCuno Pueyaso seyanaari nojori sequeree, Jesu tari samiitiarohua! ²⁴Na nuhuaji, tamasca canaajinijinioori raajinia quiojiyareejuhuj. Seetanujanaa naa quiriquiaari, taa maajipohua sequeree canaacuajani. Maja cutaraari nojori niqiniu quirii Jesu.

²⁵Jiyacaritij, Jesuuri nojori sequeree:

—Pueyanaa, majaquiiri juhuanojuajania niishiniu. Niaari taacanuyajaa puetunu tariucuacaanu Pueyaso sequesano caminiujiunaa naajiotasanoocuajanaa nia tiuuniuria. ²⁶¿Majateeri naa na pohuatasaanu quiquiaaricuaja: “Cristoori coteenu naa mosaanutaniyaquij. Na nuhuaji cutara, jijanohua cumaacaracara quijjara jiyatesaanutaniuhuari Jijaniijijanaa na quiniuria”?

²⁷Jesuuri juhuacatecara nojori niishitiojoree puetunu tariucuacaanu Pueyaso Rupaajinijijianaa, tee nojuajiniji naajiotasano quiyacuajani. Moisés naajiotasanojiniji pohuatanu coteereeri, na nuhuaji, puetunu Pueyaso sequesano caminiujiunaa naajiotasanojinijijianaan-io.

²⁸Nojori tiuquishacari cuno tiacajinia, terara nojori quiojoriquiaacuajani, Jesuuri juhua shocoriquiano canujiquiaa. ²⁹Nojoriiri nojoritia na jijojetenu paniriquiaa jijanohua. Nojoriiri na sequeree:

—iNiyaja canaata quia jiyojere! Paa tari niniyareeni.

Naaratej, Jesuuri nojoritia jiyojeseecuniqui. ³⁰Jesu jaara nojoritia cajiriquiaa tari miaquejajinia, nojuajaari pan ririi.

Nocuara Pueyaso secojoreeri. Nojoriria na neecasereeri. Na nuhuaji, nojori serotareeri. ³¹Jiyacaritij, nojori namijiaari juhua riatequequee. Jiyacariqui na niishitiquiiri. Jesuuri saaja shaajequee cuniquijia nojori tajiniji. ³²Nojoriiri sequetooree:

—iJesucujajiquiri quiriquiaa! iCunora poojiaqui jiyamitia timiriquiaa na pocoojosacari pajaniyata nucuamaji, nojuaja jaara niishitiojoriquiaa pajaniya Pueyaso Rupaajinia naajiotasantej!

³³Jiyacaritij, nojori shuquiriniutia, nojoriiri ritia sanetaquee. Cuniquiji Jerusalén tiacajiniara tacaretaarohuari. Nojori tiuquishacariuhua, nojoriiri puetunu Jesu once saquiriojosano pueyajanaa riuriatasuhua tii tariucua rerejono, mariyata socua narta Jesu pueyata. ³⁴Tariucua tijajinia quiniiaari Emaús tiacajiniji tiuquijionaa sequeree:

—iPa Jijaniijiaqui seetanujanaa samiitiarohua! iSimónri na niquirii!

³⁵Na nuhuaji, shusha tiuquijionaa nojori pohuatareejuhuaj, taa Jesu pocoojoriquiaa nojoritiani, nucuaco nojori quiasacari, mariyata taa nojori niishirii nojuajani, pan na neecasacari nojoriria.

Jesu muetasacariuhua na saquiriojosano pueyacua

(Mr 28.16-20; Mr 16.14-18; Jn 20.19-23)

³⁶Nojori pocoojosacarijia nojori niquishanojiniji Jesu, jiyacaritij, Jesujua-naari canashyaquiji nojori tajinia nujaaquee. Naa nojori sequereeri:

—¿Niaate quiyajaa? Nioojia nia cajitiri.

³⁷Nojoriiri shiriqititiquii. Jijano-hua puereturiquiaari. Nojoriiri Jesu jijaniriquiaa naaqui. ³⁸Jesuuri nojori sequeree:

—¿Casaara nia pueretiuyani? ¿Casaara nia jiyajenetaa janiyani? ³⁹Cua juaashiquia nia niquiri, cua niohuacanio, nia niishiniuria janiyacujajiaari quiyani. iCua

cootiuri! ¡Cua niquitiuri! Naaquiiri maja cuaqueyaraca, maja nucuuharaca taa nia niquiya janiyacujani.

⁴⁰Naa nojori na sequesacaritij, Jesuuri nojori niquitijoree na juaashiquia, na niohuacanio. ⁴¹Puera nojori jiuujiatesacari, puera nojori shuquirishacarijihuaj, nojoriiri taacanuuriquiajaa, maja naasucua Jesu. Cunora, Jesuuri nojori sequeeree:

—¿Niaate miaquesocoriquiano jiitiaacuaa?

⁴²Nojoriiri Jesu niquitijoree sapitiaaja raqui caquishano. ⁴³Jesuuri na maseree. Nojori niquiara na miaquereeri. ⁴⁴Na nuhuaji, nojori sequeereeri:

—Janiyari naa miishaarucuaani taa cua pohuataquiaari niajaniyacujani, pueyaracaanu niaata cua quishacari tarijia. Nia sequequiaaricujani, janiyari naa miishaanutaniyani, taa Moisés naajiotaquiaari janiyajinijicujani. Puetunu Pueyaso sequesano caminiujiu-niaajanaari janiyajiniji naajionuutaquiaarijihuaj. Supuetana Davidri janiyajiniji naajiotaquiaarijihuaj na jaaquequejoneejinia. Quiarijia tari tohuateerucuaari puetunu janiyajiniji cuno naajionuutasanojuanaa.

⁴⁵Jiyacaritij, Jesuuri nojori niishitirii tariucuaaanu Pueyaso Rupaa naajiotasano. ⁴⁶Nojori sequeereeri:

—Tariucuaaanu naa naajiotasanoori quiya: “Pueyaso Jiyarosocoriquianoori mosaariquiano, na nuhuaji, jiuujianaraca juucajinia samiitianutaniuhuari”. ⁴⁷Naa

naajiotasaaquiaarijihuaj, Jerusalén tiacajinia, janiyajinijiiri pohuatasaanutaniya pueya niquiara, na nuhuaji puetunu jiyacajiniajanaanio. Pueya tiuushacari cucua, nojori jaara noojiaca tacatorohua sesa nojori miiniujiniji, sesa nojori miishanoori tuujusaanutaniya, Pueyaso jiyanooshacari nojori. ⁴⁸Niaacujaari puetunu cua miishanojuanaa niquijia. ⁴⁹Cua tojitiare. Janiya jaara jiyocuacaanu quiaarohua cua Queecuani, janiyari Pueyaso Sohuanu jiyaronutaniya niaacuani, taa cua Que sequequiaaricujani. Niyaja pootia nia quiri Jerusalén tiacajiniani, niaa jaara jiyocuacaanuji niriquiano cumaaca maserejaatijia.

Jiyocuacaanu Jesu tacasariuhua (Mr 16.19-20)

⁵⁰Na nuhuaji, Jesuuri nojori jiyataquiaari Jerusalén tiacajiniji, Betania tiacajiniara. Cuniqi nojori quishacarijia, Jesuuri na juaashiquia shiitioquiaari nojoriicuaa na secojosacari Pueyaso, Pueyaso jiitianura maninia pueyaracaanu nojori. ⁵¹Nojoriicuaa na secojosacarijia, Jesuuri nojori shuriucuaaji tacanishaaquiaari jiyocuacaanu.

⁵²Nojoriiri na shuqiritiaree. Na nuhuaji, nojoriiri Jerusalén tiacajinia panaatia tacateyarohua. Nojoriiri jiyanoohua shuquiriaatia quiriquiaa. ⁵³Nojoriiri pueyaracaanu quijia Pueyaso Secojoua tiajinia. Tii Pueyaso maniniu-huaqueetatuja pueyaracaanuuri. Tariucujia.